






Ex Libris P. hisica.

32910/A




58130
JOAN. GOTTLOB. LEIDENFROST,
MED. D. ET P. P. VNIV. DVISBVRGENSIS

DE

AQVÆ

COMMVNIS

NONNVLLIS QUALITATIBVS
TRACTATVS.



DVISBVRGI *ad* RHENVM,
Impensis HERMANNI OVENII,
Vnivers. Bibliopolæ, 1756.





**ILLVSTRISSIMÆ
ACADEMIÆ SCIENTIARVM
REGIÆ BEROLINENSI**

REVERENTIAM TESTATUR

**ET
OPTAT SALVTEM**

JOAN. GOTTLOB. LEIDENFROST.



Est academia **VESTRA**
Scientiarum aliquod qua-
si mare, quod dum Rhe-
nis nutritur, & Albibus
& Viadris magnis, etiam minoribus amnibus



aperit ostium, nec renuit parvos aliquando
in finum admittere torrentes. Quare ad
VOS hic parvus observationum physica-
rum tendit rivulus, non ut augeat abun-
dantiam VESTRAM, ILLVSTRIS-
SIMI ATQVE DOCTISSIMI
VIRI, sed ut aliquam si dignus est, a
VOBIS nanciscatur auctoritatem, & quia
eum aliter non agere oportebat. Nam
ad quem potius quam ad academiam
VESTRAM omnia pertinent quæ in
felici sub quo vivimus imperio ad augen-
das dilatandasque scientias fuscipiuntur
opera, ut ex iis terris aliquem recipiatis
fructum, quarum emolumento & gloriæ
tot egregios VOS consecratis labores. At-
que si non magna sunt aut multa quæ nunc
offerre queam, ipsa VESTRA magni-
ficen-



ficentia tenuitatis meæ præsidium erit & fidentiam excusabit. Pressi autem diutius has quas exhibeo observatiunculas, donec de perpetuo earum & fido successu certior essem, quia nil est quod naturalem doctrinam manifestius auget, quam securitas & constantia phænomenorum, siquidem natura sibi similis ubique easdem leges in omnibus servat, & ea vis quæ in minimis agit, regit etiam maxima, ita ut non moles aut ubertas aut ostentatio, sed sola veritas animadversionis ad stabilem scientiam nos homines ducat. Ubi autem ex indicatis aquæ phænomenis aliquas ducere consequentias sum ausus, id cum cautione & quasi cum timore feci, ut ipsa ea provida dubitatio quam adhibui declarabit, dum quantum licuit, re-

gulam Euclideam sensibus meis adjunxi, semper securam, semper falli nesciam. Scio enim quam fit homo pronus ad judicandum & quam facile fallax sensus nobis aliquid persvadeat, quod judicii severioris examini sustinendo impar tum deprehenditur. Etsi autem de aqua inprimis scribere decreveram, tamen etiam de aliis nonnullis rebus, ut de ignis absoluta respectu centri telluris levitate, ac de doctrina colorum *Newtoniana* ut paucula monerem, ipsa scriptionis occasio tulit. Et sentio satis nihil magis mihi verendum esse quam ut ea licentia sit displicitura, qua magnis quibusdam & meritissimis viris aliquid opponere, aut eorum sententias refellere non dubitavi. Inprimis metuo fore non paucos me damnaturos quod summo



mo viro, ISAACO NEWTONO thesin ab eo generaliter stabilitam, & à phycis quantum scio universaliter receptam, eripere, & contra eum chemicos tueri conatus fuerim, scilicet non omnes corporum lamellas tenues esse coloratas, sed oleosas solum, vel in quibus aliquod phlogiston est. Neque autem ex impudentia natas esse eas objectiones, verum justas dubitandi causas mihi fuisse, spero, statuent æqui judices, si scriptam legent venerationem qua magnos viros prosequor, nec libertatem sentiendi minoribus volent adimere.

VOS autem, ILLVSTRISSIMI
atque DOCTISSIMI VIRI, si pau-
culas quos vobis dedico paginas benevo-
la receperitis fronte, accendetis in me &
excitabitis studium ut aliquando meliora
ten-



tentem, majorique fiducia ea quæ adhuc in animo versantur, perficiam. Veneror ego DIVINVM NVMEM ut saluum velit AVGVSTISSIMVM REGEM, orbique diu concedat hoc suo incomparabili munere frui. Servet etiam DEVS in patriæ commoda splendidissimam ACADEMIAM VESTRAM, in ejusque gratiam vitæ & sanitati fortunisque vestris beneficia liberaliter addat.

Scribebam Duisburgi ad Rhenum

VI. Calend. Maji

M DCC LVI.



DE
AQVÆ COMMVNIS NONNVLLIS
QUALITATIBVS
TRACTATVS.

§. I.



Non est animus commentarios scribere de aqua, aut ea repetere quæ a maioribus nostris in hoc admirabili corpore observata fuere, nisi quatenus ea, ut stabiliantur aut emendantur per meas observationes, adducere oportuit. Ea scribam quæ hætenus ab aliis observata non legi. Si quæ tamen eorum ab aliis jam notata fuerint, ignorationi meæ veniam ut lectores concedant, rogo. Nec metuo propterea despectum iri has meas animadver-

A fio-

siones, quia leves sunt, cuius obviæ, sine magno apparatu natæ, faciles imitatu. Veritas neque perâ habet opus neque pallio. Præterea persuasum est mihi, nullas experientias in physicis majoris esse momenti quam eas quæ in corporibus simplicioribus, quale est aqua communis, instituuntur. In compositis enim adeo sæpe complicata sunt omnia, ut difficillimum sit ex iis regulas aliquas certas & fidas elicere. Quam enim facile in rebus compositis latet aliquid, quod prætervideat attentio nostra, quo tamen prætervifo tota demonstratio irrita est. In simplicioribus error est simplicior & facile extricandus. Profecto, qui *regulas generales motuum* examinaturus eligeret sibi contemplandam animalium machinam, intricatissimis motionibus agitatam, proh! quam difficilis ea via foret & anfractibus curva, quantis obnoxia erroribus? Ita qui materiæ corporeæ qualitates generales, hæctenus non satis detectas, indagare cupit, ille non satis æstimare potest simplicia phænomena in simplicissimis corporibus obvia, quando hæc extra consortium aliorum, per se sola, aut ab uno tantum alio, etiam simpliciori corpore, moventur, mutantur, afficiuntur. Horum enim phænomenorum quo quis plura novit, eo securius tramitem suum calcans, scopulis non multis offensus, ad metam perget, quum qui in compositis laborat, admirationem potius movere, quam scientias vere juvare sæpius deprehendatur.

§. II.

Adeo nulla in his terris vita sine aquis aut fieri aut continuari potest, ut exemplum contrarium frustra quilibet quæstiverit. Monetque PLVTARCHVS Chæronensis, pulcher ille PLVTARCHVS in eleganti quam tractat quæstione, an aqua vel ignis usu hominibus præstet, *Alibantas* vocatos mortuos esse, propterea quod hos solos liquore & humido omni privatos esse conveniat. Quæ causa est ut de aquis cognoscendis omne genus hominum sollicitum videatur. In ea enim invenienda, segreganda, colligenda, dispensanda magna pars *æconomiae tam publicæ quam privatæ* occupatur. Celeberrimum *Theologi* habent in aqua objectum. *Juris* autem tam *naturalis* quam *civilis* vix alia præclarius & illustrior quam de aquis quæstio est. Vimque & æquilibrium, motusque undarum in staticis & hygrostaticis *mathematicus* metiri conatur, antequam mensuræ finem fatigatum se sentit semper varietate & difficultate rei. Quis recenscat quæ tantis voluminibus circa *medicos* aquarum simplicium & mixtarum usus & abusus vix non omnes conscripserunt auctores medici. *Physicus* de ortu, causis & effectibus aquæ multa sane & egregia, respectu tamen eorum quæ dici aut possent aut deberent, mutila admodum edisserit. *Chemicus* vero, quatenus eam *Physices* specialem partem tractat, quæ de materialibus corporum principiis agit, corpusque solummodo ut mixtum, se-

motâ omni structuræ aut motus progressivi consideratione, examinat; chemicus inquam etiam de aquarum materia, generatione, mistura, mutatione, corruptione, pauca, & horum paucorum ne omnia quidem satis certo docet. Nam parvus omnino catalogus est eorum, quæ ut vera in physicis & chemicis traduntur, de aqua simplici assertorum, quem catalogum dum uno vel altero asserto augere nunc conor, ratiocinia non nisi parce interspergam, & quæ incerta sunt, a certis semper sejungam, forsan tamen, aliquoties si extra viam paulisper vagatus alia quædam, minus ad rem pertinere visa adduxero, id propter nexum materiæ substratæ lectorem condonaturum confido.

§. III.

Omnis sine dubitatione antiquitas vidit, aquam esse *fluidam*, *humidam*, aliquando *frigidam*, eandem quandoque *calefieri*, *fervere*, *ebullire*, inque *vapores mutatam* volatilem fieri, eandem concrefcere aliquando in *glaciem*, eam *salia* quædam *resolvere*, *terras intactas* linquere, & a pinguibus potius repelli, quæque similia his phænomena ut verissima, ita communissima sunt. Vt vero hæc solos contingunt sensus, nec pariunt aut juvant augentque intellectum, nisi in singula phænomena scorsim & in debita circumstantiarum ratione secundam certas legum statarum mensuras inquiratur, ita certum est, a
pri-

priscis rerum physicarum auctoribus non nisi paucissima, & ne ea quidem omni hypotheseos labe carentia in hac quæstione proponi.

§. IV.

Primum de aquis philosophice observatum merito statuitur *simplicitas* earum. Vt enim de THALETE MILESEO fileam, qui aquam pro unico corporum omnium principio elementari, magis ex ingenio quam ex observatione constituit; neque meminerim DEMOCRITÆ Icholæ, quæ in hoc elementorum negotio solum ignem aquis conjungi debere non majori fide asseruit; hoc constat, summum ARISTOTELEM, qui primus necessitatem quaternionis elementorum demonstrasse sibi videbatur, diligenter discussis pensatisque majorum observatis & opinionibus, nostræ aquæ inter *simplicissima corpora* non quivisse denegare secundum locum. Et hæc quidem quaternionis elementorum aristotelica hypothesis, etsi non ex asse veram esse defendere velim, tam tamen est elegans hypothesis, tam veritati propinqua, tam respondens plerisque phænomenis, ut ego mirer quomodo hac relictâ ad occulta & multo incertiora elementorum figmenta semet adsuere potuerit recentior physicorum hominum ætas. Omnis enim physica hypothesis hæc duo habeat necesse est, primum ut ex positis principiis phænomenorum explicationi satisfiat, deinde ut ipsa principia re-

vera existant, nec sint entia rationis, prædita ad fictionis lubitum occultis omnium ordinum qualitatibus. Quæ bina requisita, nempe liceat in transitu hoc monere, neque in Chemicorum decantatis tribus principiis, neque in Cartesii tribus phantasmatibus inveniuntur. Nam ut de *monadibus* taceam, quorum doctrina magis ad methaphysicam pertinet, quam ad naturæ corporum cognitionem, profecto *Chemicorum salis, sulphuris, mercurii* principia nulli fere rei satisfaciunt, nisi terræ & aquæ principiis quasi postliminio in illam philosophiam reductis utaris; accedit quod sal ipsum, etiam in simplicissimo sensu non simplex esse sed ex terra & aqua & igne mistum corpus, ideoque primi elementi titulo in cassum gloriari videatur. *Cartesiana* vero particularum trina detornatio eo primum vitio laborat, quod nullibi ad sensum possit ostendi, nec ullo modo realis earum demonstrari existentia, potius ex phantasie luxuria temere fingatur. Quibus dein accedit, quod dum bonus æther omnibus satisfacere phænomenis laborat, incidat in Jovis ethnicorum dei ærumnas, quas adeo lepide derisit in suo *bis accusato* & alibi passim festivissimus LVCIANVS.

§. V.

Vt autem eximiam *aquæ simplicitatem* vindicavit ARISTOTELES, noluit tamen illam pro *ente quodam originario* & pro *immutabili* haberi. Potius

tius credidit quatuor quæ stabiliverat elementa in se invicem *converti*, & ex binis sibi junctis, pereunte utriusque forma, tertium semper enasci posse, eamque sententiam ex generalibus motuum legibus & primariis corporum observatis qualitatibus a priori, ut ajunt, conclusit. Nam quod ARISTOTELES quatuor hæc elementa pro materia prima non habuerit, sed tantum pro ejus primis & simplicissimis modificationibus, ipse monet passim. vid. de Gener. & corrupt. c. 5. Quam sententiam licet iterum ex asse meam facere aut defendere nolim, miror tamen astutam hypotheseos sagacitatem, cujus pulchritudo vix non incognita hodie est, postquam desit legi Philosophus græcus. Supponit enim *primo* motum circularem omnium perfectissimum esse, & ex circulari motu sequi, nonnulla corpora gravia, nonnulla levia esse, quod satis quidem coincidit cum summorum Virorum HYGENII & NEWTONI doctrina, motum quemvis curvilineum in binos alios, unum *centripetum*, alterum *centrifugum* resolvente. Nam *leve esse* ex definitione aristotelica idem est, quod *a centro* vel a medio niti. Supponit *secundo* Conditorum naturæ quibusdam corporibus hos binos motus ita dispensasse, ut quædam corpora *semper* sint *gravia*, ut *terra*, quædam *semper levia*, ut *ignis*. Sive, quod idem est quædam corpora se attrahere, quædam se fugere semper. Et inprimis ratione centri telluris quædam corpora ad illud semper niti, quædam ab eo semper se

conari abstrahere. Physica recentior fere tota quatenus *materiam* corporis considerat, in eo occupatur, ut hanc mutuum particularum ad se invicem habitum per experientias chemicas declararet, quomodo se vel attrahant, vel fugiant a se invicem. Sic de terra pura certissimum est, quod quamdiu est terra sincera, nec aliis corporibus tanquam vehiculo quodam sublata, semper sit fixa, i. e. semper gravis, semper versus centrum telluris nitatur, ut experientiae chemicae extra omnem ponunt aleam. Ignem autem si purus est, neque in aliis corporibus gravibus tanquam in carcere hæret, semper volatilem, i. e. levem esse & centrifugum, nec ad telluris centrum niti, etiamsi BOYLIVS negare tentavit in libro de *ponderabilitate flammæ*, hic tamen inter ignem purum, & inter compositissimum flammæ corpus non distinxit, nec ad aeris corporibus ignitis insinuati pondus respexit, HERMANNVS autem BOERHAVE in *immortali Chæmiæ opere*, levitatem absolutam igni puro argumentis restituit vero quam maxime similibus.*

Vnde

-
- * Scilicet BOERHAVIVS docuit quod massa satis magna ferri aut cupri per ignem summe candefacta, bilanci appensa ne hilum gravior sit quam eadem massa ad refrigerium sensim rediens. Describit experimentum propterea institutum a se esse in parallelopido ferri librarum quinque & dimidiæ, dein etiam in satis ingenti cupri massa. Scio conclusioni quam ex his experientiis duxerat B. BOERHAVE, plures eruditissimos viros, & imprimis illustrem MVSCHENBROECKIVM opposuisse, Princ.

Vnde constat sine justitia & penitus immerito propter hanc de absoluta quorundam corporum levitate sententiam, a recentioribus vapulare veterem philosophiam. Supponit *tertio* ARISTOTELES, inter terram & ignem, bina elementa

A 5

me-

phys. §. 787. quod propter hydrostaticas rationes, dum scilicet ferrum ignitum majorem occupat molem quam in statu refrigerii, ideoque specificè levius fit, majoremque ab aere in quo ponderatur resistantiam experitur, quod inquam propter hydrostaticas has rationes censendum sit, pondus partium ignearum præsentium per hoc experimentum cognosci non posse, quia majus quod ab igne accedit pondus æquilibratur ab aere propter majorem factam ferri molem; imo quod per easdem rationes ferrum ignitum potius esse deberet levius, & in balance ascendere, nisi ab ignis accedentis pondere deprimeretur. Licet in re ardua mihi contra ratiocinium celeberrimi MUSCHENBROECKII debita tamen cum reverentia meritisimi viri, & sine contradicendi pruritu ex solo veritatis inveniendæ amore monere, quod quando in hoc ratiocinio calculus mathematicus adplicatur, totum illud subito evanescat. Namque ut assumam data, quæ assumit ipse Vir illustris, vel quibus certe non contradicit:

I. Pollex cubicus aquæ pluvialis = gr. 311. (Musch. l. c. §. 704)

gravitas specifica aquæ talis ad gravitatem specificam ferri ut 1000 ad 7645 (id. ib. §. 703.)

quare $1000 : 7645 = 311 : 2377 \frac{595}{1000} =$ pollicis i. e. ponderat unus cubicus ferri pollex grana 2377.

Pondus autem massæ ferreæ quam ponderavit Boerhavius erat librarum 5 & unciarum octo, vel unciarum 38, i. e. gr. 42240.

media, *aquam & aerem*, ratione gravitatis & levitatis quasi indifferenter se habentia, sic tamen ut aer ad levitatem potius vel centrifugam volatilitatem, aqua autem magis ad centripetam fixitatem inclinet; in quo supposito non multum falli

quare moles ejus fuit $2377 : 42240 = 1 : 17 \frac{1931}{2377}$

i. e. massa Boerhaviana ferri occupavit pollices cubicos $17 \frac{1931}{2377}$ in statu frigoris.

II. Vt igitur hujus parallelopipedi, quod in statu frigoris occupavit pollices cubicos $17 \frac{1931}{2377}$, molem auctam in statu incandescentiæ investigemus, omissâ propter calculi commoditatem fracturâ, oportet scire:

ferrum candidum expandi per $\frac{1}{60}$ longitudinis suæ, (Boerhav. Chym. p. m. 243.)

quare si 17 pollices cubici (fractura emissa) $= a^3$ in statu frigido, erit eadem massa in statu candoris, i. e. aucta in trina dimensione per $\frac{1}{60}$ longitudinis suæ

$$= \left(a \times \frac{a}{60} \right)^3$$

$$= a^3 \times \frac{a^3}{60} \times \frac{a^3}{3600} \times \frac{a^3}{216000},$$

$$= 17 \times \frac{51}{60} \times \frac{51}{3600} \times \frac{17}{216000},$$

scilicet nondum 18 pollicibus cubicis æqualis fuit massa ferri BOERHAVIANA in statu sui candoris.

falli auctorem, verissimum est, ac ut de aqua nemo contradicit, illam aliquando gravem, aliquando valde volatilem esse, ita aeris etiam statum duplicem nunc fixum nunc volatilem satis afferuit MAYOVIVS & HALESIVS, quique illos secuti

III. Quare moles aucta in frusto ferri BOERHAVIANO non unum confecit pollicem cubicum, ideoque nondum unus pollex aeris ex loco per hanc expansionem est motus, quapropter resistentia aeris ferro ignito facta nondum unum aeris pollicem confecit. Jam pondus unius pollicis aeris mediocriter calidi vix gr. $\frac{1}{4}$ æquat. Quare resistentia aeris major contra ferrum BOERHAVII ignitum aucta fuit nondum per $\frac{1}{4}$ gr. quod pondus tam parvum est, ut in balance, ex qua plures libræ pendent, non possit animadverti.

IV. At vero ulterius animadvertendum quod athmosphæra aeris in loco illo ubi hæret ferrum candens, adeo debeat esse rarefacta, ut fere pro loco vacuo haberi queat. Quare athmosphæra talis nil omnino, vel certe infinite parum resistere potest. Nec obmoveri debet, quod, quo calidior fit aer, etiamsi pondere decrescat, eo majorem acquirat elasticitatem, & elasticitate sua igitur magis resistere queat. Nam elasticitas hæc, si qua in tali calore adest, resistentiam suam in radiis igneis candentis ferri circumquaque emissis, non in pondere ferri habuit, & præterea in quæstione est, an in tanto calore aer elasticus adhuc dici queat.

V. Sequitur ergo per demonstrata (moment. III.) quod pondus partium ignearum in ferro BOERHAVIANO, si sensibile esset, non sit ultra gr. $\frac{1}{4}$ ideoque vix sensibile. Et ex demonstratis (per moment. IV.) sequitur quod ejus pondus sensibile sit nullum.

cuti sunt egregii viri. *Quarto* supponit STAGIRITA præter motum primarium, i. e. præter gravitatem & levitatem, quatuor esse principes & cardinales elementorum qualitates, ex quibus omnes reliquæ corporum affectiones sensibiles de-

VI. Interea autem per observata BOYLIANA, augmenti calcium & metallorum si hæc revera ab ignis accessu dependerent, & per ea quæ repetita sunt in Acad. Reg. Paris. & per ea quæ ipse ill. MVSCHENBROECK adducit l. c. sequitur, quod pondus ignis, insinuatum in candentia corpora metallica permagnum esse debeat, quia pars ejus fixata, magnum in his corporibus ponderis augmentum dedit. Quare si pars igneæ materiæ fixatæ magnum pondus dedit, ejusdem materiæ nondum fixatæ pondus integrum multo majus debuisset observari, si revera ignis esset gravis.

VII. Forte sunt qui putant parvi momenti hanc controversiam esse, parumque in rebus physicis inde haberi emolumenti, sed hi non animadvertunt, quod, si ignis absoluta levitas demonstrari posset, falsum foret theorema physicum universaliter hactenus introductum quod *gravitates specificæ massis, & massæ corporum gravitatibus specificis sint proportionales*. Ferrum enim ignitum plus habet massæ quam frigidum, & tamen non plus habet gravitatis specificæ. Regula enim hæc paulo ante citata, ut profecto in chemicis experimentis non ubique valet, potius in multis casibus, præsertim solutionum & effervescentiæ apparet, communes hydrostaticas leges super gravitate corporum specifica fundatas minime applicabiles esse, ita profecto meretur, ut in ejus limitationes serio inquiratur.

VIII. Vt igitur de igne, quamdiu ignis est, nec in alia corporum genera transmutatur, certior fierem, an vere sit

dependeant, *calorem*, scilicet, *frigus*, *humiditatem* & *siccitatem*, vel si placet rem totam hodiernis terminis expressam audire, quædam corpora *elastica* esse, quædam *non elastica*, quædam esse *fluida*, quædam *firma*. Nam væh! quam indigne ex-

gravis vel levis, aliud experimentum excogitavi. Optima scilicet methodus hanc litem dirimendi esse mihi videbatur, si possemus inquirere, an vis quæcunque alia, a vi gravitatis diversa, (v. g. projectio horizontalis per aliquem elaterem) corpori ignito, & eidem non ignito, æqualem imprimeret motum, & æqualis ex eo motu sequeretur in utroque casu effectus. Nam quando pondus ignis per gravitationem ipsam explorare intendimus, semper manet aliqua excusatio an forte pondus revera adsit, sed tam parvum & pusillum ut sensus nostros effugiat. Eo scopo, feci mihi fabricari elaterem fortem, $2\frac{1}{2}$ pedes longum, ex bono chalybe, qui in extremitate altera in formam cochlearis excavatus esset, cui globum ferreum imponere possem. Eum elaterem in altera extremitate uncis ferreis firmis adfixi parieti ligneo, ita ut si tensus esset elater, parieti huic quodammodo parallelus, & perpendicularis esset ad horizontem; si vero idem elater, vi tendente resolutâ se restitueret, is in parte inferiori a pariete recederet, & globum ferreum in extremitate inferiori impositum a se per lineam horizontalem projiceret, qui dein globus per lineam parabolicam ad tellurem tenderet. Confecto hoc instrumento, ut ex eo usum caperem, ita sum ratiocinatus:

- 1) Æqualis vis æqualem producit motum, quare ab eodem elatere, in eodem gradu tenso, idem globus ferreus, si recte omnia instituuntur, per æquale spatium, eodem tempore semper projicitur.

explicant ARISTOTELEM & quam parum in ejus lectione versatos se esse ostendunt aut commentatores aut derisores illi peripateticæ physices, qui sub termino *caloris* illam sensibilem corporis qualitatem qua nervi nostri a calore afficiuntur,

- b) Si autem ab eâdem & æquali vi, scilicet ab eodem clatere corpora diversa ejusdem magnitudinis sed quæ non eandem massam habent, v. g. globulus ferreus, & globulus ligneus, projicerentur, quod tunc *celeritas major sit* futura in eo corpore quod *minorem massam* habet scilicet in globo v. g. ligneo, & *celeritas minor* in eo corpore quod habet *massam majorem*, ut in globo ferreo.
- c) Quia igitur celeritas determinatur per spatium tempore divisum, sequitur, quod in his binis globis, si tempora poni possint æqualia, celeritates sint futuræ spatiis proportionales, ideoque (per no. b) in his *spatia fore reciproce ut massas*.
- d) Si suppono ignem esse corpus, nec tamen gravitare versus telluris centrum, sed ratione telluris esse corpus absolute leve, tunc sequitur quod globus ferreus ignitus non gravior sit, quam idem non ignitus, atque tamen in globo ignito plus sit massæ quam in frigido, quia ignis in eum intravit.
- e) Quare ex hac hypothesi (d) globus ferreus ignitus, & idem non ignitus, si ex eadem altitudine cadunt (in medio non resistente) ad tellurem accedent *eadem temporis mensura*.
- f) Unde si uterque horizontaliter ab eadem vi ex eadem altitudine projicitur, uterque parabolam describet, dum a duplici vi urgetur, alterâ secundum horizon-

tur, & quæ in solis nostris nervis & non in corpore calefaciente est, intellectum putant. *Caloris* enim definitio apud ARISTOTELEM est vis congregandi similia, & segregandi dissimilia; quemadmodum *frigus* omnia sine discrimine con-

tem projiciente, altera perpendiculari, scilicet gravitante ad centrum telluris.

- g) Et quoniam gravitas in ambobus æqualis supponitur, erunt abscissæ utriusque parabolæ æqualibus temporibus æquales, i. e. uterque globus, eodem temporis spatio ad telluris superficiem accedet. Et quia, quamprimum globus talis superficiem telluris tetigit, statim quiescit, (nisi quatenus a repercussione novus motus produci forte queat) sequitur in ambobus globis, si æque graves sunt, in his circumstantiis tempora motionis fore æqualia.
- h) Dum vero in globo ignito supponitur major massa ab igne ingresso, quam in eodem frigido (d) & tempora motionis æqualia sint (g) & vis secundum horizontem projiciens æqualis (a & b) sequitur spatia esse massis reciproce proportionalia (c); ideoque in linea horizontali globus ignitus, propter massam majorem emetietur spatium minus; idem vero globus ferreus non ignitus spatium in eadem linea emetietur majus. Quare globus ignitus propius a puncto projectionis in arenam cadet, globus idem frigidus cadet remotius. Ideoque semiordinatæ minores erunt in ea parabola quam globus ignitus describet, quam in ea quam globus frigidus describit, si ad easdem abscissas applicantur.
- i) Et quia (in medio non resistente) si tempora sunt æqualia, & vis projiciens eadem, spatia sunt recipro-

congregare ipsi dicitur. Quas binas qualitates aliis, & quidem, fateor, aptioribus terminis mutuæ *attractionis* vel *fugæ* particularum ad & a se invicem hodie exprimimus, omnemque hanc theoriam sub generalissimo elasticitatis voca-

ce ut massæ (h & c) sequitur ex differentia harum semiordinatarum, vel, quod idem est, ex differenti distantia punctorum in quibus terram hi globi contingunt, a pariete ex quo projiciuntur, vel ex *differentia semiordinatarum in his binis parabolis* posse differentiam massæ cognosci.

- k) Ut hæc autem recte dijudicari queant, necesse est, omnia peragi *in medio non resistente*. Globus enim ignitus, quia non modo massa, sed etiam moles ejus crescit, majorem resistantiam patitur, si in aere projicitur, quam idem frigidus, massâ & mole minor. Ideoque globus ignitus non modo propter massam majorem movendam, sed etiam propter molem majorem cui magis resistitur, retardabitur, & spatium minus percurreret quam frigidus in ratione massæ inversa, & ratione augmenti molis in versa.
- l) Fit autem *resistentia aeris* contra propulsum quodvis corpus in *ratione superficierum*, ideoque si bini globuli perfecte sphaerici supponuntur, resistantiæ æriserunt in *ratione quadrati diametrorum*. Ferrum vero ab igne extenditur, ut supra adsumsi, per $\frac{1}{60}$ suæ longitudinis. Quare si diameter globi frigidi ponatur = 60, erit diameter globi ejusdem igniti = 61, & quadratum diametri in frigido = 3600, in ignito vero = 3721. Quare etiam resistantia aeris contra globum ferreum frigidum, & resistantia ejusdem aeris contra eundem globum ferreum ignitum, ab eadem

cabulo comprehendimus. At vero hæc & reliqua ex vera ARISTOTELIS mente explicare, nunc vetat finis, sufficitque indicasse, ARISTOTELEM *terræ* attribuere statum *non elasticum & firmissimum* tanquam attributa essentialia, sive frigus & siccita-

vi projectum, erunt ad se invicem ut 3600 ad 3721. Ideoque propter solam hanc aeris resistentiam globus ignitus propius a linea projectionis in terram decideret, quam frigidus in ratione 3600 ad 3721. Vel semiorbinatæ parabolæ, quas uterque globus describet, si ad æquales abscissas referuntur, erunt ad se ut 3600 ad 3721 ex sola aeris resistentia.

m) Si igitur fieret, per apparatus elateris descriptum, ut globulus ignitus adhuc propius a linea projectionis in tellurem caderet, quam ut distantia hæc esset ad distantiam frigidi ut 3721 ad 3600, tunc ulterior illa differentia non aeris resistentiæ, sed potius augmento massæ ab igne introductæ esset adscribenda. Quare quantitas massæ igneæ ex hac differentia posset determinari.

IX. Hoc erat ratiocinium meum, antequam experimenta ipsa tentavi. Deinde pluribus vicibus tentando ut in ejusmodi experimentis fieri solet, varias proportionem observavi, prout major forte vel minor ignis quantitas in globulos ingressa erat, vel prout in ipso elateris gradu tensionis, aut in aliis circumstantiis parva varietas effectus oborta. Semper tamen, & constanter, si modo recte tensus esset elater, globulus ignitus multo propius a pariete cecidit in arenam, quam idem aut æqualis globulus frigidus. Quare per hæc observata mihi constat in globo terreo ignito massam ignis copiosam latere & majorem multo quam quæ paucorum granorum ponderi

citatem; *aquæ* autem *statum non elasticum & fluiditatem*, sive frigus & humiditatem; *aëri statum elasticum & fluiditatem*, sive calorem & humiditatem; igni tandem *statum elasticum & firmitatem*, sive calorem & siccitatem. In quo supposito quam vel non vel non multum erraverit philosophus, recentiorum experimentalis physica & chemia communi suffragio contestatur. *Quinto* supponit ARISTOTELES, bina elementa, scilicet ea semper, quæ nullam qualitatem habeant communem, sibi jungi & misceri posse, ita ut utriusque forma deposita, nova quædam emergat, id quod nec rationi nec experientiæ ullo modo contrariatur. Et ex his quinque præmissis suppositis concludit ingeniosissimus auctor, *convertibilia in se esse elementa*, & ex binis junctis semper nasci tertium, quemadmodum non nisi ex cunctis quatuor simul junctis omnia alia corpora componi autumat, & in optima syllogismi forma ex his concessis

por-

posset æquiparari, etsi nulla in tota hac massa ignita gravitas versus telluris centrum appareat. Confeci autem in hunc usum globos plures, diversæ magnitudinis, ut in diversis possem capere experimenta. Desino tamen plura de his hic dicere, quia ea reservo alii occasioni. Methodum tamen hanc meam determinandi an ignis pro ratione suæ massæ etiam proportionaliter gravis sit, hic volui publicam dare, ut si quid in eam animadvertendum esset, id possim a doctis viris resciscere, antequam ex experimentis per hanc methodum institutis aliquid concluderem.

porro argumentatur, non plures quam quatuor elementorum conversiones possibiles esse, corporum autem reliquorum fere innumeras, ideoque quatuor tantum dari simplicissima corpora, & innumera mixta, quemadmodum cuilibet, secundum ejus methodum rem tentanti patebit, quæ tamen a me nunc explicari minime debent, sed ea sola, quæ *aquam* concernunt, adduci. Demonstrat igitur *aquam* nasci, si terra & aer intime misceantur, *aquamque* in terram & aerem iterum resolvi posse. *Terram* scilicet, deposita sua siccitate, & *aerem* deposito calore, si concrecant, fieri corpus frigidum & humidum, quæ qualitates soli competunt *aquæ*. *Aquam* vero si cum igne jungatur, *aerem* generare, vel & *terram*, pro circumstantiarum ratione, nam *aquam*, deposita humiditate, ignem deposito calore, *terram* fieri; e contra *aquam* deposito frigore, *ignemque* deposita siccitate, concrecere in *aerem*. De reliquis enim conversionibus ad *aquam* non pertinentibus, brevitati consulens nunc nihil dico.

§. VI.

Hoc est celebre illud ARISTOTELIS ratiocinium, cujus vi *aqua* per ignem aliquando in *terram*, & aliquando in *aerem* transmutari proposuit, in quo tamen etiam quando optimum ratiocinium est, contenta quiescere scientia physica nequit, nisi accedat probatio experimentalis.

B a

Pro-

Profecto natura cœlibatum non amat, nam ut animam corpori confociavit, ita non æstimat folius mentis syllogismos, qui sensuum non stipati eunt testimonio. Interea notatu dignum est, quod hæc aristotelica hypothesis, ex bono ratiocinio nata ad hunc usque diem sit magnum illud physicorum problema, quod si recte resolveri & per experimenta demonstrari posset, toti physicæ doctrinæ novam faciem conciliaret scilicet si nosceremus primarias corporum in se conversiones. Quare breviter consideremus quæ per ipsos sensus observata fuerint circa aquæ hanc naturam, ut hypothesis peripatetica ex iis vel corrigi vel corroborari se patiatur.

§. VII.

Et quod ad primam quidem ARISTOTELIS conversionem aquæ in aerem attinet, ea omni tempore probabilis fuit habita. *Nam aquam calore in flatum resolvi, aeris omnino similem, elasticum valde, & cum impetu particulæ sese fugientium ex spatio circumcluso prorumpere, ultima antiquitas vidit in veteri æolipilæ instrumento. Ex eo enim ventorum naturam & ortum jam tum explicarunt philosophi, ut VI-TRUVIVS docet L. I. c. VI. ubi Ventus, inquit, est aeris fluens unda cum incerta motus redundantia. Nascitur quum fervor offendit humorem, & impetus fervoris exprimit vim spiritus flantis. Id autem verum esse, in æolipilis æreis licet ad-*
spi-

spicere, & de latentibus cæli rationibus artificiosis rerum inventionibus divinitatis exprimere veritatem. Fiunt enim æolipilæ ævæ cavæ, hæ habent punctum angustissimum, quo aquæ infunduntur, collocanturque ad ignem, & antequam calecant, non habent ullum spiritum, simul ac autem fervere cæperint, efficiunt ad ignem vehementem flatum. Ita scire & judicare licet e parvulo brevissimoque spectaculo de magnis & immanibus cæli ventorumque naturæ rationibus. Ex eadem causa jam olim ARISTOTELES ventos & terræ motus & similes eventus explicaverat. Et CARTESIVS de *meteor. discursu IV.* ab eadem ventorum & flatuum expositione sibi minime recedendum esse putavit. Illustris autem WOLFIVS *Tent. phys.* p. I. §. 174. observat flatum ex æolipila emissum & vase vitreo exceptum instar vaporis roridi huic adhærescere, sensimque in guttulas vere aqueas iterum confluere, imo *spiritum vini* ex æolipila simili cum flatu erumpentem ita non mutare suam naturam, ut flatus hic ardeat adhuc & omni nota vere sit spirituosus, quemadmodum & simile experimentum de spiritu vini per æolipilæ orificium erumpente & fontem ignis salientem repræsentante jam proposuit du HAMEL *Hist. Ac. R. P.* p. 189. unde concludit ill. WOLFIVS hoc tentamine transelementationem aristotelicam nullo demonstrari modo. Pace tamen perillustri auctoris monendum duco, ex ejus experimento de collectione vaporis in guttas aqueas nil aliud sequi, nisi

B ;

quod

quod *non omnis* aqua æolipilæ inclusa mutata fuerit in aerem, sed *pars ejus* vera manserit aqua. Nam experientia de spiritu vini habet aliquid peculiare, de quo quid ego observaverim, paulo post recensebo. In universum igitur ex æolipilæ ratione certum est, *aquam* vehementi calore in *flatum aeris similem* converti, ut ipse perill. WOLFIVS concedit l. c. sed an verus fiat aer ulteriori adhuc subjiciendum experientiæ erit.

§. VIII.

Nam & hoc in dicto jam experimento cautionem suadet quod seculo demum proxime superiori ex mirabili machina magni Magdeburgensium consulis, OTTONIS GVERICKE patuit, & ex ejusdem emendationibus BOYLIANIS & aliorum certius constat, in ipsa simplicissima aqua verum aerem jam intus in certis partium aquearum intervallis hæere, qui sive per calorem, sive per atmosphæræ externæ minorem compressionem, expanditur, bullas format, & ebullitionis in aquæ motum producit. Hunc enim aerem non ab igne produci aut generari, sed potius jam ante existentem modo expelli exinde colligimus, quia ebullitio sine igne fieri potest, quando in antliæ pneumaticæ recipiente vase collocata aqua post exhaustam atmosphæram ebullit vid. Exc. MVSCHENBROECK Elem Phys. §. 733. & apud alios passim. Eundem vero copiosissimum & multo flatui parem in aquis delitescere certum est,

est, quoniam eadem aquæ moles diutissime ad ignem ebullire potest, nec tamen unquam sola coctione penitus omni aere liberatur, sed in eo gradu caloris quem ebullitio requirit, aeris conclusi tenacissima videtur, ut non nisi lente & quasi coacta illum sensim dimittat. Quin & certum est, aquam aëre suo spoliata ejusdem denovo sitire consortium, & si modo liber ejus accessus datur, ex athmosphæra bibere ad satietatem. Nam aqua per antliam aëre vacuata, in lagenis inversis asservata *bullam aeream immis- sam cito sibi implicat*, ut ejus dispareat moles aut valde multum pro ratione quantitatis utriusque liquoris imminuatur, ex prima observatione DE LA HIRE monum. Ac. R. P. 1711. quæ dein sæpius & clarius repetita est vid. Cel. MVSCHENBROECK l. c.

§. IX.

Hoc certum est, *expansionem aquæ flatulentam stupendas possidere vires & elasticitate gaudere vix mensurabili*, ita ut vapor parvulæ guttæ ex sat magno globo vitreo vel aereo omnem expellat non modo aerem, quod quidem ex eo constat, quia paulo post talis globus fere totus mercurio repleri potest; sed etiam immensa pondera movere queat, quemadmodum inventum PAPINI *Act. Erud. Lips.* 1690. & aliæ id imitantes machinæ docent. Calculo enim posito innotuit quod gutta aquæ, mutata in flatum

occupet locum 14000 vicibus majorem priori, & forte amplius adhuc extendi potest. vid. Cel. MVSCHENBROECK l. c. §. 729. qui tamen immanis flatus accedente frigore facile in priorem molem constringitur, unde clarum est *vaporem aquæ admodum elasticum esse, & elasticitate anteire omnia corpora nota.* Et forsam majora præstare posset, si majorem ignis gradum commode applicari liceret, ut ex pulcherrima observatione ill. ELLERI patet in monum. Acad. Reg. Berol. 1750, quod scilicet opifices vitrarii, si amplissimas chemicorum ampullas per tubum ferreum inflando formant, ne ad tantam expansionis molem spiritus deficiat, os suum aqua replere soleant, eamque cum spiritu inflent. Aqua enim hæc in tanto calore, qui est vitri fusi, in elasticos convertitur vapores, *nec in aquæ formam deinde redit.*

§. X.

Quod eo magis mirum, quia *aqua ipsa, quamdiu aquæ formam servat, omni caret elasticitate.* Quod non modo ARISTOTELES agnovit, dum aquæ *frigus, sive statum non elasticum* tanquam qualitatem aliquam primariam adsignat, *aqua, inquit, haud quaquam mollis (vel compressibilis) est, quippe cujus pars summa compressione minime introcedat, sed circum obsistat.* de meteor. L. 4. c. 4. sed etiam per celeberrima experimenta FLORENTINA, quando scilicet globus metallicus aqua plenus mallei ictum aut torcula-

cularis pressione non sustinet, potiusque per subtilissimos metalli poros guttulas transmittit roridas aquæ, extra omnem ponitur dubitationem. Nam quod BOYLIO solertissimo non successit experimentum, nihil probat, postquam BOERHAVIVS erroris & mali successus causas in BOYLIANO experimento indicavit in *Elem. Chem. cap. de aqua*.

§. XI.

Huic autem aquæ *statui non elastico* hinc inde se opposuit incomparabilis Chemicus, GEORG. ERNEST. STAHL, aquæ non modo aliquam, sed etiam summam omnino adscribens elasticitatem, ita ut inter inventa STAHLIANA passim recenseatur hæc *elastica qualitas aquæ*, vid. Cel. IVNCKERI *Consp. Chem. Tab. I. p. 33*. Quando igitur sub elasticitatis hoc titulo non alia intelligitur qualitas præter eam, quod aqua per ignem in vapores elasticos aëri similes expandatur, non video, quomodo hæc a STAHLIO inventa dici queat, quæ ante VITRUVIVM nota fuit, imo certissime ad scientias antediluvianas referri potest & in plurimis Physicorum compendiis ex *italis & anglicis* accuratis observationibus toties repetita exitat. Atque profecto cuncta exempla quæ B. STAHLIVS proponit v. g. de bombarda loco pulveris pyrii aquis onusta, de ipsa pulveris pyrii actione ex aqueis particulis in nitro præsentibus derivanda &c. nil aliud indicant, nisi *aquam in flatibus elasticos* per calorem resolvi posse, ipsius au-

tem aquæ, quamdiu aqueam formam retinet, elasticitatem minime probant. Nimis autem ego æstimo & veneror STAHLII sapientiam, quam ut in tam vulgari cognitione gloriam inventionis quæfiverit, potiusque crediderim aliam ipsi de possibili aquarum elasticitate notam fuisse reperitam, quam non satis in scriptis patefecit.

§. XII.

Illustrior & universæ rei physicæ maxime salutaris fuit inventio *Cel. AMONTONS monum. Ac. R. Par. 1702. aquam videlicet simplicem atque puram ebullientem certum aliquem atque determinatum assumere caloris gradum*, qui nec augetur a majori igne supposito aut diutius continuato, nec minuitur ab ignis decremento, modo ebullitionis motus continetur. Habemus enim in eo gradu fixam aliquam caloris mensuram, ad cujus normam omnem cujuscunque corporis calorem licet metiri. Vix enim dici potest quantum ex hac unica observatione lumen accensum fuerit non modo physicæ generali in thermometris conficiendis & æquandis, deinde in determinando gradu caloris, quo plantæ crescunt & animalia generantur, tum in fermentationis & effervescentiæ theoria, sed etiam quam distinctæ medicis idææ natæ fuerint in diversis calorum morbosorum corporis humani gradibus mensurandis, ut recte HERMANNVS BOERHAVE hanc observationem propter amplis-

plissimum, quem largitur & promittit usum, pro una ex primariis hujus seculi haberi velit. Neque existimandum est ejus experientiæ laudi aliquid decedere per emendationem FARENHEITIANAM, quin potius illa corroboratur & ad majorem certitudinis evehitur evidentiam, postquam *Clar.* FARENHEIT detexit pro diversitate ponderis athmosphæræ paulo plus vel minus incallescere aquam ebullientem. Hanc legis enim varietatem ex Barometro facile definimus, nec mirabile aut ei legi contrarium videbitur, quod per PAPINI machinam *plumbum stannumque* in mediis undis liquefcere possint, quando consideramus, in PAPINIANA olla conclusum aerem ab ignis actione maxima donari elasticitate, quæ ponderi plurium athmosphærarum sibi impositarum viribus par sit.

§. XIII.

Aqua calori exposita exhalat, sensimque diffatur, igitur evaporando minuit molem. Mutata enim in vapores elasticos, hi leves facti adscendunt ad superiora athmosphæræ. Inde nubes & nebulæ. Sed quomodo id fiat, diligenter a philosophis disputatum est, hoc seculo præcipue quo celebris quæstio de fontium & fluviorum ex vaporibus & pluviis origine acrius agitari cœpit. Scopus meus omnino vetat ample recensere quæ a doctissimis viris super his cogitata fuere. LEIBNITIANA hypothesis, aquam scilicet exhalan-

lantem in minimas mutari *bullas aëre calido, elastico, expanso plenas*, & ex hujus aeris inclusi minori gravitate super graviolem athmosphæram illas attolli & in ea natâre, diu habuit principatum ut prope ab omnibus crederetur, donec invictis argumentis demonstratum est non suffenam hypothesin esse explicandis phænomenis. Igitur emendare illam conati sunt, si *aeri* in his bullulis supposito alium quendam *æthereum spiritum* substituerent, eique munus aquam extendendi & super athmosphæram pellendi injungerent, cui sententiæ præprimis favet ill. ELLERVS, l. c. & Cl. KRATZENSTEIN. CohæSIONEM aquearum particularum cum aere in subsidium vocat *Cel.* HAMBERGERVS remque totam ex *theoria solutionum* exponere non infeliciter tentat, aquam scilicet ab aere solvi ut sal ab aqua. Ab aliis sola propulsio globulorum aqueorum ab igne versus superiora conante defentitur. Hæ omnes hypotheses videntur aliquid veri habere, & singulares nec temnendas experientias suæ quilibet causæ prætendit. Tamen, ut verum fatear, postquam recentissima de his scripra curate perlegi, manifestum fuit non valde multa experimenta circa hanc rem instituta, nec ea satis variata fuisse ut de eventu satis tuto concluderetur. Exhalationem enim aquæ in *spatio aeris vacuo* quæ maximi ad intellectum causæ momenti est, a nonnullis negatam, ab aliis affirmatam video, nunc vero non amplius dubitare debemus in ipso *spatio vacuo* aquam evaporari, postquam
no-

novissimis curis sollicitè rem examinavit Cel. KRAEFFTIVS. In vasibus ejusdem latitudinis, sed inæqualis profunditatis *plus ex profundo quam ex humili* in eodem caloris gradu evaporari post DERHAMVM plurimi observasse se profitentur, negat autem expertus Cel. KVHNIVS tr. *de orig. fontium* §. 103. Aquam calefactam minus exspirare quam frigidam certum est in quibusdam circumstantiis, interea communis experientia quotidie docet in siccandis linteis & in spissandis solutionibus calorem fortiolem juvare exhalationem. Quare gradus evaporationis non videtur sequi legem graduum caloris, igitur accuratius illa lex per experimenta debet determinari.

§. XIV.

Aquam aliquando per ignem in terram fixam converti, est altera pars hypotheseos *aristotelicæ*, quam postquam diu explosa erat, revocavit incomparabilis BOYLIVS, & advocat experientiam testem *vid. tr. de orig. form. Exp. IX.* cui similis alia experientia recensetur apud BORRICHIVM de *Herm. Sap. c. 7.* ubi etiam ad multiscium EDMUNDVM DICKINSON provocatur. His autem omnibus audacter contradicit incomparabilis HERM. BOERHAVE. Denuo confirmavit experimentum BOYLIANVM ill. ELLERVS in monum. Acad. R. Ber. etli alio tentaminis genere. Quomodo HELMONTIVS plantarum solidas partes & incrementa ex sola aqua fieri demonstraverit, &

& quid & qua fortuna responderit Woodwardus, pluresque eum secuti viri, ea nota sunt, & paulisper a nobis relinquenda, quoniam hanc litem inferius iterum attingere decrevi. Nunc ostendam prius aquæ fixitatem in igne pro diverso ignis gradu diversum esse, nec volatilitatem ejus cum gradibus ignis æquo metro crescere aut decrescere, speroque si nil aliud certe simplicitatem & novitatem veri experimenti esse placituram.

DE FIXITATE AQVÆ DIVERSA IN IGNE.

§. XV.

1) *Cochlear ferreum* cujuscunque magnitudinis bene intus politum & a ferrugine & sordibus purum igniatur super prunas ardentes, donec lucide candescat. Remoto a carbonibus huic ita candenti cochleari immitte per tubulum vitreum commodæ longitudinis, cujus alteruter finis in angustissimum capillarem canalem exeat, *gut- tam unam aquæ purissimæ destillatæ*. Erat autem aqua qua sum maxime usus tam pura, quam per destillationem fieri potest, crystallos mercurii nitrosas sine colore totas dissolvebat, nec mercurium ullo modo præcipitabat, nec turbabatur ab alcalicis, præterea eandem aquam qua maxime sum usus, nunc per 6 & quod excurrit annos, in lagena servo, nec ullam ullius turbationis toto eo tempore dedit notam. Interea etiam com-
mu-

munem aquam non destillatam assumere licet cum simili fere eventu. Talem tubulum vero, qualem mox descripsi adhibere fas est propterea ut una guttula alteri semper æqualis ex parvulo foraminulo excidat, nec varians guttularum magnitudo varietatem experientiæ faciat. Hæc guttula igitur quamprimum super candens ferrum cadit, in aliquod minores globulos dividitur, qui tamen paulo post in unum globulum majorem rursus colliguntur. In puncto temporis, dum gutta ferrum candens attingit, illa sphaerica fit, nec adhæret cochleari, ut aqua facere solet quæ ferrum aliud frigidius contingit. Tamen in primo contactus momento ferrum candens circum guttulam fit nigrum, imo nigerimum, in spatio eo majori, quo candidius est ferrum, quasi materia lucis & ignis ex ferro candenti subito in aquam raperetur.

2) Si tunc immotum perstat cochlear, hic globulus aqueus *quietus & sine omni visibili motu jacebit, sine omni ebullitione, pellucidissimus* instar globuli crystallini, semper *sphaericus*, cochleari *nullibi adhærens*, sed in uno illud contingens puncto. Etsi autem visibilis in guttâ purâ motus non est, tamen celerrimo gaudet vertiginis motu, qui visitur quando pulvillus coloratus, v. g. carbonis nigri aliquando ad guttam adhæret, hic enim circa guttulam mira velocitate volvitur, idemque spectaculum exhibet quod guttula argenti super cupellam, quæ quamdiu

diu particulis lithargyrii inquinata est, harum rapidissimo verticillari motu suam propriam gyrationem testatur, donec ab illis penitus repurgata amœnissimum illud consuetum fulgur edat. Si enim Astronomus ex macularum solis motu ipsam solis circa axim gyrationem recte concludit, etiam Chemico licebit ex similibus phænomenis, similem ducere consequentiam. Porro autem hæc guttula non nisi *lentissime* exhalat, ita, ut si ad pendulum minuta secunda suis oscillationibus indicans advertas, ad minimum 34 vel 35 *minuta secunda*, i. e. ultra dimidium minutum horæ excurrat, antequam tota gutta disparuit, quæ tandem valde imminuta ut vix amplius videri queat, cum *sensibili crepitu*, quam auris facile distinguit, suam præsentiam finit, & in cochleari parvulam particulam *terræ* relinquit.

3) Interea dum hæc fiunt, cochlear candens desit candere & redit ad frigoris majorem gradum, quamprimum igitur prima gutta disparuit, mox per eundem tubulum vitreum *aliam priori similem* guttam eidem cochleari immitte, quæ cum similibus phænomenis disparebit *intra 9 vel 10 minuta secunda*. Hæc tamen differentia est, quod altera hæc guttula in plures quam prior globulos casu suo dividatur, qui difficilius in unum globulum redeunt, sed hinc inde moventur & quasi *tripudiantes* aliquem *sibilum* suo motu in cochleari pariunt,

4) Dum

4) Dum interea magis refrigeratur ferrum, post evanescentem guttam secundam, protinus immitte *tertiam*, quæ cum *magno motu globulorum*, majori certe quam ut ebullitio vocari posset, disparebit intra 3 *min. sec. spatium*. De hac secunda & tertia guttula *nil* unquam *solidæ, terrestres materiei* relinqui observavi ut de gutta priori, nisi manifesta in cochleari impuritas esset.

5) Si tum *quartam guttulam* iisdem cautelis injicias, hæc non amplius in globulum rotundatur, sed adhæret cochleari, *maculamque madidam* in illo facit, & cum *sibilo* in verum *ebullitionis* motum exsurgit, itaque *spumescens* in auras abit citissime intra *unius minuti secundi spatium*, vel & velocius, *nihilque terræ aut solidæ materiei* relinquit quod ullo modo sensibile esset.

6) Si posthac *quintam, sextam, septimam* & plures guttulas eidem cochleari nunc satis frigefacto, ut digitis illæsis tangi possit, successive immittis, patebit oculis, quod quo frigidius cochlear, eo *majorem maculam madidam* gutta cadens adfricet cochleari, eoque diutius adhæreat, antequam evaporetur.

7) Si loco unius guttulæ in cochlear bene candens plures guttulas, v. g. sex, septem, octo, decem simul immittis, etiam fit globus, sed non perfectus, superius depressus, pellucidissimus tamen, & non minus ac unica guttula lente ex-

C

spi-

spirans sine omni ebullitionis motu, ita ut decem guttulæ aliquando per duo & amplius minuta prima in igne persistent, & portionem terræ relinquant, præsertim si cochlear ita super igne detinetur, ut non nimis cito refrigescat.

8) In eundem usum comparavi phialam ex aurichalco, profundam, cujus fundus segmentum sphaeræ esset, tornando intus politam, quæ si super ardentes carbones bene candefiebat, simili modo, ut cochlear ferreum guttulas aquæ adfecit.

9) Si vas ferreum vel cupreum non purum, sed ferrugine inquinatum est, experientia vel non, vel non accurate succedit, quia ærugo & ferrugo fixitatem aquæ impedit, ut ex posterioribus patebit. Si vas hoc metallicum forte non satis purum sit, id, si igniatur, & paulo major quantitas aquæ, v. g. guttæ decem & plures simul infundantur, omnis impuritas a motu hujus aquæ cito abraditur, ut postea experimentum sine turba suscipi queat.

10) Frustulum glaciei celeriter in candente ferro solvitur, & tum similia phænomena ut aqua simplex exhibet.

§. XVI.

Ex hac observatione varia intelliguntur. *Pri-*
mo certum fit, quod *ignis volatilitatem conciliet*
aquæ,

aquæ, sed passibus non æquis. Nam initio cum gradibus caloris etiam crescit copia exhalationis, donec ad certum punctum pervenimus, scilicet ad illud in quo aqua ebullit. Nam quo magis calor decrescit infra illud punctum in qua aqua ebullire solet, eo diutius gutta aquæ in eo persistat, vel, quod idem est, eo lentius evaporatur. Si tum amplius augetur ignis, aqua multo minus exspirat, & quo calidius est ferrum, & candori propius, eo diutius in eo hæret gutta, i. e. eo lentius evaporatur, ut tandem in magno calore, qualis est ferri candentis, fixa diu, & ad minimum per 34 min. secunda fiat, & ejus portiuncula diu ferat summi caloris efficaciam. Nec dubito, si in magna ferri massa, & cujus insignis crassities esset, quodque propterea non tam cito candorem amitteret, experimentum instituere, quod fiat magna tum aquæ quantitas eodem modo simul in eo talem majorem fixitatem assumere posset. In magnis autem massis rem tentare defuit occasio. *Secundo* apparet gradum ignis, quo maxime omnium evaporatur aqua, esse illum quo ebullit. *Tertio* manifestum fit ignem arcere contactum immediatum corporum, quum aqua ferrum ignitum non madefaciat, nec ei adhæreat. Ubi etiam animadvertentum quod gutta aquæ ex ambitu ferri candentis partem magnam ignis subito attrahat, ferrumque candore ad momentum privet. *Quarto* constat aquam ferventissimam sine ullo ebullitionis motu persistere, quare necesse est, vel ipso illo temporis instanti

quo gutta super candens ferrum cadit, omnem inclusum aerem subito expelli, vel, quod probabilius est, etiam aerem in tanto calore figi & elasticitatis perdere partem. Ex eo etiam capite guttula aquea in tanto igne pellucidissima manet, quum in motu ebullitionis propter copiosas bullulas perspicuitas ejus turbetur. *Quinto* ex figura sphaerica perfecta guttulæ, & ex ejus motu verticillari recte concluditur adhæSIONem particularum aquearum ad se invicem tanto igne valde augeri ut revera cohæSio aquæ ita calentis major sit quam frigidæ. At vero si *sexto* ex his observatis quis inferre conaretur aquam igne magno in terram converti, propterea quia semper post guttulæ perfectam evaporationem aliquid terrestris materiæ in vase ignito remanet, is quidem præcipitis judicii notam ex monitu BOERHAVII non effugeret, nam in tanto igne, propter atmosphæram levissimam facile omnis ex aere vicino pulvis convolare, seque guttulis ibi hærentibus insinuare potest, nisi aliæ circumstantiæ suadeant contrarium, de quibus posthac nonnulla trademus.

§. XVII.

Vt omnis fallacia evitetur, variandum est experimentum:

- 1) Si cochleari ferreo lucide candenti ex eodem tubulo vitreo guttulam *Spiritus vini medicriter rectificati* immittis, etiam hæc in globulum cry-

crystallo similem quamprimum ferri latus contingit, mutatur. Eademque, si modo a flamma carbonum vel lampadis, quæ forte adest, defenditur, etiamsi in fortissimo illo candentis ferri calore hæreat, tamen *flamman non concipit*, potius in omnibus similiter ut aqua se habet, & circiter ad 30 *min. sec.* vel & amplius in eo maximo calore fixa perstat, tandem sensim immixta cum *crepitu* dissilit & pauculum *terræ siccæ* relinquit, quæ paulo post a calore ferri *accenditur* & instar *carbonis* aut *fuliginis* per momentulum *micat*, tunc in *cineres albos* fatiscit.

2) Dum cochlear super ardentibus prunis detinetur gutta spiritus vini cadens facile flammam concipit, quia eam ex carbonibus attrahit, eamque in fundo cochlearis tum continuat, quod præcaveri potest, si eo momento quo immittitur guttula, ferrum a prunis removes, vel alia quavis ratione flammam carbonum arces. Quando autem semel flammam concepit, non desinit flammare donec omnis *verus spiritus* sit consumtus, quod in tam parva guttula cito fit. Id autem quod in hoc spiritu adhuc aquosum est, post flammæ extinctionem in fundo cochlearis remanet, & instar aquæ simplicis sat longo temporis intervallo fixatur, tandem dissilit plerumque cum crepitu quodam & evanescit.

3) Quum autem *veri alcoholis*, sive spiritus vini quem ab omni aqua superflua in altissimis

C ;

vasis

vasis vitreis magna cura repetitis cohobiis depuraveram, unam guttulam eidem candenti vasi imponerem, eamque per flammam chartulæ cominus admotæ accenderem, hoc alcohol cito in flammis penitus deflagrabat, & *aquæ residuæ ne vestigium* quidem relinquebat. Idem vero alcohol si ab inflammatione præcavebatur, instar aquæ communis sub globuli pellucidissimi figura diu resistebat ignis actioni. Si octo, decem, vel plures guttulæ simul cochleari induntur, similiter se gerunt, sed tum vix ab inflammatione defendi queunt.

§. XVIII.

In his phænomenis spiritus vini non inteligo, cur gutta ejus in ferreo cochleari valde ignito, & in athmosphæra calidissima flammam non sponte concipiat, quum tamen ab alio flammante corpore facillime inflammetur. Nam aëris defectum solum non esse in culpa, vel eo ipso liquet, quia in eadem athmosphæra flammam alit, si hæc prius per aliam flammam excitata fuit. Disco autem ex hoc phænomeno quod calor maximus spiritum vini non destruat, nec in sua principia convertat, nisi flamma accedit. Per flammam enim spiritus in aquam converti potest, ut post alios legi potest in BOERHAVII Chemia. Quare non mirum si spiritus vini ex æolipila fumans adhuc incendi potest, ideoque a spiritu vini ad aquam non rite concluditur,

ditur, quod supra monui, contra ill. WOLFIVM (§. 7.) Quoties guttulam spiritus vini sic in candente ferro *sine inflammatione* cremavi, semper portiuncula terræ remansit, sed hæc portiuncula phlogiston fixum continet, quare quamprimum omne liquidum exhalavit, instar fuliginis vel carbonis per momentum micat, tum in albos cineres mutatur. Quando e contra guttam aquæ puræ simili modo tractavi, remansit portiuncula terræ, sed quæ non incendebatur, ideoque nullum phlogiston continebat. Fateor tamen, aliquoties (licet raro) etiam in aquæ guttulis id mihi contigisse, ut portiuncula terræ relicta micaret, putavi autem an forte de pulvere crabonum ligneorum, super quibus vas ferreum detinebatur, pauculum in aquam involaverit, quod postea talem micationem præstare potuerit. Forte tamen alia causa subest, quam nescio, quare nihil ex hoc phænomeno concludo, quod fieri posset, si de experientia continuâ essem certus.

§. XIX.

Exhibeo hic methodum novam qua *perfectissima bonitas alcoholis vinosi* examinari potest. Sciunt intelligentes notam talem vel characterem summæ bonitatis in alcohole huc usque desiderari, quæ non modo in thermometrorum praxi, verum etiam in chemicis solutionibus dijudicandis maximæ est utilitatis. Com-

munis illa qua Pharmacopolæ utuntur methodus pulverem pyrium ope spiritus vini incendendi tantis ac tam notis laborat vitiis, ut opus non sit illius hic suscipere confutationem. Celeber autem Parisiensium Chemicus, GOTHOFREDVS junior in monum. Ac. R. P. 1718. modum describit laudabilem omnino, quo quantitatem aquæ superfluæ Spiritus vini metiri liceat, conflagrando videlicet illum in angusto cylindrico vase, aquæ frigidæ imposito, aqua enim post finitam flammam residua in cylindrico vase facilius quam in ullo alio poterit ad mensuram reduci. Nec tamen hac etiam ratione accuratissime proportio determinatur, etsi concedam quod in communi praxi ejus methodus plerumque sufficiat. Spiritus enim vini flammans calefacit aquam illi permixtam, & ipso hoc calore permagnam illius partem cogit ad exhalationem. Reliqua vero Cel. GOTHOFREDI ratiocinia, in eo commentario proposita, mea non facio, si putat etiam alcohol purissimum adhuc dimidiam partem aquosum esse, quia si tale alcohol in lampade tenui flamma lentissime ardet, ex ejus vapore aqua colligi potest. Alcohol enim dum inflammatur, non depuratur, sed vere destruitur, & in sua principia mixtionis, aquam & phlogiston purum resolvitur. Igitur per flammam aqua non ex spiritu extrahitur, sed spiritus totus fere in aquam mutatur & convertitur, uti jam monui. (§. 18) Similiter comparatum est alterum ejus argumentum, quando calcem

vivam spiritui destillando addere præcipit, ad portionem ejus aquosam superfluam demonstradam, quoniam calx viva itidem spiritum vini pro parte quidem depurat, sed pro majori parte destruit. Igitur ut certi simus nullam in spiritu vini superfluam aquam hære, necessum est ita rem disponere, ut ipso illo tempore quo avolat Spiritus, aqua figatur & impediatur ejus evaporatio. Id autem fit eo caloris gradu quem habet ferrum lucide candens. Si enim in spiritu vini, vel paucula immixta est aqua, hæc post conflagrationem prioris peractam sub parvuli pellucidi globuli forma in cochleari candente satis diu satisque evidenter hærebit aut movebitur ut observari possit. *Purus autem spiritus* ita deflagrabit ut *nihil aquæ remaneat*. Qua de re ut certus sis spiritum vini esse verum alcohol, *ejus guttulam candenti ferreo vasi infusam inflammare oportet, si enim post flammam desinentem nil aquæ remanet, ille quidem spiritus optimus est, nec ulterioris depurationis capax*. Talisque Spiritus in conficiendo thermometro REAUMURIANO encheiresin faciliorem, & in judicandis corporum solutionibus certius facit judicium.

§. XX.

Simile quid in aliis etiam & magis compositis spirituosis liquoribus eadem methodo tractatis accidit. *Spiritus v. g. Salis ammoniaci cum Spiritu Vini paratus, si ejus guttula candenti*

denti ferreo vasi imponitur, per se quidem, modo flamma externa quælibet arceatur, non inflammatur, sed multum spumescens magnus quasi fit globus ex bullis tenacibus constans molemque prioris guttulæ aliquot centenis vicibus superans. Quando autem admotâ flammâ lacinia chartaceæ accenditur ea guttula, ardet ea quidem ut spiritus vini, post finitam vero flammam relinquit pellucidissimam aquæ guttulam diu in igne fixam. Porro si spiritum Salis ammoniaci urinosum cum calce viva & aqua paratum simili modo tractas, hic quidem nunquam flammam concipit, sed spumescens tamen & maximas bullas formans, postquam hæ evanuerunt, particulam aquæ diuturno calori resistantem in vase relinquit. In pluribus aliis salinis liquoribus similia tentavi, paucisque mutatis eadem phænomena vidi, in quibus recensendis non ero longus, quia nihil nunc docendum est, nisi quod ad aquæ simplicis naturam cognoscendam conferre valet.

§. XXI.

Guttula olei olivarum vel cujuscunque alterius oleosæ pinguis materiæ si candentissimo cochleari ferreo immittitur, nunquam illa in globum rotundatur, sed late adhæret ferro candenti, illud quasi madefacit, incenditur momento temporis, etiam sine flammâ externâ admotâ, flammam eructat & fumum densum, quo paulo post evanescente linquit in candente vase

nigrum copiosum carbonem, qui postquam instar prunæ rutilavit, copiosam albam favillam vere terrestrem exhibet.

§. XXII.

Aqua in calore candentis ferri non ebullit, (§. XV. num. 1.) vel, quod idem est, aer egrediens bullas non format. Non nisi duplex hujus phænomeni ratio possibilis est, namque *vel aer aquæ inclusus non egreditur, vel si exit, aufugit insensibiliter.* In *priori casu* necessum est etiam aerem simul cum aqua per ignem vehementem quodammodo *figi*. In *posteriori* oportet *visciditatem* aquæ sic in illo calore *imminui* ut in bullam extendi nequeat. Vtrum hic verum sit, sequens experientia ostendit: si guttulæ aquæ in igneo candentis ferri calore sine omni ebullitionis motu hærenti adplicas corpus frigidum, v. g. ferreum baculum, aut si lapillum frigidum ei admoves, vel etiam si guttam aqueam ex candente ferro subito in vas aliud minus calidum effundis, hæc subito ebulliet, & sub ebulliente stridore cito in auras evanescet. Vnde constat *aquam in magno calore exustam suum aerem non dimittere, sed eum retinere, ut posthac, si calor imminuitur, adhuc dimitti queat, igitur in magno calore aerem in interstitiis aquæ hærentem simul cum aqua fixiorem reddi.*

§. XXIII.

§. XXIII.

Constat etiam in magno ferri candentis calore non omnem liquorem sed solam aquam simplicem, & aerem fixiorem fieri. Spiritus enim vini cito diffatur, imo inflammabilitatis compos est, portione aquea relicta, (§. XVII.) Spiritus salis ammoniaci tam vinosus quam urinosus expanditur, inflatur, pro re nata inflammatur, cito evaporatur, aquam vero contentam fixiorem ex sese dimittit (§. XX.) Oleum olivarum ab inflammatione præcaveri nequit, non mutatur in globum, attrahitur a candenti ferro, mutatur in carbonem citissime & in cineres. (§. XXI.) Sola aqua simplex, aut id quod in aliis liquoribus adhuc aquosum non mixtum hæret, a tali igne in globum rotundatur, non ebullit, pellucet & pro paucitate materiæ diutissime fixum hæret. Eadem aqua ibi figit aerem inclusum. Nam ab aqua id fieri, potius quam ab ignis vehementia, exinde patet, quia Spiritus salis ammoniaci in tali calore suum contentum aerem non figit, sed summam ejus expansionem in amplissimas bullas permittit. (§. XX.) Aerem autem figi aliquando posse concludimus quia mineralia quædam, calces videlicet lapideas, dein lateres excoctos, porro minium ex plumbo diuturno igne solidatum, tum calcem antimonii, similiaque forte plura igne fieri absolute graviora scimus, quod pondus acquisitum ex aeris fixati admistione deduci potest per experimenta Halesiana in Stat. Veget.

§. XXIV.

§. XXIV.

Postquam ergo satis ostensum est aquam leni calore volatilem reddi ac in elasticos expandi vapores, eamque volatilitatem augeri cum gradibus caloris, donec ad illud pervenerit punctum in quo aqua ebullit, omniumque citissime evaporatur; tum vero, si fortior urget calor, eandem aquæ volatilitatem imminui, potiusque fixitatem ejus tum crescere cum aucto calore; opus nunc erit respondere ad verosimilem objectionem, quæ omnem illam observationem evertere possit, scilicet *in magno calore aquam minus evaporari non quia ipsa fixior reddatur, sed quoniam in tanto calore propter aerem expulsum, athmosphæra levior facta exhalantis aquæ particulas in auras attollere nequeat.* Est enim lex certa *hydrostatica*, corpus specificè levius in fluido specificè graviori eo majori celeritate atque vi ascendere quo majoris inæqualitatis proportio inter pondus fluidi & ascendentis corporis habetur. Quam ob rem videri omnino posset aquam in athmosphæra per calorem valde rarefacta minus celeriter evaporari debere. At vero evidens a me fiet nihili hanc objectionem in casu præsentis valere. Namque 1) satis demonstratum est a Cel. HAMBERGERO Phys. §. 477. exhalationem vaporum secundum hydrostaticas leges nullo modo fieri. 2) Nondum indagavimus ad quem gradum Athmosphæra in candentis ferri calore sicco rarefieri queat; 3) in eodem ignis gradu Mercurius exhalat, multo gravior quam

quam aqua; 4) flamma in eo gradu ignis excitari potest, ut de spiritu vini vidimus (§. XVII. num. 2.) ac de spiritu salis ammoniaci (§. XX.) & de oleo (§. XIX.) ubi autem flamma, ibi sufficiens aer adsit necesse est. §) Indicatum est supra (§. XIII.) aquam in ipso vacuo BOYLIANO exspirare. Et quidem Cel. KRAFFTIVS observat inter exhalationes aquæ in libero aere & in vacuo ratione quantitatis dato tempore vix ullam differentiam esse. Si ergo aqua in loco ab aere vacuo & frigidus satis cito exhalat, non video cur non æque cito in aere libero etsi rariori & calefacto adscendere queat. Quæ allatæ rationes etiam si ita diluant factam oppositionem, ut nulla ei verisimilitudo supersit, tamen ut omnem penitus extirparem excusationis radicem, aliud experimentum excogitavi, unde certo probatur aquæ guttam in ferri candentis calore non propter athmosphæræ defectum sed ex actione ignis fixiorem fieri. Scilicet

Vasi vel cochleari ferreo lucide candenti imponatur frustulum plumbi vel stanni, quod quidem ibi cito liquefcit atque funditur. Huic liquefacto plumbi aut stanni metallo per tubulum vitreum supra descriptum guttulam aquæ simplicis prudenter impone ne a superficie metalli convexa decidat, videbis hanc guttulam, super plumbo hærentem dissipari intra 6 vel 7 minuta secunda, quæ si juxta plumbum in fundo cochlearis ferrei, ideoque in eadem athmosphæra jacuisset,
ultra

ultra 34 min. *secunda* quievisset. Etiam si aliam placet guttulam aquæ in illo candente vase ita ponere ut juxta plumbum, non super illo hæreat, observabis, eam, si levi aliquando motu latus plumbi contigit, sibilum aliquem edere, quasi ad frigidum aliquod allidatur corpus, multoque tum citius quam si plumbum non attingit, avolare. Atqui vero, certissimum est, & nemo naturalium rerum peritus nescit, *plumbi fusi calorem multo esse minorem quam candentis ferri*, quare plumbum fustum respectu ferri candentis pro corpore frigido haberi debet. Et super hoc corpore frigido vel mediocriter calido, gutta aquæ citius exhalat, quam si super ipsum fuerit posita ferrum candens, quum tamen atmosphæræ ratio utrinque fuerit perfectissime æqualis, ergo *raritas atmosphæræ non est causa majoris fixitatis aquæ in igne majori*.

§. XXV.

Audeo igitur Physices & Chemiæ cultoribus novum hic proponere THERMOMETRON, quod in dijudicandis majoribus caloris gradibus æque certum fieri poterit, quam vulgare thermometron in gradibus dimetiendis minoribus. Notum est enim quod quibus hætenus usi sumus thermometra gradum caloris indicent per *gradus expansionis quam patitur liquor inclusus*. Constat porro quod liquor omnis quamprimum in motum ebullitionis intenditur ejus calor, adeo
expan-

expandatur subito ut ejus expansionis gradus amplius mensurari nequeat. Qua de re, quum *aqua & spiritus vini* levi igne ebulliant, ideoque magnos gradus caloris dimetiri non possint, iis commode substitutus est *mercurius*, qui multo majorem fert ignem antequam ebulliat. At vero etiam mercurius nimis adhuc fugax est, quam ut ex ejus moderata expansione calores metallorum & salium fusorum expiscari queamus. Igitur in ejus locum aliud instrumentum substituit Cel. MVSCHENBROECK, quod *pyrometrum* vocat, cujus constructio talis est, ut corpus aliquod solidum, v. c. *virga ferrea* par varios caloris gradus quoad *longitudinem extensa* hos gradus apto indice monstret. Quod quidem ingeniosissimum instrumentum maximi in rebus physicis usus esse, & inprimis inservire potest, ut reliqua thermometrorum genera ex hoc tanquam thermometro universali possint commensurari, aptaque & conveniens graduum scala adsignari singulis. Vbi autem metallorum aut salium in vasis ignitorum aut fusorum diversus calor metiendus est, propter structuram id *pyrometrum* difficulter applicatur, in quibus casibus ea quam propono methodus maxime idonea reperietur.

§. XXVI.

1) Scilicet fiat Vas ferreum calidum eousque ut gradum caloris aquæ bullientis habeat, huic guttula parva aquæ immissa ebullit & penitus

avo-

avolat intra *minutum unum secundum*, vel & citius. Hic esto infimus & primus constansque caloris dimetiendi gradus.

2) Fundatur plumbum in tigillo, quo major ejus moles est, eo melius, huic infunde guttulam aqueam puram æqualis magnitudinis ut ante, hæc non ebulliet, sed evaporabitur intra *6 vel 7 minuta secunda*.

3) Vrgeatur plumbum eo calore ut bulliat, (treiben vocant germani) aquæ gutta immissa non avolabit nisi post *14 minuta secunda* aut amplius.

4) Candescat ferrum ut totum lucidum sit, gutta aquea in illo morabitur per *30 min. secunda*.

5) Si tum urges ferrum in furno anemio maximo igne, similis guttula fixa erit per *34 vel 35 min. sec.* Et in eo gradu caloris ferrum persistat usque ad fusionem. Nam si per plures etiam horas vasculum ferreum in eodem summo calore detineas, ita ut tandem fusioni proximum sit, tamen aqua fixior in eo fieri non poterit, nisi ut ad summum *35 min. secundis* moretur.

6) Si eidem ferreo vasi summe candefacto fusioni propinquo imponis *unum granum mercurii*, hic avolat circiter intra minuta secunda *18*. Guttularum autem aquearum quibus ego

utebar, *tres æquant duo grana.* Duæ tertiæ. igitur grani mercurii avolassent intra *minuta duodecim secunda.* Est igitur in illo ignis gradu fixitas aquæ ad fixitatem mercurii, ut 35 ad 12 vel ut 3 ad 1 quam proxime. Quod satis mirabile. Nam a priori, ut ajunt, nemo facile fuisset divinatus, fieri posse ut in libero aere gutta aquæ simplicissimæ, sine omni mistura, sola ignis actione accedente, unquam sit ter fixior futura quam æqualis mercurii quantitas.

Atque secundum hanc methodum plura metallorum, terrarum, salium, mineralium corpora quoad gradus caloris indagari poterunt. Vt enim in hætenus usitatis thermometris ex *spatio*, ita *hic* metimur ex *tempore*.

§. XXVII.

Fixitas autem aquæ non crescit in infinitum cum crescente calore. *Ferrum* enim & *cuprum* quamdiu *candent*, *figunt aquam.* Quamprimum vero fundi cœperunt, præsertim cuprum, non amplius figunt, verum potius guttulam aquæ illis commissam tanta violentia in *elásticos convertunt flatus*, ut par impetus in telluris superficie forsan non alibi inveniatur. Quam miris igitur natura gaudet conversionibus, quam pulcher omnium rerum cyclus? aqua certe quæ gradu caloris 32 *therm. FARENHEIT.* *solida & rigida* est instar vitri dum pellucidam format *glaciem*,

ciem, eadem si crescit ille calor, *solvitur non in fluorem modo*, sed in *elasticos vapores* mutatur, & volatilitate crescit usque ad gradum ejusdem thermometri 212, scilicet quando ebullit. Ab illo autem puncto *fixitas* iterum *crescit* cum gradibus caloris usque ad punctum *ferri lucide candentis*. Tum iterum ex ferro fuso fit summe volatilis atque elastica. Quis autem determinabit quid porro fieri possit? Interea ex iis quæ hætenus indagavi, patet quod in *scala calorum novum punctum fixum* poni debeat, videlicet *ferri lucide candentis*. Quum igitur hætenus non nisi tria fixa & constantia caloris puncta fuerint nota, scilicet *glaciei salsæ, congelationis naturalis, & aquæ ebullientis*, his quartus hic terminus non incommode jungi potest. Nil enim certius juvat scientias quam terminum habere constantem, ex quo ceteros possis metiri. Hoc votum ARCHIMEDIS: *da possim figere pedem*.

§. XXVIII.

Perspiciunt me non monente lectores, quod quæ prægressis binis paragraphis indicavi non nisi schema sint possibilitatis ejusmodi *thermometri*. Tabulam enim conficere quomodo plura corpora mineralia se ratione horum caloris graduum habeant, hætenus inter alios labores onum deficiens non permittit. Interim conjicio plura phænomena chemica hac methodo tentata melius explicari posse. Ita v. g. terra *argillacea* &

appra quælibet nunquam magnum calorem acquirit. Nam tigillum haſſiacum aut ſimile terreum vaſculum, ſummo igne in anemio fornace diutiſſime & lucidiſſime candefactum, tamen non valde calidum fit, & *non multo calidius quam aqua in ſtatu ebullitionis eſt*. Nam gutta aquæ tali crucibulo inſtillata minime fixatur, ſed in momento temporis vere ebullit & evaporatur. Quo phænomeno iterum id quod §. XXIV. aſſerui, quod ſcilicet fixitas aquæ major non ab athmoſphæra levitate dependeat, confirmatur. Nam ſi crucibulum haſſiacum, & vaſ ferreum eodem in igne candent, gutta tamen aquæ in illo cito ebulliens evaporatur, in hoc autem ad longum tempus figitur. Exin etiam ratio patet cur tales *terræ fundi non queant*, ſed omnem ignem perferant ſi puræ ſunt, ſcilicet quia ignem non niſi ad certum gradum attrahunt, & cur pro fundendis aliis mineralibus tam commoda ex iis inſtrumenta fabrefiant. *Silex* autem bene candefactus tanquam terra fuſibilis multo diutius guttulam aquæ figit. Porro aliquoties mihi contigit ut experimenta ſuperius deſcripta de ferro candente, in variis maſſis ferri candefacti, quas forte fortuna in negotiis œconomicis obtulerat repetere, & fixatio aquæ in illis non ſuccederet, quod mirabar, donec obſervaviſſem has maſſas ferri *ſcoriis* obductas fuiſſe, his enim malleo ſeparatis, mox ſuccedebat negotium. Quare ſcoriæ ferri cum terra communi argillacea, imo cum aqua ſimplici eundem caloris gradum aſſumunt,

nec

nec majorem. *Argentum* fufum habet calorem adhuc minorem quam ferrum candens, fed accurate nondum determino. *Salia alcalia* candentia fed nondum liquide fufa aquam inflillatam imbibunt, quare de illis per hanc methodum nil explorari poteft. Sed quamprimum *liquide fufa* funt, guttulam aquæ immiffam valde elasticam reddunt, & fere inftar cupri fufi explodunt. Quare fequitur hæc *salia in ftatu fusionis calidiffima fieri*, & patet cur ex illis fluxus dicti chemici parentur, quia fcilicet *brevi temporis fpatio* immenſum ignem attrahunt & calidiffima evadunt, ut etiam metalla ſolvere queant non propter aliam rationem quam ſolum calorem maximum. Circa *olea ebullientia* forte exceptio a regula generali ftatuenda erit, quoniam aquam infuſam cum ſummo impetu aliquando explodunt, quum tamen probabile non fit, ea cum cupro fuſo eundem habere caloris gradum. De his autem & pluribus, quæ hac methodo tentavi, adhuc ſum incertior quam ut de iis determinate ſcribere nunc liceat. Nam præter alia etiam id incommodum hic ſubeſt, quod *magnitudo guttularum aquearum* perfectiffime non ſemper haberi queat *æqualis*.

§. XXIX.

Atque dum inter hæc hætenus deſcripta aquæ in igne fortiori phænomena verſarer, ſæpius tentavi reſciſcere *an regula AMONTONIANA*

etiam in hoc statu aquæ, si per ignem evaporatione ejus imminuitur, *vera maneret*, scilicet *an aqua etsi fixior esset*, tamen *æque calida maneret*. Facile videt quilibet, quod per thermometra usitata id expiscari minime liceret quoniam eorum moles, comparata cum parvitate guttarum aquarum quæ explorandæ erant, & vicinia metalli calidissimi non permittit eorum adplicationem. Nec describam omnes methodos quas ingenium aliquando suppeditavit, ut iis ad hunc scopum uterer. Dicam solum quæ successerunt. Notum est *mercurium* in aqua coctum non avolare, etsi fortissimus administretur ignis, nisi postquam aqua illum tegens fuit evaporata. Quando igitur guttulam valde parvam mercurii vivi miscebam cum guttâ aquæ in cochleari ferreo candente, mercurius protinus in globulos infinite parvos per aquam distributus quasi solutus esse videbatur, sed postquam aqua omnis evaporata erat, mercurius adhuc in cochleari se conspiciendum præbebat, & post aquam avolabat. Quum igitur antea (§. 26. no. 6.) ostenderim, mercurium in calore ferri candentis volatiliorem esse quam aquam, idem vero quando in aqua latet, non avolat ante evaporatam hanc, videtur aqua in ipsa sua majori fixitate tamen eum gradum caloris non attingere, qui requiritur ut mercurius volatilis fiat. Videtur ergo aqua in candenti ferro fixata non multum calidior esse quam aqua ebulliens, unde concludo AMONTONIANAM Regulam etiam in hoc casu *probabiliter manere veram*.

Si-

Similiter guttulas in calore ferri candentis per aliquot minuta secunda exustas ex ferreo cochleari subito in aliud vasculum effudi, itaque repetitâ diligentia sat magnam hujus aquæ exustæ copiam collegi, ut, an ejus dotes sensibiles mutatæ essent, inquirerem. Nil autem hoc opere acquisivi nisi purissimam & pellucidissimam aquam, quæ in glaciem ut alia aqua per frigus mutabatur, salia solvebat, non attingebat olea. Imo si ex ipso cochleari calidissimo tales guttulas affunderem super varias resinas & alia corpora ab aqua non facile solubilia, nihil observavi quod non ab aquâ ebulliente poteram expectare. Vnde iterum *probabiliter* concludo, Cel. AMONTONI regulam ubique veram esse, *nec aquam nisi ad certum gradum calefieri posse*. Debeatur autem hæc mea investigatio veritati.

§. XXX.

Antequam ad secutura pergo, debeo adhuc aliud describere genus experimentorum de *aquæ communis habitu in igne forti*, quibus id inprimis intendebam investigare, *an portiuncula terræ* quæ post evaporatam guttam in cochleari candente ferreo semper manifeste remanet, an hæc inquam terrea portiuncula *ex aqua ipsa generetur, vel an aliis causis sit adscribenda*. Comparabam mihi retortulas vitreas parvas, quarum venter circiter magnitudinem ovi gallinacei habebat. In unam harum retortularum accurate

elotam & depuratam infundebam unciam unam aquæ purissimæ destillatæ, & ad orificium retortulæ applicabam excipulum aliud vitreum firmiter sine luto tamen retortulæ adaptatum, nam sine luto illud firmabam, ut vitri rupturam eo minús timendam haberem. Retortulam ita constructam immittebam in *furnum ollæ* dictum, a Cel. TEICHMEYERO descriptum in institutis chemicis, & accuratius a B. SCHVLTZIO in opusculo posthumo der Chemischen Versuche sub nomine *pallii* delineatum, ubi scilicet olla vel ferrea vel terrea hassiaca ita in furnum anemium est locata, ut ejus apertura non in summitate sed in latere furni sit, fere ut fornix docimastica in suo furno locari solet. In hanc ollam, (quæ in meo furno ex terra hassiaca est) super arenæ parvam portionem imponebam retortulam & celeriter ita firmabam ut retorta non facile posset commoveri. Antequam vero retortulam intruderem, in fornace jam instruxeram ignem, ut olla cum arena leviter calefierent. Quamprimum vero retorta recte intrusa & immobilis locata esset, imposto capitello ferreo furni subitaneum & maximum quem poteram, ignem excitabam, ut intra perbreve tempus jam olla & arena lucide candere inciperent, breviq; post etiam retortula undiquaque canderet & coruscaret. Dum ita subito increfcit ignis, bona quantitas aquæ cum impetu instar vaporis in excipulum propellitur, ubi in aquam iterum deinde condensatur. Quamprimum vero calor ad eum gradum per-

pervenit, ut jam olla & arena & retorta penitus & undiquaque candeant, tum aqua quæ in fundo retortæ adhuc jacet, quamque propter fornacis descriptam structuram oculis observare licet, sensim lentius evaporatur, & tandem valde fixa fit, ita ut ejus circiter drachma per semi horam & amplius fere sine ullo fumo aut vapore, & sine omni ebullitionis motu in eo igne persistet. Quando tunc urges ignem ut vitrum emollescere & ad fusionem propius accedere videatur, tum retorta cum magno fragore subito dissilit & in fragmenta diffinditur. Aqua sic ex fracta retorta effluens super arenam candentem, hanc cum sibilo extinguit. Fundum vero retortæ fractum si ex furno eximis & accurate consideras, non valde parvam terræ albæ portionem ibi reperiēs.

§. XXXI.

Hoc experimentum (§. 30.) aliquoties recte mihi successit; plurimis autem vicibus successu caruit, est enim difficile retortulam ita firmare, ut penitus immobilis in furno persistet. Si enim agitur aut vacillat vel paululum, tum aqua in fundo hærens fluctuat, & lateri retortæ candentis, aut ad minimum valde calefactæ adspargitur, ut hæc antequam ad plenum candorem accesserit, jam rumpatur, & spem operatoris eludat. Quare hoc experimentum tanquam imperfectum nec satis repetitum omittere

D 5

decre-

decreveram, donec de meliori & certiori methodo *aquam in vasis ignitis occlusis* tractandi cogitasset. Forte tamen id ansam dabit aliis, felicius eam rem experiendi, quamobrem id adde-
dere placuit. Videtur autem ex eo probabile quod jam superius (§. 26.) monui, aquam si majori igni quam candentis ferri committitur, v. g. cupro fuso, aut vitro fuso vel fundi incipienti, amplius fixa non manere, sed in maxime elasticos vapores, (*& forte in aerem ipsum elasticum*) commutari. Ex eodem etiam nova probabilitas accedit Regulæ AMONTONIANÆ quod scilicet aqua, etiamsi fixior tamen non calidior in tali igne fiat, quia post fractam retortam cum sibilo exstinguit arenam substratam candentem, plane ac aqua frigida aut leviter calefacta se habere posset, quare in sua natura & suo calore ne tum quidem videtur multum esse mutata. De parte fixa terrestri autem in fundo remanente inferius iterum dicendi occasio erit.

§. XXXII.

Nunc animus est ad alia divertere, & quomodo aqua, fluidissimum corpus in statum firmum convertatur, vulgatis experiētiis sed ad hunc scopum nondum adplicatis, ostendere. Post ARISTOTELEM, cujus hypothesein indicavi (§. 3.) hodie duo præprimis experimenta innovare, quibus possibilitas conversionis aquæ puræ & simplicis in firmum corpus demonstrari posse

posse fuit visum. *Alterum* est BOYLIANVM, quo si modo verum est, constat *aquam in veram terram fixam mutari frequenti destillatione*. vid. ejus tr. de orig. form. exp. 9. *Alterum* est HELMONTII qui mirabilis vir miro ingenio docuit *plantarum*, & forte animalium quoque, *partes solidas omnes ex aqua sola purissima nasci*, dum arborem salicis 5 librarum ex solius aquæ nutrimento auxit ad librarum 169 pondus. vid. tract. ejus de complex. atque mist. elemental. figment. no. 30.

§. XXXIII.

BOYLII experimentum nemini iterum ex voto successit, quoniam forte patientia defuit longo quem requirit & molesto labori ferendo, forte etiam propter BOERHAVII auctoritatem, qui illud fallaciæ incusavit, dum portionem terream singulis destillationibus relictam atomis atmosphaericis & pulveri terrestri copioso per aerem laboratorii chemici semper volitanti, vasisque & humoribus continuo adhærenti originem suam debere adfirmavit. Quæ objectio BOERHAVIANA etsi valde parum probabilitatis habet, quia tanta portio pulverum terrestrium qualis ad explicandum phaenomenon BOYLIANVM requiritur, in aere sereno nunquam volitat; tamen si hujus instantiæ veritatem aut falsitatem penitus investigare quis velit, ei suaderem, ut non in magnis vasis, sed *in parvis*, nec in copiosa aqua, verum *in parva aut mediocri ejus portione*, neque

que lento aut parvo igne, sed *maximo qui salvis vasis fieri potest calore*, destillatio instituat, ea fere methodo quam (§. 30) descripsi, sic enim propter ignem auctum major portio terræ separari, & propter parvitatem vaforum pulvis athmosphæricus melius & certius arceri potest. Mihi certe aquam ita tractanti semper aliquid albæ terræ remansit, multo etiam copiosior quam ut ex athmosphæra eam deducere liceret.

§. XXXIV.

HELMONTII autem experimentum *de incremento plantarum per solam aquam* infinitis prope vicibus repetitum semper successit, melius tamen in uno plantarum genere quam in altero. Opposuit quidem HELMONTIO alias experientias magno studio institutas Cel. WOODWARDVS, *transact. philos. angl.* anno 1699. no. 253. quibus demonstrare intendit, non ex aqua plantas crescere, sed ex ea terrea portione quæ in aquis communibus semper delitescit, quæque si modo quiete perstat, sensim deponitur *in forma floccorum viridescentium*. Quos floccos viridescentes pro vera materiâ vegetabili habet, ostenditque eo lætius ex aquis plantas nutriri, quo magis hæ hoc principio flocculento abundant, imo quamlibet plantam ex peculiari tali (*a Deo simul creata*) materia, nec omnes ex omni crescere. WOODWARDO se adjunxerunt plerique modernorum Physicorum, ut ex systematibus passim patet.

Re-

Repressit tamen ejus conatus *ill.* ELLERVS, atque in *monum. Acad. Reg. Berol.* ostendit, materiam hanc viridem flocculentam in communi aqua minime inesse, sed per radios solares demum, admisso subtilissimo phlogisto generari.

§. XXXV.

Liceat etiam in transitu animadvertere, quod WOODWARDVS dum HELMONTIVM refutat, non observaverit controversiæ statum, & confuderit inter se binas propositiones, alteram HELMONTII, qui partes vegetabiles solidas ex aqua nasci asserit, alteram BOYLII, qui ex aqua facit veram terram. WOODWARDVS enim inter materiam solidam vegetabilium & inter materiam terrestrem non distinxit. HELMONTIVS enim ipse nunquam asseruit ex aqua fieri terram, potius in eodem tractatu, quo experimentum de salice descripsit, transelementationem dictam aristotelicam copiose negat. Si igitur WOODWARDVS putat, partes vegetabilium vere terreas etiam ex terreis particulis aquæ nasci, id HELMONTIO perinde erit, quia quum in omni planta non nisi paucissima terræ quantitas est, facile concedi posset, hanc jam ante in aquis latuisse. Unde nascitur autem reliqua longa maxima pars solidorum in vegetabilibus, quæ terra non sunt, & etiam in aqua formaliter non latuere? WOODWARDVS igitur inter corpus solidum vel firmum *generaliter*, & inter corpus terrestre *specialiter* non

non distinxit. Imo si eam ipsam viridescentem materiam, quam terream vocat, & omnibus intermistam aquis putat, examinasset, facile potuisset videre eam terream non esse, sed unctuosam, vere pinguem, ideoque dum ex tali materia non terrea plantas excrescere concedit, sibi ipsi quando eas ex terra nutriri proponit, contradicere cogitur.

Quo minus hæc a se invicem distinguerentur, juvit etiam optimus BOERHAVIUS, *vir ultra meam laudem, & unus ex illis quos interest venerari, quoniam per eos apparet non vilem rem esse genus humanum.* Vt autem Europæ præceptor BOERHAVIUS fuit, facile evenit, ut magni viri non modo recte dicta, sed etiam ea quæ minus accurata proferebat, pro axiomatibus acciperentur. Inter hæc refero theorema ejus de substantia solida vegetabilium & animalium, quam solam terram purissimam esse glutine quodam conjunctam, non modo in *medicis institutionibus*, verum etiam in chemia multo molimine docuit, quàm propositionem a veritate non parum alienam esse perspicient qui cogitare velint, in animalibus junioribus sensibilem nullam terram, in senioribus paucam, & eam in ossibus solam hære, in ossibus autem per ignem crematis inque calcem conversis non ipsam fibrarum vitalium materiem, sed eam potius, quæ interstitia fibrarum vitalium replet, materiam in ipso vivente corpore mortuam & vitæ exper-
tem

tem remanere, solidas autem fibras vere vitales destrui magnitudine ignis. Ex albumine ovi, sine alia additione præter calorem, nascuntur carnes, membranæ, cartilagines, ossa, veræ solidæ partes. Quantitas terræ in uno albumine ovi quanta est? fere nulla. Nam etsi non negem ad mixtionem partium solidarum in vegetanti & animali regno aliquid terræ requiri id tamen, ut puto demonstrari posse & paucum respectu reliquorum, & magis formaliter quam materialiter ad firmitatem necessarium, & si paulum abundat, vitæ valde inimicum erit, quia elasticitate caret. Hæc autem in transitu monui ut ostenderem WOODWARDI ratiocinia HELMONTIANIS experimentis nihil detrahere.

DE AQVEIS SOLIDIS MEMBRANIS BVLLARVM.

§. XXXVI.

Nam aquam ipsam revera in corpus aliquando firmum converti posse non modo glacies, & chemicorum observata, (nam an etiam in terram abire queat, eam quæstionem nondum tango) sed imprimis ea quæ nunc de *bullis aqueis* producere animus fert, ita ponunt extra aleam dubitationis, ut etiam modus, quo aqua solidefcit, exinde non parum cognosci possit. Quum igitur ISACVS NEWTON postquam cælorum spacia

tia mensuraverat, non dedignatus est *bullam aqueam* considerare, ut ex ejus coloribus naturam solis doceret, quin bullæ phænomenis explicandis fere dimidum secundum librum optices destinavit, ego minime vereor, quæ de aquæ natura ex BVLLIS didici, magno NEWTONI exemplo excitatus, publice profiteri. Oritur autem *bullæ in omni aqua, cui aliquid pingue inest, agitata & mota*. Spuma enim super animalium liquores, vel super fertilem pluviam, si ex alto cadit vel alio modo quassatur, quid est nisi cumulus bullarum? Quis est enim qui animum non aliquando ad bullas spumescentes advertit, quæ dum non duraturam pulchritudinem monstrant, vanitatis mundanæ & fragilitatis nostræ celeberrimum symbolum esse solent. Paulo majores & constantiores fiunt bullæ, si præter pinguitudinem aliquod sal, sive *acidum*, sive *alcalicum* aquæ jungatur. Omniumque maximæ & formosissimæ fiunt ex *aqua saponata*. Bullas igitur examinaturo prius de *sapone* pauca prælibanda.

§. XXXVII.

Sapo communis conficitur ex *alcalico Sale*, *calce viva* & *pinguitudine* inter se mistis, & cum *aqua coctis* in magmatis formam. Quum per multæ Saponis species habeantur, duo tamen præprimis in usu œconomico sunt, alter *venetus* dictus, albus; alter *batavus* nominatus, viridis vel niger. Ille ex pingui vegetabili, præsertim
oleo

oleo olivarum confectus vid. RAMAZZINI *de morb. artif. Opp. p. m.* 686; *hic* ex balænarum axungia. *Ille* ad siccitatem & duritiem plerumque inspissatus; *hic* mollis, semifluidus, & non satis excoctus. Quare vilioris longe pretij hic est præ illo, non modo propter fœtentis axungiae contemptum, sed etiam quia in sapone batavo, qualis communiter venditur pene tertia pars aquæ superfluae non excoctæ hæret, quæ ut pondus auget, pretium justis de causis minuit. Quibus accedit, quod salis alcalici in *veneto* plus sit, minus in batavo nigro. Quomodo autem cunque se diversitas hæc habeat, *sapo niger dictus Batavorum bullis bene formandis aptior est.* Quod forte ex natura pinguedinis animalis pendere potest, forte etiam quia in ejus mixtione sal & adeps non nimium arcte juncta sunt, uti posthac declarabo. Quæcunque de bullis dicam, intellecta volo de talibus quæ per saponem nigrum Batavum fuere formatæ.

§. XXXVIII.

Sapo niger Batavorum, qualis in tabernis recens venditur, est 1) plerumque ejusdem gravitatis specificæ cum aqua communi puriori, nec in ea prorsus natat, nec penitus demergitur, sed massa ejus in aquam immersa, etiam ante quam soluta est, quocunque venerit, ibi hæret. Quare si eum in aquæ debita copia diluimus, sive saturata hæc solutio sit, sive dilutior, ejusdem

dem ea manet solutio gravitatis specificæ, ejusdem scilicet cum aqua communi. Oleum enim saponis levius est quam aqua, sal cum calce gravius, videnturque hæc bina sic in hoc sapone mixta, ut alterius excessus supplendo alterius defectum mediam gravitatem faciat, aquæ æqualem.

2) Proportio olei ad aquam, sal & calcem non ita semper eadem est in sapone, ut certum quid de ea dici queat. In *drachmis duabus* saponis ejus quo plerumque utebar, quas in aqua purissima solveram, adfusoque spiritu nitri oleum a sale & calce liberaveram, satis accuratâ mensura inveni axungiae foetentis gr. 50, quæ axungia initio propter sal adhuc implicatum instar coaguli lactei ad fundum præceps dabatur, post aliquot vero horarum moram a salibus se extricans ad superficiem aquæ in forma fluida ascendebat. Quumque porro ad unam partem axungiae in sapone conficiendo recipiantur tres fere partes lixivii magistralis, & una pars lixivii dilutioris, (BOERHAV. *Chem. P. II. proc. 73. no. 4.*) in una vero uncia lixivii magistralis hæreant grana 80 salis alcalici (HARTLEY *de lithontript. Steph. p. 77.* ex HALESII mensura) sequitur in duabus drachmis saponis hæreere circiter & ad summum 30 grana salis alcalici. Quumque porro in unciis quatuor lixivii magistralis non sint nisi gr. 18 calcis vivæ (HARTLEY l. c.) patet in drachma dimidia vel gr. 30 hujus salis non plus calcis inesse quam circiter $1\frac{2}{3}$ gr. Ex quibus præ-

præmissis non multum a veritate aberrabo, assumendo in duabus *drachmis saponis nigri*, vel in 120 granis haberi *axungiae* gr. 50; *Salis* gr. 30; *calcis vivæ* gr. $1\frac{2}{3}$ & *aquæ non excoctæ* ad minimum gr. 38.

3) Ut mediante hoc sapone bullæ formen-
tur, ille prius in pluri aqua est diluendus, vel
solvendus. Sufficiunt plerumque octo *aquæ par-
tes*, adversus *unam saponis*. Talem solutionem
vocabo *lixivium saponaceum*. Vnde resultat,
quum in uno grano lixivii tantum hæreat $\frac{1}{9}$ gr.
saponis, (nam octo partes sunt aquæ, nona est
saponis) quod in uno grano lixivii hujus sapo-
nacei soluta sint *axungiae* gr. $\frac{1}{108} = \frac{1}{216}$ quam
prox. *Salis alcalici* gr. $\frac{1}{36}$ *calcis viv.* gr. $\frac{1}{348}$.

4) Hæc solutio, vel lixivium saponaceum
semper quodammodo turbidum est, quamvis
aqua pluvialis vel destillata purissima assumatur,
viridescit enim, nec perfecte pellucidum fit.
Postquam per aliquot dies in quiete stetit, solet
aliquid amurcosi ad fundum præcipitari, atque
tamen lixivium inde non satis clarescit, unde
patet solutionem hanc in majoribus tantum
massulis fieri, nec intime saponem cum aqua
misceri.

5) Quin etiam lixivium hoc si lentissimo &
diuturno calore solis æstivi sensim exhalat, ante-
quam

quam penitus spiffescit, pars salis ab oleo secedit, & in superficie cuticulam salinam format, quod iterum docet imperfectam olei & salis mixturem in hoc sapone.

6. Si tali lixivio turbido modicam *spiritus vini rectificati* portiunculam adfundis, id post brevem moram *pellucidum* fit, *spiritu adjuvante mixturem*, nec amplius turbatum apparet.

7) Verum eo ipso quod lixivium mediante spiritu pellucidum evadit, *perdit virtutem formandi bullas*, aut ad minimum ita hæc immittitur, ut bulla vix extendi queat, & præprimis ut non fiat colorata. Id etiam pro parte contingit, si lixivium post sepositam aliquam amurcam (no. 4) clarescit.

Hæc mihi prius quam ad bullarum originem & naturam explicandam accederem, definienda fuerunt, ut antivertantur objectiones plures, quæ formantur facile in re qualibet non satis cognita aut determinata.

§. XXXIX.

Vt igitur ex hoc lixivio fiat bulla, *intingere modo tubulum aliquem, guttamque tubo adhærentem leni oris flatu extendere* opus est. Mox oritur ex corpore aquoso, humido, fluidissimo, non elastico, turbido, mirum visu! *membrana adhærens*

rens tubo, solida, sicca, sphaerica, tenax, elastica, initio flexilis, post rigidissima, colorata, in plures lamellas divisa, pluribusque aliis dotibus admirabilis. Omnes homines qui tam incredibilem mutationem prima vice vident, in admirationis aliquem affectum rapi solent. Leni enim oris flatu aqua in speciem glaciei mutatur vel vitri, & in corpus vere solidum abit.

§. XL.

Vt, quæ in bullis vidi, etiam alii commode videre queant, quibus placet innocentem hunc ludere ludum, describam quo apparatu fuerim usus. NEWTONVS videtur bullas quas consideravit super ipsam superficiem lixivii excitasse, nec bullas enetas a superficie lixivii removisse, ita accipiebat bullas non sphaericas sed hemisphaericas, quarum latus planum lixivio insidebat. Hanc bullam hæmisphaericam tegebat scypho pellucido vitreo, ut ab aeris injuriis maneret bulla immunis. Hac re factum est ut non omnia recte notarit NEWTONVS, quia inter bullam & lixivium intererat commercium, nec phænomena bullæ propria fatis distingui poterant ab eis quæ debebantur fluido lixivio cui bulla inhærebat. Ego ita processî: Sumsi tubulum vitreum, quales ad minora thermometra adhibentur, hujus alterum finem adduxi ad lixivium, ut propter vim adhæSIONIS gutta lixivii in tubulum ascenderet. Dein tubulum bene de-

tersum, (ne aliquid lixivii externe adhæreret) immisi in ampullam vitream sphæricam, quales pro machinis electricis adhibentur, per hujus ampullæ orificium. In hanc ampullam intrusi tubum, ita ut ille finis tubuli in quo gutta lixivii hærebat, quasi in centro ampullæ vitreæ esset, alter autem tubuli finis extra ampullam emineret, & in tali situ tubum firmabam. Firmato tubo leniter inflabam per alterum orificium tubi quod extra ampullam eminebat, ita intra ampullam vitream formabatur bulla aquea, libere a tubulo pendens, perfecte sphærica, & ab omni aeris agitatione aliisque injuriis immunis, fabulamque suam ludebat una & eadem bulla, si omnia recte instituta erant, sæpe per horam & amplius. Pelluciditas autem vitreæ ampullæ minime impedit quo minus ea videre queas, quæ describam.

§. XLI.

Pro differentia lixivii & tubi, proque flatus vehementia *bullæ magnitudo varia est*. Quo *plura sunt puncta contactus* inter tubulum & bullam, eo major quantitas lixivii adhærere potest, ergo eo major inflari bulla. Quando caput fistulæ terreæ, quas ad fumum tabaci hauriendum usurpant, lixivio intingis, potest bulla inflari *diametri octo pollicum*. Si vero tubulum vitreum tenuiorem thermometricum intingis, vix unquam *ultra duos pollices* fiet bullæ diameter. Nam et-
fi

si plus quam pro tali bulla sufficit, lixivii in tubulum sumas, tamen bulla non fit major, sed in ejus fundo lixivium superfluum colligitur in guttam quæ bullæ adhæret in ima parte, admotum autem digito avelli potest, salvâ bullâ. *Sufficit autem pro bulla, ea quantitas lixivii quæ in erecto tubulo sponte ascendere potest per vim adhæſionis.* Si tubulum vitreum, quo plerumque utebar, lixivio sic admovebam perpendiculariter, ut alter finis tubuli superficiem lixivii leviter contingeret, lixivium in eo ascendeſcit ſponte ad altitudinem 3 linearum pollicis, & ex ea quantitate si bullam inflabam, nunquam gutta in fundo adhæſit. Si autem per inclinationem tubi aliquid plus lixivii in eundem tubum admitterem, poteram ex ea quantitate bullam priori æqualem, non majorem, efficere, sed quod superfluum erat, in guttam colligebatur, a bulla inferius pendentem. *Videtur ergo bulla fieri non posse nisi ex una lixivii gutta.* Guttæ autem ipsæ quia pro diverſitate tubi, & differenti vi cohæſionis ad eum, majores minoresque eſſe poſſunt, etiam diverſitatem in magnitudine bullarum efficiunt.

§. XLII.

Lixivii portio quæ tubulum meum ad 3 lineas ſponte aſcendendo implebat, pondere æquabat $\frac{1}{4}$ grani. Id enim ſatis certo noſcere poteram, ſi totum hunc tubum ſimili lixivio imple-

pletum, & externe bene deterfum, lanci accuratæ imponebam, pondusque sic inventum, a pondere tubuli ficci abstractum dividebam per numerum partium longitudinis tubi, quarum quælibet 3 lineas æquabat. Quum igitur pollex cubicus aquæ æquiponderet 311 granis, (*lixivium enim ꝑ aquam ejusdem gravitatis specificæ suppono* §. 34. no. 1.) erit

$$311 : 1 = \frac{1}{4} : \frac{1}{1244}$$

quare $\frac{1}{4}$ grani lixivii hujus occupat molem $\frac{1}{1244}$ pollicis cubici. Hanc parvam molem poteram inflando mutare in membranam sphaericam, cujus diameter ad minimum = 2 pollicibus, (vix ultra, quin rumperetur) cujus igitur crassities valde parva. Nam assumpta ratione diametri ad peripheriam circuli ut 100 ad 314, erit *circulus* hujus sphaeræ *maximus* = $6 \times \frac{7}{5}$ pollicis; circulus autem maximus ductus in quartam partem diametri facit *aream* hujus *circuli maximi* = $3 \times \frac{7}{50}$ poll. \square . Quæ *area quadruplicata* dat superficiem totius sphaeræ = $12 \times \frac{28}{50}$ poll. \square . Inventa igitur superficie, si hæc membrana in plano extensa supponitur, poterit considerari ut cylinder, cujus altitudo est æqualis crassitie membranae. Quum igitur (*ut paulo ante ostensum est*) tota hæc membrana confecta est ex gutta, cujus moles = $\frac{1}{1244}$ poll. cub. si basis hujus cylindri ex modo dictis = $12 \times \frac{28}{50}$ poll.

poll. □, & altitudo ejusdem, i. e. crassities membranæ inveniēda vocatur x, erit

$$12x \times \frac{28x}{50} = \frac{1}{1244} \text{ poll. cub.}$$

$$\text{five } \frac{628x}{50} = \frac{1}{1244} \text{ poll. cub.}$$

$$x = \left(\frac{1}{1244} : \frac{628}{50} \right) = \frac{50}{781232}$$

$= \frac{1}{15824}$ poll. quam proxime. Erit ergo crassities membranæ in tali bulla æqualis $\frac{1}{15824}$ pollicis, quæ crassities fere coincidit cum $\frac{66}{1000000}$ in tabula NEWTONIANA. Quæ autem posthac de bullis proponam, intelligi debent de tali bulla, quæ, ex $\frac{1}{4}$ gr. lixivii extensa est in sphæram, diametri 2 poll. & cujus crassities membranulæ est $\frac{1}{15824}$. Poll.

§. XLIII.

Primum igitur quod in bulla ita nata & determinata observo, est quod lixivium sic revera in corpus *solidum* & *firmum* membranaceum sit permutatum. Id quidem ipse sensus docet, qui corpus fluidum a firmo clare distinguit. Nam si aliquando contigerit, ut plus quam pro una bulla sufficit, lixivii assumseris, hæc portio superflua inferius in guttam collecta, multum ab ipsa bulla differt, ut etiam digito avellere vel abstergere hanc guttam ab illa liceat. Quæ gutta

E s.

fi

si semel absterfa est, dein alia nova guttula in eâdem bullâ nunquam denuo colligitur, sed bulla ejusdem ad sensum ubivis crassitie manet usque ad crepaturæ tempus. NEWTON igitur, qui successionem colorum ex successiva attenuatione bullæ propter aquam successive defluentem explicuit, non recte bullam consideravit, quod etiam propter causas (§. 40.) indicatas facere non potuit. *Corpus enim solidum fluere aut defluere non potest*, neque revera bullæ partes defluunt. Competunt potius bullæ omnes solidorum corporum proprietates, quod *se ipsa finiant*, quod alios *fluidos liquores* in se *coercere*, quod earum particulae non indiscriminatim secundum *omnes regiones* a se invicem separari queant. Ut ad oculum hoc demonstrarem, cogitabam an talem bullam instar lagenæ vitreæ liquore quodam implere possem, quod tamen in tanta bullæ fragilitate difficile est, nisi per *fumum*, scilicet per eundem tubum ex quo bulla hæret, *fumus quilibet densissime & copiose inflari potest*, quod quidem ii qui fumo tabacino delectantur, commodè efficient, dum buccis haustum ex fistula tabacaria fumum per tubulum in bullam intrudunt, qui fumus per bullam minime penetrat, sed intra ejus membranas, non aliter ac si in vitro quodam inclusus esset, cœrcetur, donec bullâ forsan crepante, simul ac semel exeat. Simile quid accidit, si hyberno tempore bullam paramus, pulmonum enim exhalatio, quæ in aere frigido sub forma vaporis visibilis est, tunc in-

tra

tra bullam instar nubeculae continetur, nec per poros ejus transit. Et adspectu jucundum est, quomodo in tam tenui & plerumque egregie colorata bulla nebulae & densi vapores intus agitari queant, praesertim quia colores a NEWTONO descripti in tali per fumos inclusos opacata bulla multo illustrius reflectuntur, ut ea splendens aliquod pulcherrimum astrum referat, cujus gloria omnis perit, si ea rupta fumus olens exiens doceat quis squalor fuerit intus, & insigne splendidae hominum miseriae faciat emblemata. Si igitur non solida esset bullae membrana, fumum minime contineret, potius instar fluidorum transmitteret. Nam fumus in aquam aut fluidum corpus per tubulum aliquem intrusus, in eo fluido minime coarctetur, sed secundum hydrostaticas leges mox superiora petit, & ex fluido se extricare solet, ut modus fumum tabacinum per mediam aquam hauriendi Persarum, a Kæmpfero descriptus amoen. exot. & a quolibet imitabilis monstrat.

§. XLIV.

Est etiam *sicca* haec membrana, nec madefacit digitum siccum qui eam tangit, praesertim si non plus lixivii assumeris quam ad bullam formandam requiritur (§. 37.) Nam si abundat lixivium, ejus particulae ad latus defluentes quodammodo humectant digitum, sensimque in veram guttam humidam infra colliguntur in fundo bullae.

bullæ. Si tali bullæ ficcæ leniter & modeste adfundis guttulam aquæ, hæc super bullæ superficiem, tanquam super vitrum defluit, & intra in guttulam iterum colligitur, unde per digitum detergeri potest, imo sponte decidit si sat magna fuerit ut ejus gravitas cohæſionem cum bulla superet. Hæc aqua adfusa non miscetur membranæ, eam non solvit, nec æquabiliter ei adhæret aut crassitiem ejus auget; sed super eam delabitur, unde certum est membranam hanc vere solidum & ficcum esse corpus.

§. XLV.

Præterea non mode solida, sed etiam *elastica* est bullæ membrana, nam non modo resistit suæ expansioni, flatumque requirit ut extendatur validum, verum etiam se restituit semper in sphaericam formam, si quando ex causis externis ea figura mutata est. Nam digito, (qui ficus esse debet) fovea imprimi potest, quæ digito remoto resilit. Potest bulla motu tubi & per aerem externum agitata elongari, incurvari, angulosa fieri, comprimi, tamen se restituit semper in sphaericam formam, quamprimum causa mutans recessit.

§. XLVI.

Imprimis habet bulla *nisum perpetuum se contrahendi*. Nam si tubulus ex quo bulla libere pen-

pendet, apertus manet, (obstruitur autem facile a saliva ex ore infantis in tubum defluente) ita ut aeri externo per tubulum in bullam liberitus & reditus conservetur, ideoque pressio atmosphæræ tam in externa quam interna superficie bullæ æquabilis sit, tamen bulla *successive se contrahit, motuque accelerato* imminuitur, aerem contentum sensim per tubi orificium expellens, donec adeo contrahatur, ut evanescente illius cavitate, in guttam condensata a tubo decidat. Quod multo evidentius spectatur si *bullæ fumo quodam repleta* est, fumus enim per tubulum apertum quasi per caminum ab elastica bullæ contractione visibiliter totus *successive* expellitur.

§. XLVII.

Hæc contractilis elasticitas bullæ (§. 46.) in initio, quamdiu coloribus nondum valde splendet, *flexilitatem & tenacitatem* conjunctam habet, ut non facile rumpatur aut in partes dissiliat, quin mille modis irritari, & ubivis perforari se permittit non modo acutis sed etiam obtusis instrumentis, quibus iterum extractis bulla neutiquam destruitur, sed vulnus factum sponte & cito claudit. Quo autem bulla diutius durat, & quo clariores in ea colores apparere incipiunt, eo fit sensim *rigidior*, ut perforari amplius sine fractura non possit. Et *rigiditas* quidem hæc in iis maxime locis bullarum observatur, qui nigri sunt, ut in his nigris maculis, (a

NEW-

NEWTONO descriptis Opt. L. II. P. 1. obs. 17.) ne levissimum quidem aciculæ contactum sine subitanea ruptura ferat. Potius si bulla in his locis attingitur, cum *audibili sonitu* protinus crepat, & in infinitas infinite parvas particulas celerime disjicitur. Dissipantur autem hæ particulæ versus omnem peripheriæ ambitum, vique magna projiciuntur, ut ad tres quatuorve pedes rhenanos sæpe propulso ac deinde pluviae tenuioris instar decincentes viderim. Quod spatium qui metiri cupit, debet cameram tenebri- cosam habere, quæ ab uno radio solis per parvum foramen illustratur, in eo enim radio si bulla frangitur, poterit particularum a bulla projectarum motum & spatia oculis usurpare. Hæc est *altera species elasticitatis* in bulla, scilicet *explosiva*, quæ contractilitati ejus (§. 46.) e diametro opposita est.

§. XLVIII.

Hæc explosio bullæ (§. 47.) cum similibus omnino phænomenis contingit, ac illa mirabilis explosio quam in *lachrymis* dictis *vitreis* observamus. Nam talis lachryma ruditer malleo percussa in corpore suo non dissilit, quamprimum vero apex caudæ frangitur, mox tota bulla in nubem pulverulentam non sine impetu disjicitur. Bulla autem similiter vix crepat nisi in maculis nigris contingatur, inque omnibus aliis punctis sustinet fortio- rem impulsu.

Procedit
au-

autem hæc particularum explosio semper a centro versus ambitum. Nam si intra bullam alia bulla per intrusum a latere tubum formatur, hæc interior crepans simul exteriorem diffringit; exterior autem prius crepans interiorem minime lædit, nec ullo modo commoveret. Quod in lachrymis vitreis similiter se habet, vid. L. B. de Wolf.

§. XLIX.

Est ergo in bulla qualibet *duplex nifus*, scilicet *primus, centripetus* (§. 46.) qui præsertim in bullis nondum coloratis, aut etiam in coloratarum eis partibus quæ colorum adhuc expertes sunt, se manifestat, & in eo statu major esse videtur quam nifus oppositus. *Alter autem centrifugus*, (§. 47.) explosivus, satis vehemens, quo omnes vel minimæ particulæ a se violenter secedunt, & late disperguntur, qui in coloratis bullis, & præprimis in partibus coloratissimis, omnium maxime autem in maculis nigris residere videtur.

§. L.

Quo dilutum magis lixivium est ex quo bulla formatur, i. e. quo plus aquæ assumseris respectu saponis, *eo fortior est nifus centrifugus & explosivus*, eo enim non modo citius bulla crepat, sed etiam eo latius projiciuntur particulæ ejus. *Quo autem magis saturatum lixivium est*, i. e. quo plus saponis assumseris respectu aquæ,

eo minor est hic nifus centrifugus, ita ut talis bulla si frangitur, minime displodatur, sed rimas tantum aliquas agat, & in majoribus frustis instar telarum aranearum vel unctuosæ cujusdam membranæ a tubo decidat. E contra, *quo plus saponis inest in lixivio*, eo fortior est *nifus centripetus*, ut facillime illa se in minorem molem constringat, expellens contentum aerem; qui *nifus centripetus* multo minor, & vix observabilis est, si ratione saponis permultum aquæ admiscueris. Vnde patet, pro diversitate scopi quem habemus, materiem bullæ vario modo esse temperandam.

§. LI.

Exinde (§. 50.) concludendum est, *explosivam bullæ qualitatem ab aqua* dependere; tenacitatem vero ejus & *constrictoriam centripetam facultatem a sapone* esse, & inprimis ab oleo saponis originem ducere. Quare etiam diversitas olei diversitatem in bullarum durabilitate facere videtur, ut sapo in quo oleum animale est, constantiores & celeri explosioni minus subiectas bullas formare solet, quam ille qui ex oleo vegetabili confectus est. (§. 37.) Et intelligitur, cur lixivium saponaceum, in quo post diuturnam quietem amurca pinguedinosa ad fundum deponitur, bullas minus constantes, sed magis explosivas efficiat (§. 38. no. 4. 7.) quemadmodum & spiritus vini lixivio mistus ejus facultatem explosivam vehementer adauget (§. 38. no. 6. 7.)

6. 7.) quod ultimum phaenomenon posthac explicabo, quando adduxero quod lixivium animalium, v. g. saliva nifum explosivum imminuat, & contra nifum contractivum adaugeat.

§. LII.

Quoniam *nifus centrifugus* in iis bullæ partibus quæ *coloratæ* sunt, & præcipue in *maculis mgris* major est, quam in pellucidis & non coloratis; & contra *nifus centripetus major in pellucidis* quam in coloratis, (§. 47.) nifus autem centrifugus ab aqua pendet, centripetus ab oleo (§. 51.) sequi videtur, in membranis bullarum inter oleum & aquam fieri aliquam divisionem, atque mixtionem lixivii turbari, quam primum hoc in statum soliditatis transit. Quod ut eo manifestius appareat, liceat nunc breviter indicare *originem variegati coloris in bullæ membranis*, & cur non semper in omni bulla, nunquam in initio, & cur non in omni parte bullæ se manifestent. NEWTONVS quidem putavit ex successiva membranæ attenuatione id sequi, dum supposuit talem membranam non esse corpus solidum, sed aqueas particulas in statu fluiditatis manere, ideoque ex lege gravitatis sensim ad latera bullæ defluere, crassitiemque verticis continuo imminuere, ex eaque diversa crassitie diversum ordinem radiorum refringendorum & reflectendorum sequi, L. II. Opt. P. I. Obs. 17. 18. seqq. In quibus si contradicere videar viro

F

sum-

summo, cogitet velim lector me propter alium plane scopum considerasse bullas; NEWTONVM crassitiem bullæ non reapte mensurasse, sed tantum ex similitudine colorum cum iis quas interstitium binorum vitrorum convexorum exhibent, conclusisse; demum eum bullas a lixivio non satis removisse, ut quæ proprietates soli bullæ convenirent, accurate perspiceret. Quum contra non modo elementa lixivii recte prius ego in sua proportionem mensurassem, sed etiam crassitiem ipsius hujus membranæ certissimâ methodo determinassem; & ab omni me errore quantum poteram essem munitus, antequam ex observatis aliquid concludere ausus fui.

§. LIII.

Scilicet *membrana bullæ minime simplex aut homogenea est, sed quamprimum ex statu fluiditatis in statum soliditatis transit, ex tribus tunicis vel lamellis sibi laxè incumbentibus manifeste componitur.* Nam tunica prima, externa, suprema, quæ reliquas inferiores undiquaque ambit atque coercet, est oleosa & pinguis, in qua colores apparent a NEWTONO descripti. Hæc contractilis est, minime explosiva, subiectisque binis aliis lamellis flexilem elasticitatem conciliat, ut a vi externa non facile rumpantur. Quamdiu enim hæc externa membrana æquabiliter super totam bullam extensa est, tam diu bulla non facile rumpitur, uti dictum (§. 47. in initio)

initio). Post brevem vero moram hæc prima exterior sensim se in diversis locis contrahit, & successive versus inferiora fit crassior, dum binæ alteræ lamellæ perstant ac minime defluunt. Dum igitur hæc extima tunica se contrahit & defluit, necessario a reliquis subjacentibus secedit, præsertim in vertice, ideoque binas alteras nudas facit, quas per foramina superioris dein perspicere licet. Pro diversa autem crassitie sua in hac sic defluente tunica exteriori colores variantes apparent, quum binæ reliquæ subjacentes eundem colorem constanter servant.

Secunda tunica est alba, lumenque album semper reflectit, nec unquam aliis coloribus splendet. Hanc recte NEWTONVS vidit, dum eam ut maculam describit pellucidam quidem, sed quæ subalbido tamen colore se manifestet. Hæc postquam prior ab illa secessit, se etiam contrahit, tertiamque & ultimam nudat, ut per foramina hujus secundæ clarissime distingvi queat. Hæc altera lamella est salina & pro parte terrestris.

Tertia vero & intima tunica est pellucidissima, & ideo invisibilis fere, instar nigerrimæ maculæ apparens si spectatur a latere, nullum colorem sensibilem reflectit unquam. Est fragilissima & rigida valde, ut si vel levissimo acus actu irriteretur, protinus cum tota bulla in particulas infinite parvas late dispersas dissipetur.

Hæc etiam nunquam sola se contrahit, nec defluit; sed ejusdem ubivis, tam in vertice quam ad latera coloris, solida, constans, elasticissima manet. Tota aquosa est.

§. LIV.

Nam oleosam esse extimam tunicam exinde patet. quia quo meracius est lixivium plurique sapone imbutum, eo hæc externa tunica crassior, splendidior, mox ab initio latiores colorum zonas habet, diutius persistentes. Si vero aqua copiosior in lixivio fuit respectu saponis, tum extrema hæc membrana valde tenuis, ut vix cohærere possit, quare non in vertice solum, sed in pluribus locis simul fatiscit & reticulatum quasi opus format, cito etiam disparet, nec tam elegantes, nec tam diu servat colores. Eo igitur citius tunc maculæ in bulla nigræ nascuntur & clarius spectari queunt. Tandem, (si modo bulla ab aeris injuriis quieta perstat) tota hæc membrana oleosa exterior versus inferiorem bullæ partem contrahitur, eamque in suo fundo inquinat inæqualibus non amplius coloratis maculis, unctuosius, ipso visu teste talibus, ut tunc de oleosa hujus tunicæ exterioris natura dubitare non liceat.

§. LV.

Quin, si jam secedere cœpit exterior hæc colorata ab interioribus subjectis tunicis, earum distin-

distinctio clarissime cernitur, si *flatu oris vel alia aeris motione hæc exterior tunica agitur*. Tum enim apparet clarissime quod tunica tertia intima nigra nil moveatur, externa autem tunica in varia quasi fragmenta secedat & instar nubium a vento valido agitarum super immotam nigram moveatur irregulari motu, nec ordinem colorum amplius fervet, nunc adscendens nunc descendens variis locis tunicæ tertiæ applicetur. Ipsa vero tertia tunc in omni loco ubicunque per interstitia superioris transparet, æque ubivis nigra, ideoque ejusdem ubivis crassitie apparet. Quæ phænomena etiam ill. NEWTONVS se vidisse non negat.

§. LVI.

Adhuc certius hanc oleosæ tunicæ ab aquosa secessionem oculis usurpare licet, si ex lixivio saponaceo *non sphaerica sed plana lamella* conficitur & in situ verticali ponitur, v. g. si tubulum vitreum vel terreum ampliolem, cujus orificium ad minimum 6 vel 8 lineas in diametro habeat, in lixivium intingis & iterum extrahis. Sic enim super orificium hujus tubi extenditur membrana solida plana, quæ initio nullo colore splendet; paulo vero post in similes tres tunicas ut sphaera bullaris separatur tam manifeste, ut cuivis intuenti nulla dubitatio remanere queat.

§. LVII.

Quare etiam in lixivio perfectius misto, scilicet cujus partes oleosæ & salinæ & aqueæ firmiorem cohesionem habent, quam ut pingvedo a reliquis elementis tam facile secedere queat, nulli colores apparent unquam. Id imprimis manifestum est in *lymphâ animalis sani*, tanquam lixivio perfectissime misto. Nam si *salivæ* portio hominis junioris, sani, jejuni super discum vitreum exspuitur, intinctoque tubulo in bullam extenditur, hæc magna & elegans fieri potest si caute inflas, etiam diutissime perstans nec fragilis valde, *coloris autem omnis expers*. Imo si talis bulla salivalis libere a tubulo vitreo dependet, nunquam ullum exhibet colorem. Methodo enim supra (§. 42.) indicata *crassitiem membranæ harum bullarum salivalium* aliquoties sub calculum revocavi, unde manifesto constitit, quod etsi haberet eam tenuitatem, quæ secundum tabulam NEWTONIANAM *de tenuium lamellarum coloribus*, aliquem colorem repræsentare deberet, is tamen nunquam est ortus. Nam quia in hoc lixivio Salivali omnia optime mista sunt, pingvedo non potest a reliquis secedere, ideoque membranam peculiarem coloratam non exhibere.

Habet etiam hoc peculiare hæc bulla salivalis, quod ejus *elasticitas contractilis*, quam *nisum centripetum* supra nominavi (§. 49.), multo sit major quam nisus centrifugus. Nam nunquam
etiam-

etiamsi per horam & amplius steterit, in tenuem illam pluviam exploditur, sed quando crepat, rimas quasi agendo corrui, & instar mucis valde tenacis, aut instar telarum aranearum decidit a tubo. (*vid. §. 51. infine*).

Similiter inde ratio patet, cur lixivium saponaceum, cui aliquid spiritus vini admistum est, si expandatur in membranam, etiam nulum colorem monstrat, quia spiritus vini elementa lixivii arctius jungit, neque secessum olei ab aqua tam facile permittit. (§. 51. & 38. no. 4. 7.).

§. LVIII.

Quæ de saliva observavi, etiam de *Urinis* vera sunt. Liceat mihi medico hanc interspergere medicam observationem, quam sæpius experientia docuit veram esse & ad prognosin morborum conferre. *Urina sana* vix spumescit, vel si conquassando bullulæ quædam nascuntur, citissime iterum hæc pereunt, quare *urina sana* est humor vere excrementitius, & ad solidas partes formandas ineptus. In catarrhalibus autem, præsertim capitis, affectibus, & ubi pulmonum efficacia in sanguinem alterata est, *urina spumescit facillime*, spumamque per plures horas sæpe servat. Signum est tum non partes excrementitias solas, sed ipsam lympham nutritiam simul cum urina excerni. Hæc spuma in *urinis* non semper est colorata, sed ple-

rumque alba pellucida, ut sæpissime observavi. Quando autem *spuma hæc* in suis bullis *colores iridis* contrahit, designat difficilem morbum, quia totam massam humorum imperfecte mistam declarat, ex qua salinæ & pingves partes secedunt, mixtionemque nutritioni & vitæ necessariam turbant. Similiter bullæ quæ in lacte, in lacte ebutyrato, in sanguine ex venis misso, in cerevisia bene cocta & fermentata apparent, rarissime sunt coloratæ, sed semper pellucidæ; unde concludo quod in his liquoribus mistio oleosi & aquosi perfectior sit, ut oleum non facile propriam lamellam conficere & colores repræsentare queat.

§. LIX.

Unde etiam perspicitur cur in tempestate frigida colores citius & clarius in bulla appareant, quam in calore æstivo, quia scilicet aqua frigida oleum citius ex nexu dimittit, quam calida. Id quod die 7. Mart. 1754. quando thermometer fahrenheitianum hic loci ad gr. 7. ideoque ad gradus 25. infra punctum congelationis aquæ descenderat, repetita observatione edoctus sum. Et hoc ipso, quo scribo, tempore anni 1755. vehemens frigus aliquoties nos urisit, etiamsi ad 22. tantum gradus thermometer intra punctum congelationis descenderit in hac urbe, quum novellæ publicæ in aliis regionibus multo gravius eodem tempore frigus indica-

dicaverint, certe tamen longitudine tempestatis algidæ priores hyemes hæc præsens longe superarit, ideoque similem experientiam aliquoties repetendi dederit occasionem.

§. LX.

Tandem, ut colophonem imponam huic de coloribus bullarum inquisitioni, ipsa mensura NEWTONIANA quam de coloribus tenuium lamellarum dedit, demonstrat colores bullarum non in tota bulla, sed in exteriori tantum lamina oleosâ earum spectari, nam crassities totius membranæ quæ bullam conficit, ideoque omnium laminarum simul, si methodo supra (§. 42.) tradita revocatur ad calculum, semper nimis est crassa, quam ut in ea color ullus secundum NEWTONI regulas apparere queat. E contra si crassities solius exterioris oleosæ lamellæ mensuratur, ea cum observatis illustris hujus viri exactius convenit. Ut autem crassities hujus exterioris lamellæ mensurari queat, ad sequentia erit attendendum:

- 1) In uno grano lixivii sunt $\frac{5}{168}$ gr. axungiae (§. 38.)
- 2) Requiritur autem ad unam bullam, cujus diameter duorum-pollicum est, $\frac{1}{4}$ gr. lixivii (§. 42.)
- 3) Ergo in tali bulla est ^{axungia} ~~lixivii~~ $\frac{5}{432}$ gr.
- 4) Specifica gravitas axungiae ad specificam gravitatem aquæ est ut 9 ad 10. Talis enim aliquot

tentaminibus mihi est visa, ut eam proportionem sine magno errore admittere queam. Concedo tamen & necesse est, quemadmodum aqua aquam gravitate superat, ita non in omni axungia eandem præcise proportionem locum posse habere. Interim hæc necessaria diversitas non est tanta ut conclusionem hujus calculi multum queat turbare.

- 5) Quare quum pollex cubicus aquæ sit æqualis 311 granis, ex lege arithmetica pollex cubicus axungiae æquabit grana $279\frac{9}{10}$. Propter calculi commoditatem assumam quod pollex cubicus axungiae æquet 280 grana. Nam tam parva differentia ut nunquam exacte demonstrari, ita in hoc meo calculo non nocere potest.
- 6) Quærendum igitur est quam molem, i. e. quam partem pollicis cubici occupent $4\frac{5}{32}$ grani, scilicet quam molem occupet ea parva axungiae portio, quæ in bulla continetur, est autem

$$280 : 1 = 4\frac{5}{32} : 110\frac{5}{80} = 24\frac{1}{80}$$

- 7) Tam parva portiuncula axungiae, scilicet $24\frac{1}{80}$ poll. cub. expansa est in lamellam tenuem, quæ totam bullam æquabiliter in initio ambit. Est vero superficies hujus bullæ, ut supra (§. 42.) ostensum est, $= 12 \times 2\frac{8}{5}$ pollicum quadratorum.
- 8) Si igitur crassities hujus lamellæ oleosæ vocatur y, erit

$$12 \star \frac{28}{50} y = \frac{1}{24192} \text{ poll. cub.}$$

$$\text{vel } 628 y = \frac{1}{24192} \text{ poll. cub.}$$

$$\text{unde habetur } y = \left(\frac{1}{24192} : \frac{628}{50} \right)$$

$$\text{i. e. } y = \frac{50}{15192578},$$

$$\& \text{ si per } 50 \text{ divid. } y = \frac{1}{303851} \star \frac{26}{50} \text{ poll.}$$

9) Hæc igitur crassities lamellæ extimæ oleosæ, quamdiu nondum contracta aut colorata, sed æquabiliter super totam bullam extensa est, $= \frac{1}{303851}$ pollicis, (nam parvulam fracturam quæ superest, non opus animadvertere) coincidit fere cum $\frac{3\frac{2}{3}}{1000000}$ ex tabula NEWTONIANA, nec debet colorem habere, præter splendentem albescentem, ut revera non habet. Nam revera mox in initio post factam inflationem nullum fere, vel modo subaldium, vel potius splendentem colorem bulla habet.

10) Quando vero posthac per moram hæc exterior lamella adiposa super interiorem aquosam se contrahit, paulumque successive crassior evadens versus fundum descendit, tunc reliqui colores a NEWTONO descripti ex ordine apparere solent, ita ut colores qui in tabula NEWTONIANA primi & supremi sunt, etiam vertici bullæ sint proximiores & contra.

§. LXI.

Quando quis autem integram membranam bullæ, scilicet ex tribus lamellis constantem, pro

pro corpore reflectente eorum colorum afflu-
meret, is in phænomenis & ordine NEWTO-
NIANO explicando inutilem operam consumet.
Nam quum tota ea membrana crassa sit $\frac{1}{15824}$
poll. eaque crassities fere coincidat cum $\frac{66}{1000000}$
ex tabula NEWTONIANA, apparet eam nimium
ab ea tenuitate differre, quam ill. Vir in suo
calculo requirit. Quare puto ex his, quæ de
coloribus bullarum dicta sunt (§. 53 --- 60.) in-
dubitato demonstrari, *colores dictos NEWTONIA-
NOS non a tota bullæ membrana sed ab ejus exte-
riori tantum oleosa lamella reflecti.* Unde in pe-
riculo erroris versantur qui ex colore tenuium
lamellarum ad earum crassitiem sunt argumen-
tati, quia possibile est eum colorem non ex to-
ta lamina, sed ex ejus uno strato reflecti, quæ
res quam frequenter ex NEWTONI auctoritate
fuerit facta, nemo non novit.

§. LXII.

Imo valde dubitari potest *an aqua pura, quæ
nulla pinguedine est imprægnata, (quam quidem
invenire difficile est) in lamellam extensa utcun-
que tenuem vel crassam, unquam ullum colorem
reflectat, (nisi forte albidum aut subcærulescentis
coloris aliquid monstrat, qui tamen, an non
contentis in aqua particulis terrestribus & sali-
nis pro parte adscribendus sit, nondum constat).*
Maculæ enim bullarum nigerrimæ, quæ ex par-
tibus mere aqueis constant, partesque adiposas
&

& salinas ex suo nexu dimiserunt, ut supra ostendi, nullum habent colorem, idque non propter tenuitatem suam, quia multum sunt crassiores [quam eas NEWTON falso esse conjecit, quippe qui his maculis nigris ex sola conjectura adscribit insignem tenuitatem, scilicet $\frac{3}{8000000}$ poll., quum tamen secundum meam supra datam methodum rem examinando, certissime constet has maculas nigerrimas bullarum non esse tenuiores quam $\frac{1}{17888}$ pollicis circiter. Præterea hæ maculæ *sive in vertice vel summitate bullæ, sive ad latus ejus nascantur*, semper sunt *ejusdem coloris*, nempe nullius, nigerrimæ videlicet si oblique, aut pellucidissimæ si directe eas intuemur, *constanter excolores*, nullum lumen reflectentes. Quare dubitari potest, *an aqua simplex ullum unquam colorem reflectat si pura consideratur, sive crassior sive tenuior ejus lamella fuerit, & an non omnis radiorum reflexio a solis pinguibus & a principio phlogisto admixto oriatur*, eo principio materiali autem deficiente nullus in aqua generetur color. Nam si ex lixivio cujus pondus $= \frac{1}{4}$ gr. inflas bullam diametri duorum pollicum, in ea si lamella exterior oleosa ab interna aquea recedit, maculæ una vel plures oriuntur nigerrimæ, i. e. pellucidissimæ, ut hætenus ostensum. Si autem ex eadem portione lixivii inflas bullam cujus diameter non est nisi unius pollicis, in hac, quamprimum tunica exterior oleosa recedit, etiam similes maculæ oriuntur ejusdem perfecte coloris

ris ut in priori, nempe nigerrimæ & pellucidissimæ. At vero ea lamella aquosa quæ maculam format in bulla priori & majori est crassa $\frac{1}{17000}$ pollicis circiter; ea lamella aquosa quæ maculam nigram format in bulla altera minori est crassa circiter $\frac{1}{3000}$ pollicis. Ergo lamella aquea cujus crassities $\frac{1}{3000}$ poll. & alia cujus crassities $\frac{1}{17000}$ poll. exhibet eundem colorem, scilicet nullum, nisi nigerrimum. Chemici profecto hanc veritatem dudum docuere & experimentis evicere, quod *sine principio materiali phlogisti nullus in corporibus ullis generetur color*. Quæ difficultates quomodo cum doctrina NEWTONI de tenuium lamellarum coloribus conciliabiles sint, vel quæ limitatio NEWTONIANÆ doctrinæ accedere debeat, nunc non est meum ut inquiram. *

§. LXIII.

* Quod hic de reflexione luminis ex aqua dictum, non æque valet de refractione. Nam omnis aqua & glacies pura frangit, ut omnes novimus, radium immissum, imò non omnis aqua sub eodem angulo eam frangit, sed videtur aliqua in aquis diversitas esse. Qui Rhenum fluvium accolunt, & imprimis nautæ super eo mercaturam exercentes, experientia docti, glaciem brumali tempore ex variis minoribus fluviis Rheno illatam solo colore distinguere sciunt. Hyems enim si solito gravior contingit, immanis aliquando vis glaciei magnum hunc fluvium tegit, non semper ex Rheni aquis nata, (siquidem Rheni superficies ob magnitudinem raro congelascit) sed ex aliis allata fluminibus, lento motu defluens ad mare. Quæ glacies non modo transitum fluminis sæpe difficilem aut impossibilem reddit, verum etiam attritu suo ad ripas

§. LXIII.

Hæc sunt phænomena primaria bullarum aquearum, quæ ad formanda ex iis de aquæ natura theoremata quædam, eo certiolem basin jaci-

magna mala facit, arbores eradicat, arva verrit, domus profternit, valla frangit fi forte moles maximorum frusto. rum aut violentia fluminis ad talia objecta dirigit impetum. Inprimis autem navigia fi his natantibus glaciæ montibus implicantur non procul a naufragio absunt, quamobrem Nautæ solent accuratius attendere & studio observare an omnis quam eo anno descensuram autumant, glaciæ jam descenderit, vel an novas ejus copias debeant expectare, nam quamdiu has metuunt, suo se itineri non valde tuto credunt. Sciunt autem ex colore quis fluvius suam transmiserit glaciem, quis minus. Est enim omnis glaciæ vel pellucida vel opaca. Opaca vel terreis impuritatibus, vel bullis aereis multis perfusa spectatur, ex qua nullum signum sumunt. Quæ vero glaciæ pellucida est, ea ex puriori aqua in superficie fluminis, subitaneo & magno gelu concrefcens ad unius vel plurium sæpe pedum crassitiem congelatur & tamen pellucida manet. Observarunt autem Nautæ quod hæc pellucida glaciæ ex *ipsius Rheni* aquis condensata semper *cæruleum* habeat colorem; glaciæ autem pellucida ex *Mosella flumine* descendens *viridescat*; ex omnibus autem nostræ regionis minoribus, ut *Rura fluvio* & similibus non nisi *album colorem* vel subviridescentem monstret. Hæc observatio nautarum est certa & a me sæpius repetita quam diu ad ripas Rheni domicilium habui, hoc etiam anno, 1755, quo inclementior hyems ut omnibus germaniæ fluminibus ita & Rheno patri crySTALLinum pontem iniecit, eoque tandem diffracto incredibilem glaciæ copiam ex diffitis regionibus per nostram viciniam ad mare vexit, eandem rem accuratius speculandi nactus sum occasionem. Glaciæ autem hæc pellucida, tam *cærulescens Rhe-*

jaciunt, quo verius sunt observata. Nam in iis recte videndis occupatus semper mensuram & calculum in manibus habui, & a sensuum fallacia, me quantum licuit, reddidi tutum.

§. LXIV.

ni, quam *viridescens Mosellæ*, quando regelascit, purissimam aquam exhibet, neque terræ neque salis peculiaris, neque pingvitudinis ulla signa monstrat ex quibus hæc diversitas refractionis intelligi posset. Potius quia singulis annis similis semper & constans hic est color, credibile est non in admixtis, quippe quorum copia, proportio & qualitas non semper eadem foret, sed in ipsa aqua causam hujus rei latere, dum quædam aqua radios lucis aliter, & quidem potentius aut remissius refringit quam altera, ideoque *diversam densitatem*, communibus instrumentis vix mensurabilem, colore tamen demonstrat. Videtur profecto aqua fontana, quo diutius postquam ex cryptis montium emanavit, aeri & soli exponitur, aliam acquirere naturam, hætenus non satis notam aut declaratam. Mollietates enim & durities aquæ in quibus consistat, hætenus nemo, ad minimum non recte exposuit. Herbarum vero diversissimum pro aquæ varietate nutrimentum, & piscium tam varians caro pro annis varietate in quo degunt, & ipsorum hominum forte mores & morbi ex aquæ quam quotidie bibunt necessitate, & multa alia quæ Medici per experientiam docti agnoscunt, aquarum essentialium aliquam varietatem, & diversam respectu aliorum corporum habitudinem indicant. Cur qui Alutæ in Valachia & montosæ Tyrolis fontes bibunt, strumis laborant? Cur in Frisia olim fons erat aquæ dulcis qua pota stomachace & scelotyrbe infestabant? Cur similes fontes hodie sunt in gallia? Hæ tamen aquæ, si per communem & hætenus usitatam methodum examinantur, nil exhibent ex quibus tam mirabiles effectus possint explicari. Quare ut ad alia phænomena, & forte etiam ad lucis relationem adversus eas attenderemus, detegendarum harum causarum utilitas nos jubet.

§. LXIV.

PRIMO igitur, dum ex *aqua saponata* per solum *flatum extendentem* fit *membrana solida*, nemo erit qui hanc *soliditatem* ex admista paucula terra, aut admixto paucio sale alcalico materialiter deducere velit. Nam etsi verum est, quod paucula portio fluidi cujusdam si multis partibus solidis admiscetur, ab his fere absorbeatur & quodammodo perdat fluiditatis naturam, dum a potiori fit denominatio, ut, v. g. lixivium saponaceum dilutum si lento calore inspissatur, particulæque fluidæ in auram abactæ relinquunt partes solidiores, hæ omnino propius sibi successive adplicatæ saponis solidam massam constituunt, licet nonnullæ particulæ aqueæ sint adhuc in eo intricatæ, quæ propter paucitatem non animadvertuntur: Tamen ut hoc fiat, necesse est quantitatem fluidorum in tali casu multo minorem esse, quam solidorum. In hoc autem nostro casu proportio terræ ad aquam est insigniter parva, scilicet $\frac{1}{848}$ totius mixtionis (§. 38. no. 3), & principium salinum in sapone præfens non nisi $\frac{1}{32}$ totius mixtionis efficit, ut profecto ex iis firmitatis fundamentum petere nullo modo liceat. Lixivioque tali, quando in bullam extenditur, neque additur aliquid, neque demitur, sed eadem illa materies quæ paulo ante lixivium fluidissimum & minime spissum constituebat, sine ullo materiali (nisi forte aëris) accessu fit solida firma membrana. Quare id terreis materialibus principiis

G

jam

jam ante forſan in lixivio natantibus minime eſt adſcribendum, ſed ſoli cuidam formali mutationi per flatum, i. e. per motum determinatum inductæ. Quod etiam BOYLII pulchra quæ habet in *tr. de fluid. & firmitat.* experimenta, dudum confirmant, ſcilicet in *humoribus ſolam directionem conatus mutatam efficere corpus firmum.*

§. LXV.

Fluiditatis rationem diverſo modo concipiunt Phyſici, dum alii ſolam *tenuitatem, figuram, mobilitatem* partium conſtituentium requirunt, ut plerique CARTESIANI, alii autem *motum ſimul actualeſt in teſtinum* in quolibet fluido neceſſarium eſſe ſupponunt, ut BOYLIVS & qui eum ſequuntur, STAHLIVS præcipue. Mihi videtur ex ſola tenuitate & mobili figura nullam fluidi notionem naſci, ſed ſimul neceſſariam eſſe in his minimis particulis *attractionem mutuam*, ut etiam plerique ex recentioribus aſſumunt, id eſt, ut niſum perpetuum habeant ad cohæſionem, nondum tamen cohæreant. Quapropter acervus longe tenuiſſimi ſabuli aut gypſi fluidus dici nunquam poteſt, quia particulæ ejus nullum ſenſibilem niſum in ſe invicem exercent. Hic *niſus* autem vel *conatus debet in fluidis indifferens eſſe verſus omnes regiones*, ut quælibet particula fluidum componens ſit in *ſtatu quodam libertatis*, & omnes vicinas æqualiter

biliter trahat, nec peculiaris in hoc conatu directio versus unam vel alteram regionem potior sit.

Firmum vero corpus mihi videtur, *cujus particulae minimae nunc non amplius in conatu sunt cohaesionis, sed revera cohaerent vel continuæ sunt*, ideoque necessario se ex uno latere fortius quam ex reliquis trahunt, imo aliquando commune centrum attractionis & cohaesionis habent, quarum igitur conatus non amplius est liber & indifferens, sed certo modo determinatus. Quare ut ex fluido fiat solidum, sæpe non alia re opus est, nisi motu quodam actuali, qui conatum particularum hætenus vagum versus unam directionem determinet.

§. LXVI.

Quando aranea telam nectit quibus insecta volitantia in escam capere & vincere solet, fila sua ex humore viscidulo format sola tractione, i. e. solo motu. Nam *succum* ex poris glandulosi postremi ventris secretum *in momento temporis solo motu* corporis sui in filum firmum transmutat. Tale filum ararearum momento temporis ex liquido natum pro tenuitate sua fit unum ex firmissimis mundi corporibus, quum nil materiale nec additum, nec subtractum, nulla coagulatio, nulla exsiccatio facta, sed sola forma humoris mutata sit, scilicet ut particulae secundum unam lineam, per quam aranea

G 2

ducit,

ducit, se attrahant, quum antea, quamdiu liquor erant, indeterminatum & incertum attractionis nisum habuerint. Nam non exsiccatione aut inspissatione hæc filamenta solidescere docet momentanea temporis celeritas, dum filum tale mox in principio sui ortus æque firmum aut solidum est quam post aliquot horas aut annos. Simile quid in bombycibus, pluribusque insectis observare licet.

§. LXVII.

In fluido enim, quamdiu conatus particularum indifferens, & versus omnes regiones æqualis est, hic nullum habere potest effectum, quia conatus conatum impedit, conatus conatui aequilibratur, ideoque secundum verum theorema Cel. HAMBERGERI *Phys.* §. 193. fluida non cohererent pro ratione vis insitæ. Quare quælibet vis ab extra in humorem agens, v. g. vis gravitatis, hunc interum fluidorum conatum superare valet, unde fluidum se non finire potest, ex definitione ARISTOTELICA i. e. non habet in se ipso rationem sufficientem suæ figuræ. Ex quo principio omnes regulæ hydrostaticæ de æquilibrio fluidorum pendent. *Solidum* vero corpus habet unum commune centrum, vel certe aliquot communia centra cohæsionis, i. e. habet punctum primum vel aliquot puncta primaria, versus quæ omnes omnium particularum conatus diriguntur. Quare nullum ha-

ctenus

tenus detectum est corpus vere solidum, quod non habeat aliquam *structuram* in partibus minimis, i. e. peculiarem sibi cohærendi modum, & inde sequentem peculiarem figuram. Omnia scilicet, omnes lapides, omnia sulphura, omnes mineræ in suis minimis sunt crystallifata. Cuncta metalla sunt peculiari modo striata aut foliata, ut ex fracturis eorum apparet, vid. Cel. CRAMERVM in *docimasia*. Omnia vitra ex filis crystallinis longis constant quæ aliquando in uno puncto concurrunt, ut in lachrymis vitreis. Terreis minimis particulis singularem organicum adstruit Cel. Reaumur M. A. R. 1730. Aqua ipsa quando per frigus in glaciem mutatur, non irregulariter, sed per crystallisationis speciem solidescit, ut de vegetantibus & animalibus fibris taceam, quia eas omnes suam structuram habere nota res est, & extra cancellos si plura nunc adderem viderer vagari. E contra vere fluidi corporis particulæ minimæ, quantum hætenus potuerunt indagari, nullam figuram regularem & constantem exhibent, i. e. nullam structuram vel constantem cohærendi modum habent, sed omnis fere figuræ capaces sunt, nisi forte figuram globulosam liquidi pinguis in aqua dispersi hic adducere velis aut globulos sanguinis LEV-WEHOECKIANOS, quorum figura ex vasorum & aliarum externarum causarum actione dependet, nec pro constanti haberi potest, quia pro vasorum & motus varietate multum variari solet. Et in hac ipsa bullæ, quam hætenus de-

scripsi, membrana singulæ partes constituentes peculiarem aliquem ordinem, oculis conspicuum servant. Extima scilicet tunica est oleosa, intima est aquea, inter has media est salina; ut quasi ad oculum pateat quod hinc inde divinatus est & recte expressit incomparabilis STAHLIUS, quod corpora diversæ naturæ, si miscentur, se tantum ex uno latere trahant. Scilicet aqua per se non attrahit oleum, potius illud fugat; si autem cum oleo sal aliquod, imprimis alcalicum jungatur, tunc aqua intermedio sale, vel ex latere salis etiam oleum attrahit & se sociat ei; nempe sal est medium & quasi interpres corpora hæc alias heterogenea jungens.

§. LXVIII.

Ut talis directio conatus in fluidis fiat non semper est necesse ut motus externus accedat, qualis in exemplis allatis *bullæ saponacæ & filiaranearum* accedere adparuit. Aliquando *in fluido intus est aliquid quod hanc determinationem, ideoque soliditatem efficiat, spiritus motor, aut vis seminalis.* Vegetationes chemicæ, fuligo nascens ex committis oleo vitrioli & spiritu vini si spiritus naphthæ frobenianus conficitur, ossa Helmontiana, vegetabilium tandem & animalium incrementum, similiaque plura docent id clarissime. Gluten scriniariorum vulgare, si in sufficiente copia aquæ dilutum, solique expositum putrescere incipit, in superficie sua con-

contrahit lanuginem vel *fitum*, id est, tota superficies filamentis longis albis, perpendiculariter sæpe erectis obducitur. Hæ fibræ aliquando sesquipollicem & amplius longitudine æquant, intus cavæ sunt ut microscopium docet, & in summitate habent globulum vel sphæriculam cavam pellucidam, ut quælibet talis fibra cum sua sphæra quasi fungum capitatum repræsentet. Quam ob causam nonnulli Botanici crediderunt talem lanuginem, quæ in corporibus putrescentibus nascitur, esse peculiare plantarum species ex suo semine natas. Ego autem certus mihi persuadeo hos fungulos mechanice, sine semine, per æquivocam dictam generationem nasci. Nam aliquoties contigit, ut subitaneum ejusmodi fibrarum exortum ex glutine dicto oculis meis viderim, nec aliter generantur nisi quia particula quædam ignea volatilis propter levitatem in auras evasura inclusa est in membranula sphærica glutinis, dumque simul cum hac sphæricula aufugit, secum ducit filum, quod per solam hanc tractionem momento temporis obrigescit, & caudicem novæ novæ plantæ mechanicæ facit. Ascendit autem sphæricula tam diu, donec vel gravitas sensim aucta filieducti, vel ejus tenacitas ulteriorem ascensum impediat. Tum sphæricula subsistit, & erecto filo adhærens, ejus caput facit. Has vidi plantas sine semine nasci.

§. LXIX.

ALTERVM quod ex bullis aqueis didici est, *aquam solo motu* non modo in corpus solidum & firmum, sed etiam *corpus elasticum converti*, sine igne, quum aqua quamdiu fluida est omnis elasticitatis fuerit expers. Nam aqua saponata quamprimum est in bullam inflata, non modo figuræ mutationem variam pati potest sine ruptura, quin si mutans causa recedit, in pristinam figuram semper se restituit; sed etiam duplicem nifum habet, alterum constrictorium, ab oleo dependentem, alterum explosivum atque projectilem, eumque valde magnum, ab ipsius aquæ non ab admistorum statu orientem, quemadmodum hæc phænomena latius exposui (§. 47 -- § 1.) Nam de oleo, quia id se in superficie bullæ contrahit, & quasi defluit non dici potest vere solidam exinde, & multo minus elasticam explosivam membranam fieri, ita ut *vera bullæ soliditas a sola sit aqua, & multo magis ejus elasticitas.*

§. LXX.

Quo phænomeno imprimis STAHLII animadversio corroboratur, qui aquam omnis fere expansionis elasticæ autorem facit in suis CCC. observ. & alibi passim in suis operibus. Nam si de sola ignea expansione aquæ in flatus aëri analogos vir sapientissimus hanc elasticitatem intellexisset, fidem inventionis neutiquam tueri posset ut jam supra monui (§. 11.) At vero

STAHL

STAHLIVS primus monuit, quod aqua in elasticos flatus mutata non amplius fluidum sit corpus, sed *formam tensam*, (quæ ejus expressio est,) habeat, eaque *forma tensa* non modo per majorem calorem, sed etiam sine igne sensibili in *fermentationis negotio*, & multo magis in *effervescentia* & conflictu salium oppositorum in aqua solutorum acquiratur. Nam vel ipse sensus nudus in his operationibus cognoscit, aquam in bullas tam visibiles majores, quam invisibiles minores, ideoque in membranas solidas disponi, quæ propter soliditatem ineptæ factæ ad solutionem, dimittunt ex suo nexu partes tam oleosas quam salinas, cum quibus ante mixtæ erant, motu autem elastico intestino totum liquorem agitant unde novæ mistiones, novæ elementorum conjunctiones, novæ divisiones oriuntur. Quare fermentationis & effervescentiæ primarium instrumentum est *aqua*, quatenus ejus *particulæ elasticæ fiunt* & *formam solidam tensam acquirunt*. Scilicet in fermentationibus aqua duplici modo agit, *primo*, quatenus est *fluida* solvit, resolvit, disjungit, æqualiter miscet; *secundo* quatenus pro parte in *lamellas solidas elasticas* disponitur, movet, calefacit, intestinum motum producit, disjicit, comprimit, atterit, coagulat.

§. LXXI.

Et ex eodem elasticitatis membranarum aquearum phænomeno nova nascitur *probabili-*

tas axiomati aristotelico, de *conversione aquae in aërem*. Quid est enim aër? certe non liquor sed spuma liquoris? Est aër corpus pellucidum, coloris reflexi si purus est, omnimodo expers, plane ut lamina pura aquosa (§ 62); Est aër corpus compressibile, quod de nullo alio liquore dici potest, sed bene de laminis bullarum, quarum figura sphaerica (id. est. omnium capacissima) sine ruptura potest mutari in oblongam, angulosam, irregularem, (id. est. in figuras minus capaces) (§. 45.); Est aër corpus summe & eminenter elasticum, quod iterum de nullo alio liquore est verum, de aqua autem demonstratum est (§. 47 - 51) eam similem explosivam elasticitatem acquirere, quamprimum ejus particulæ minimæ sibi cohærent, & lamellam solidam faciunt; Est aër corpus quod inæquabilem superficiem habere & diu retinere potest etiamsi non moveatur, id est cujus superficies non semper æquabilis & horizonti parallela est, quod iterum de nullo liquore quiescente valet, bene autem de spuma liquorum. Nam barometra docent in diversis locis, & in eodem loco diversis temporibus atmosphæram nunc altiore nunc depressiorem esse, & montosa figura nubium idem declarat; Est aër corpus quod omnem hanc suam elasticitatem perdit, & potius constrictoriam facultatem acquirit quando ei phlogiston miscetur, ut per pulchras experientias venerabilis HALESII patet, admissio enim phlogisto puriori aër ita constringitur ut quasi pereat & quid ex eo sit factum, sensus

sensus non distinguat. Simile quid in laminis aquosis bullarum spectatur, quarum explosiva elasticitas impeditur & in elasticitatem contractilem centripetam mutatur per laminam oleosam ambientem (§. 46. 49. 51.); Est aër corpus instar spumæ *friabile & facile destruendum*, quodque ut conservetur, *quotidie denovo generari* debet. Est enim incredibile quantum aëris omni momento in tota telluris superficie destruat & vere consumatur per respirationem omnium animalium & omnium plantarum, per omnes effervescentias & fermentationes, per omnem ignem, flammamque, per omnes solis radios. Nam si quis hunc calculum ducere vellet, is facile demonstraret incredibilem esse eam aëris copiam quæ omni momento sic destruitur, & tamen athmosphæræ quantitas & moles circiter eadem conservatur, unde necesse est incredibilem etiam copiam aëris quotidie de novo generari debere. Unde autem & ex quo corpore generatur? si non ex aqua? cujus natura per tot phænomena cum aëre conspirat. Et quomodo generatur ex aqua si non quod particulæ aquæ minimæ, quæ quamdiu fluidum constituunt, sibi non cohærent, sed vagum conatum habent, sibi incipiant cohærere, & machinulas solidas efficiant, quarum collectio est aër. Hæ machinulæ aëreæ an sphaericæ sint instar bullularum, id non determino, nec est opus. Nam ut ars ex aqua potest sphæram solidam facere, dum bullam flatu formamus,

/ ita

ita natura forſan alias methodos habere poteſt aquam in laminas elastiſcas non ſphæricas ſed aliter figuratas tranſmutandi. Nam ſphærica figura machinulis minimis aëreis propter plura phænomena vix adſcribi poteſt.

Qui autem omnia hæc conſiderat, & cum iis dudum nota phænomena de generatione flatuum aëri maxime ſimilium per æolipilam & per alias chemicas operationes conjungit, ille perſpiciet adeo probabilem eſſe ARISTOTELIS ſententiam, ut vix dubitatio ſuperſit. Ad minimum facile pervidetur quod vapor aquæ, quoniam elastiſcus eſt, ex ſolidis lamellis conſiſtet, ideoque plane alios effectus habeat quam ipſa aqua etſi ad eundem gradum calida, uti non tantum medica, ſed etiam mechanica plurima phænomena docent.

§. LXXII.

TERTIA conſideratio ex membranis bullarum mihi naſcitur circa *magnitudinem particularum minimarum aquæ*. Particulæ aquam conſtituentes parvæ ſunt, tamen non videntur incomprehenſibilem eam tenuitatem habere, quæ in compendiis phyſicorum eis paſſim tribuitur. Quando $\frac{1}{4}$ gr. lixivii ſuperius deſcripti per commodum tubulum inflatur in bullam, hæc extendi poteſt, donec diameter ejus adæquet circiter duos pollices rhenanos. Si tunc ulterius inflas,
quaſi

quasi majorem eam bullam reddere velles, id in cassum tentabis, nam bulla mox rumpitur & in particulas vel atomos quoad sensum infinitas, undiquaque dispergitur, uti pluribus recensui (§. 47. 42.) Unde patet quod talis amplitudo bullæ sit expansio maxima, quæ in particulis lixivii possibilis est, majorem enim expansionem sine solutione continuitatis non ferunt. Quumque fuerit supra demonstratum hanc explosivam bullæ qualitatem non ab oleo, nec a sale admixto, sed ab aqua dependere (§. 50. 51.), videntur particulae aqueæ tam parvæ esse, ut quando bullæ diameter duos pollices æquat, eæ se non amplius contingere queant. Sunt autem in eo lixivio, quo plerumque utebar $\frac{8}{9}$ aquæ & $\frac{1}{9}$ saponis (§. 38. no. 3.) quare in $\frac{1}{4}$ gr. lixivii, ex quo bulla conflatur, sunt $\frac{2}{9}$ gr. aquæ. Hæ $\frac{2}{9}$ gr. occupant molem $\frac{2}{1750}$ poll. cub. Et extensæ sunt in membranam, cujus superficies = $\frac{628}{50}$ poll. quadr. (§. 42.) quare crassities hujus membranæ erit $\frac{1}{17577}$ pollicis.

Est igitur hæc crassities hujus membranæ intimæ, scilicet $\frac{1}{17577}$ poll. rhen. talis ut in ea particulae aqueæ possint adhuc se contingere quidem & cohærere; Si ea autem membrana vel paululum ulterius extenderetur, particulae aqueæ simul omnes a se separabuntur, quare hæc dicta crassities ultima est sub qua se contingere queunt aqueæ particulae, quando sunt in statu soliditatis.

Quare

Quare particulæ minimæ aquæ (*si sphericæ sunt*) non erunt crassiores quam ut earum 17577 sibi secundum rectam lineam appositæ, possint conficere longitudinem pollicis rhenani; (si autem non sphericæ sunt, unum tamen latus eorum non majorem diametrum habebit).

Intelligo autem particulas eas aquæ quæ sunt in statu soliditatis & elasticitatis. Nam forsan particulæ aqueæ, quando ex statu fluiditatis in statum soliditatis transeunt, poterunt suam figuram paululum mutare, v. gr. ex spherica in oblongam, quare ex hoc quem posui calculo, dum scilicet particulas aqueas in statu suo soliditatis mensuravi, ad easdem particulas in statu fluiditatis existentes, non plene concludi potest. Credo etiam particulas aquæ paulo adhuc minores esse quam eas mox determinavi, quia diameter bullæ aqueæ, in qua cepi mensuram potius paulo major quam minor est duobus pollicibus rhenanis, etsi tam parum major, ut sine magno errore pro duobus pollicibus assumi queat. Atque tamen nulla spes est unam ejusmodi particulam aquæ unquam per microscopium posse a nobis spectari. Nam tale microscopium nondum est inventum, quod particulam cujus diameter est $\frac{1}{17577}$ pollicis ab aliis particulis perfecte similibus accurate distingueret. Inprimis autem perfecta pelluciditas & homogenea omnium particularum natura, vix ut a se per visum discernantur, permittere vide-

videtur. Quum globulus sanguinis ruber ex mensura LEVWENHOECKII sit circiter $\frac{1}{2000}$ poll. rhenani, exinde proportio inter globulum sanguineum & aqueum haberi potest. In eo scilicet spatio sphaerico quod occupat unus sanguinis globulus contineri queunt prope 300 particulae aquae. Abstineo autem a reliquis consequentiis physiologicis, quae ex hac data ratione non difficulter fluunt.

§. LXXIII.

Eadem methodo etiam oleorum & axungiae partes minimae constituentes determinari queunt. Nam quia extrema tunica bullarum saponacearum est oleosa (§. 53 - 56.) & ejusdem amplitudinis cum bulla ipsa, quia hanc totam in initio tegit; at vero in $\frac{1}{4}$ gr. lixivii, ex quo bulla constat, non est praeter $\frac{5}{108}$ gr. axungiae (§. 38. no. 3.) ideoque extrema haec tunica non habet crassitiem majorem quam $\frac{1}{303851}$ poll. & in tanta tenuitate tamen omnes particulae se adhuc contingunt ut solutio continuitatis non fiat, sequitur partes minimas axungiae si non minores, tamen certe non majores esse, quam ut diameter unius particulae sit $\frac{1}{303851}$ pollicis. Quare diameter unius particulae aquae ad diametrum unius particulae olei vel axungiae se habet circiter ut 30 ad 1. Ex qua insigni tenuitate intelligitur cur olea multo sint penetrabiliora quam aqua, & per canales eant quibus aqua excluditur.

§. LXXIV.

§. LXXIV.

Nec obstat majori tenuitati quam particulis oleosis præ aqua adsignavi visciditas quæ in oleis major quam in aqua observatur. Hæc enim partim ex ipsa tenuitatis natura sequitur, dum subtilia corpora majorem superficiei proportionem quam crassiora habent, ideoque ad cohæsionem magis sunt pronæ; partim vero ex massulis heterogeneis terreis & aquosis & salis, quæ in oleis communiter copiose hærent, illorumque crasin pervertunt, recte deducitur. Oleum enim purum & a massulis heterogeneis liberatum, ut alcohol vini & olea ætherea cohobata minime spissa sunt, sed fluiditate ipsam aquam si non superant, tamen æquant.

§. LXXV.

Certum est quod olea quælibet pro maxima sui parte in aquam puram vere transmutari queant, non modo si lenta flamma ardent, sed etiam si addita calce viva aut alia materiâ quæ phlogiston attrahit, destillantur, ut vulgata experimenta STAHLII & aliorum clare docent. Est etiam certum quod ex aqua communi per fermentationem fiat alcohol vini si phlogiston aliquod additur. Si igitur hoc verum est, quod de insigni partium oleosarum præ aqueis tenuitate affirmare posse mihi sum visus, (§. 73.) sequitur necessario, quod si ex aqua oleum fieri debet, ejus particulæ minores fieri debeant,
quam

quam ante erant, id est, ut atterantur, dividantur ac subtiliscentur. Et è contra si ex oleo aqua fieri, seu oleum in aquæ formam redire debet, necesse erit ut particulæ minimæ iterum increascentur, condensentur, coalescant, & in massulas majores concreascent. Videtur ergo oleum esse aqua in minimis particulis attrita & quasi alcoholizata. Instrumentum hujus attritionis & alcoholizationis videtur esse motus principii ignei, phlogisti scilicet purioris, accedentis.

§. LXXVI.

Quapropter particulæ minimæ aqueæ nequaquam sunt indivisibiles, aut atomi, nec elementum aliquod originarium, nec corpus simplicissimum & primum, ut etiam ARISTOTELES contra THALETEM disputavit. Nam atomus aut corpus simplicissimum & primum dividi ulterius aut atteri non potest. Sed potius particulæ minimæ aquæ sunt massulæ compositæ sui generis, magnitudinis determinatæ, ex aliis longe tenuioribus corpusculis elementariis combinatæ, in ea etiam resolutibiles. Hæc corpuscula minora, quæ respectu aquæ elementa possunt vocari, plane aliam naturam necessario habent quam aqua ipsa, & possunt esse causa mirabilium phænomenorum, quibus alias longe materias pro causa Physici assignare solent.

§. LXXVII.

QUARTO membrana aquea bullarum habet suos poros, eosque determinatæ magnitudinis.

H

In

In *initio* quando inflatur, partem magnam *aëris inflati*, per poros dimittit. Nam si fortiter inflas potest trans bullam percipi flatus. Ergo non omnem aërem continere aut coercere bulla potest, sed pars ejus per poros transit. *Deinde* si bullam *fumo* replet (§. 43.) hic per poros bullæ minime transit, sed in bulla coercetur. Putabam an bulla & fumus haberent vim se invicem fugiendi, & quod fumus quia forte bullæ adhærere non posset, etiam per poros non posset transire. At vero si fumus similis exterius ad bullam admittitur, ille ut ab omni corpore solido ita etiam à bulla attrahitur, ut in tota superficie circa bullam moveatur, eam quasi lambendo, nec à bulla fugiat. Quare necesse est fumi particulas non ex nisu quodam fugiendi, sed propter solam magnitudinem non posse bullæ poros transire. *Tum* si bullam pelucidam, fumo non repletam ita collocas ut subter eam possis lampadem incensam ponere, videbis *funium nigrum fuliginosum*, qui ex flamma lampadis forte surgit in bullam ab extra penetrare & intus contentum aërem opacare. Ergo dantur pori qui fuliginem transmittunt. Pori ergo membranarum bullæ sunt majores quam quædam particule aëris & quam particule olei in fuliginem transmutati, sed minores quam particula vaporis ex vegetabilibus siccis per accensionem nati, & quam vapores ex pulmonibus sani hominis tempore brumali explosi.

§. LXXVIII.

Meretur etiam considerationem, quod bulla non fiat nisi ex una gutta lixivii, scilicet ex tali gutta quæ à tubulo per proprium pondus non decidit, & quæ pro tubi varietate nunc major nunc minor esse potest. Nam si in tubulum aliquid plus lixivii assumis quam sponte in perpendiculariter erecto ascendere potest, (non ascendit autem altius, quam donec quantitas ingressa sit guttæ æqualis, ut assumo ex Celeberr. Virorum MVSCHENCROECKII & HAMBERGERI observatis) tunc hoc superfluum in bullam inflari nequit, sed successive super membranam bullæ defluit, ut infra in peculiarem guttulam colligatur, libere à bulla dependentem. Atque hic descensus lixivii superflui manifestus oculis est, quia strias format & in parvis quasi rivulis defluit, quod phænomenon sine dubitatione NEWTONVM movit, ut crederet ipsam bullæ materiem defluere, ideoque summitatem bullæ successive attenuari.

Cui accedit quod si bulla hæmisphærica super ipsam superficiem lixivii excitatur, tunc in toto bullæ ambitu quo lixivium contingit est perpetuus motus, namque de lixivio semper particulæ quædam propter vim adhæSIONIS ascendunt in membrana solida bullæ, aliæ descendunt, & sic circulationis aliquam speciem referunt, quæ non observatur si bulla remota ab lixivio est.

SUCCESSIVAM vero eam bullæ attenuationem, quæ scilicet in constanti ea progressionem qua bini circuli se osculantes sensim a puncto contactus recedunt, ex supposito NEWTONI fieri debet, autopsia omnino negat, nam maculæ nigræ quæ oriuntur, non successive fiunt nigriores, sed marginem habent acutum & quasi abruptum, nec in solo vertice, sed etiam ad latus nascuntur, & in bulla quæ nil superflui lixivii habet nullus descensus fluidi observatur, nisi membranæ extimæ pinguis, ut hæc & alia pluribus exposui (§. 53 - 60.)

Quum igitur ea cohæsiō quam gutta exercet adversus tubulum a quo dependet, aliquam relationem habeat ad magnitudinem bullæ futuræ, videtur primus hic adhæsiōnis conatus modulum aut mensuram facere cohæsiōnis & soliditatis futuræ omnium bullæ partium.

§. LXXIX.

Tandem ex omnibus his quæ de bulla aquæ sunt hætenus tradita, concludo *experimentum HELMONTIANVM de incremento plantarum* (imo & animalium) *ex aqua*, verissimum non modo esse, verum etiam modum quo tale nutrimentum fiat, patere.

Primo enim quantum hætenus scimus, duæ tantum sunt *machinule*, ex quibus natura omne vivens corpus struit, scilicet *vesicula* & *canaliculus*. Ex his enim tandem omnia componuntur, & ex iisdem machinulis, pro diversa mixtione materiæ ex qua fiunt,

& varia earum conjunctione hic pulmo, ibi hepar, illinc cerebrum & glandula aut caro, hic lignum & arboris folium, & florum petali aut fructus & cortex, & brachia polypi & caput fungi nascuntur. Quodcunque solidum est in corpore vivente, si ad ultima accedimus, semper aut vesicula aut canaliculus esse invenitur; provocho enim ad omnes illos sapientissimos viros qui in horum inquisitione variis artibus laboravere ut absconditum hoc naturæ opus detegerent. Quando igitur ostensum est supra, ex aqua simplici, modo aliquid adipis & salis accedat, solo motu tam externo quam intrinseco vesiculas vel bullulas solidas imo etiam canaliculos (vid. §. 66. 68) excitari facillime, nulla dubitatio remanet, quin natura id similiter efficere queat.

Secundo materia prima ex qua generatur omne animal & omnis planta, nonne est gelatina vel mucilago, cum multa aqua permixta? Hæc autem nonne est lixivium saponaceum, (ut BOERHAVIUS rectissime solitus fuit exprimere) scilicet ex aqua, oleo, sale, & pauculo terræ quæ principia ex partibus solidis corporum animalium & vegetabilium, præsertim mollibus, (nam in ossibus terra superabundat) & ante exsiccatis, (ut ea aqua quæ ad solida non pertinet, sed in eorum tantum cavitatibus hæret, expellatur) eadem fere proportionem inesse solent ut in saponaceo lixivio.

Nec obstat quod bullæ de quibus dixi fragiliores sint multo & inconstantiores quam machinulæ minimæ ex quibus viventia corpora constant. Nam quis magnam perfectionem quaeret in hominum opere? Natura autem diu materias & multo intimius miscendo in primis autem in parvis laborando & insensibilibus, ideoque machinas excitando valde pusillas utraque methodo largitur constantiam. Quo minor est bulla saponacea, eo diutius durat. Aliquando per tubulum capillarem vitreum, tenuissimum scilicet qui haberi potest, bullulas inflavi, quarum diameter circiter sexta pars unius lineæ esset, hæ bullulæ minimæ ad tertium diem duravere in aëre libero æstivo antequam disparerent quare de bullulis & canaliculis absolute minimis naturæ multo major constantia potest sperari.

Potius in tali sententia confirmamur, si totum nutritionis opus consideramus, & quomodo illud decantatum chemicorum *Solve & coagula* in eminenti gradu hic exerceatur, & miram vitalium fibrarum *elasticitatem*, quæ nec a terra, nec ab oleo solo, nec à sale solo, nec a tribus his mistis ullo modo produci potest, & plura alia phænomena quæ hic omitto, quoniam ea reservo alii occasione, quando, si Deo placuerit experimenta de opere nutritionis aliquando publicabo, quodammodo diversa ab omnibus aliis quæ hactenus sunt in eo genere tentata.

§. LXXX.

Haftenus exiis phænomenis quæ circa bul-
las faponaceas mihi occurrerunt, demonstrare
fum annisus quod aqua communis variarum
formarum fit capax inprimis quod ea in firma
& elastica corpora & quidem levi negotio, scili-
cet solo motu determinato, transformari queat
inprimis si pinguedo accedit. Credo etiam
quod plura phænomena physica sic facilius ex-
plicanda forent, quam haftenus potuit fieri,
quando videlicet continua hæc naturalis con-
versio corporis fluidi in solidum, non elastici
in elasticum, tenuioris in crassius et vice versa
in subsidium vocaretur. Et est forte una ex cau-
sis cur in physica & medicina regulæ motus &
doctrina mechanica haftenus tam sæpe sine
fructu & infelicitate fuerint applicatæ, quia sola
actio, & non simul reactio partium considera-
tur. Nam magna est differentia an v. g. globu-
lus aliquis in particulas fluidas vel solidas impin-
gat, aut eædem particulæ quæ nunc fluidæ su-
stinent impulsu, an fluidæ maneant, vel ipso
eo impulsu, in momento temporis cohæreant,
elastice fiant, ideoque modum reactionis mu-
tent. Mathematici enim fidelissimi, postquam
omnem in ejusmodi negotiis explicandis ope-
ram impenderunt, tandem ad actionem (respe-
ctu mechanices) occultam, scilicet *fermentatio-
nem*, *effervescentiam*, *conflictum particularum
minimarum* & similia fugere coguntur, quippe
sine quibus in physicis vix aliquid intelligi po-

test, uti BORELLI, BERNOVLLI, KEILII & aliorum his gloria parium virorum monumenta monstrant. Quare hanc novam quasi mechanicam, quam ill. LEIBNITIVS *mechanicam occultam* vocare consueverat, majori quam hactenus factum, studio indagare convenit.

Jam unum mihi superest, scilicet *de conversione aquæ in corpus siccissimum*, & *terræ analogum fuliginis breviter loqui*, & ea quæ B. STAHLIVS de fuligine jam indicavit, paulo accuratius exponere.

DE CONVERSIONE AQVÆ IN FVLIGINEM.

§. LXXXI.

ISAACVS NEWTON in *append. opt. qu. 30* dicit nullum se corpus scire quod ad lucendum sit minus aptum quam aqua, atque tamen si methodo BOYLII in terram fixam repetitis destillationibus converteretur illam terram caloris idonei patientem factam, lucem æque ac alia corpora calefaciendo emitte posse. Ad hanc NEWTONI propositionem aliquoties cum pudore subrisi, quando cogitabam summum virum inter lucubrationes suas *flammam lampadis suæ* non adspexisse, quæ nil est aliud nisi *aqua lucens*, & quidem aqua in terram nondum conversa, sed solummodo cum principio inflammabili intimius conjuncta. Etiam ill. HAMBERGERVS Phys. §. 313. putat ad *flammam partes terrestres requiri*, quia *aqueæ & aëreæ ob gravitatem specificam minorem*
cande-

candescere haud queant. Ubi pace manium viri eruditissimi noto, quod hanc posteriorem propositionem sine demonstratione admittat, quum potius sit certum quod gradus candoris corporum ignitorum non se habeant in proportionem gravitatis specificæ, nam ferrum v. g. ignitum plus candet quam aurum ignitum, & carbo ligneus plus candet quam quilibet lapis ignitus, etsi aurum gravius ferro, & lapis gravior carbone reperiatur; imo oleum & spiritus vini, aquâ leviora corpora, tamen lucere queant, unde propositio ea *Cel. Viri* sine dubitatione gratis assumitur; Idem cel. HAMBERGERVS Phyl. §. 536, in *Schol.* probare cupiens *ad candorem requiri aërem semper frigidum* provocat ad *tædam* quæ *extinguitur si super camino furni detinetur*, quod exemplum tamen nil probat, quia in camino ventus est & magnus aëris motus, eaque tæda in quovis vento vehementi etiam frigido extingueretur, eadem autem in ventre furni ubi aër multo calidior, bene ardet, ideoque non calor sed motus aëris extinguit tædam.

§. LXXXII.

Sumebam vasculum porcellaneum firmum (ne mihi aliquid olei per rimas transiens vasculi minus firmi, periret) in ejusque medio ellychnium parvum ex gossypo firmabam ope lamellæ cupreæ perforatæ, tum infundebam olei olivarum veteris & purissimi portionem sufficientem.

H 5

Accen-

Accenso ellychnio flammam excitabam parvam & quantum poteram æquabiliter ardentem, & repetitis experiētiis intelligebam, *quod intra 15 minuta prima, i. e. intra quadrantem horæ per flammam hujus magnitudinis semper consumpta essent 25 vel 26 grana olei.* Nam quia totam lampadem cum omnibus contentis ponderabam semper antequam ellychnium incenderem, postque extinctam flammam iterum eandem lampadem ponderabam, facile patet quod olei perditam quantitatem accurate scire potuerim. Si flammam aliquando majorem facerem, non omnia succedere, quæ nunc dicam.

§. LXXXIII.

In tali flammula moderata observabam in medio *nucleum opacum*, scilicet ellychnium nigrum, unde sciebam quod *ellychnium ipsum*, exceptis nonnullis particulis fuliginosis adhærentibus *non canderet*. Circa eum nucleum globus erat supra in acumen protractus, igneus totus sed diversi coloris. In eo globo igneo præter splendorem totius flammæ notabam aliquando *peculiares parvas scintillas*, quæ *lucidiores & splendentiores* erant quam partes reliquæ flammæ; hæ scintillæ nunc copiosiores, aliquando parciores, nunc nullæ apparebant. Videntur ergo hæ scintillæ ex alia materia constare quam flamma ipsa. Inprimis copiosæ conspiciebantur si filo ferreo aliquando ellychnium tangebam & agitabam. Unde conclusi quod

quod hæ scintillæ forsan terreæ particulæ essent in oleo latentes vel ab ellychnio separatæ. Nam quod toto flamma non ex terreis particulis constaret eo firmiter mihi persuadebam quia sciëbam in oleo non nisi parcam terræ quantitatem inesse, quæ tantam flammam tam diuturno tempore alere & conservare neutiquam posset. Inprimis si cogitabam quod verum alcohol vini ab omni terra admixta liberimum, tamen flammæ alendæ valde esset idoneum.

§. LXXXIV.

Talem flammulam moderatam tegebam infundibulo magno vitreo, ita tamen ut in periphæria infundibuli sufficiens spatium esset per quod aer ad flammam conservandam necessarius liberum haberet aditum. Caudæ infundibuli quæ nunc parvum caminum repræsentabat, adluta-
bam alium longum tubum vitreum, & huic iterum alium hujusque summitati imponebam alembicum, cujus rostro adpendebam vitrum pro excipulo, sed sine lutatione, ut scilicet aëri transitus liber concederetur, quippe sine quo flammula fuisset suffocata. Quamprimum hunc apparatus ita instruxeram, videbam tubi partes superiores & alembicum cum excipulo, quæ ante ficcissima erant, multis guttis roridis madefieri. *Liquorem ita collectum inveni esse aquam purissimam, gustu & odore, nec potui aliquid vel salini vel pinguis principii in ea distinguere. Unde constat quod oleum leni*
flam-

flamma ardens in aquam commutetur. Quantitas ejus aquæ diversa erat pro altitudine tubi & pro flammulæ æquabilitate. *Quo flamma minor & æquabilior eo plus aquæ, imprimis autem quo altior tubus.* Nam si hic brevis, tum aqua ascendens non satis refrigerata sub forma vaporis visibiliter per rostrum alembici exibat inque auras sic dispersa capi in excipulo non poterat. Aliquoties ita bene apparatus meum instruxeram, ut *tres fere partes olei consumti sub forma aquæ purissimæ reciperem*, dum interea multi tamen vapores sensibiles mihi sub infundibulo & per commissuram excipuli aufugissent, unde concludo merito, *quod fere totum oleum, si lenta flamma ardet, forsitan paucula portione excepta, in veram aquam commutetur.* Eandem rem STAHLIVS jam observavit, & *quod cum spiritu vini simile quid contingat*, scilicet quod inflammando in veram aquam transmutetur BOERHAVIVS post alios & imprimis STAHLIVM in opere *chemico* ample describit. Quare nullum est dubium *quin flamma sit aqua ardens & lucens*, & intelligitur cur corpora ad ignitionem apta, nullam tamen flammam generent si humore aqueo carent, ut siccus carbo ligneus.

§. LXXXV.

Si tali flammulæ, quæ purissimam aquam exhalabat, imponebam quodvis corpus durum, v. g. clavum ferreum, ita scilicet ut clavus ferreus ipsam flammam contingeret & quasi divideret

ret tunc subito aqua in tubo & alembico ascendere desinebat. Potius in momento temporis crassus copiosus niger fumus, cujus antea ne vestigium aderat, instar nubium per tubum vitreum usque in alembicum, ex alembico per rostrum ejus in excipulum, & ex excipulo per rimas commissuræ in aerem volitabat. Tota simul interna superficies alembici & excipuli ut & pars suprema tubi, præsertim id latus ad quod fumus maxime ferebatur, aterrimo pingebantur colore, copiaque non modica siccissimæ fuliginis ibi colligebatur. Unde intelligebam quod ex levi causa, scilicet ex solo contactu flammæ per aliquod corpus durum, eadem illa materia quæ alias aquam constituebat, mutaretur in siccissimam fuliginem.

§. LXXXVI.

Durante ascensu fuliginis ne vestigium aquæ ex oleo ascendere observatur. Quod ut eo certius investigarem, removebam aliquando alembicum, tuboque vitreo imponebam frustum siccum recenter exulti cineris clavellati. Quum enim hoc sal aquam facillime attrahat, cogitabam ea ratione me scire posse an cum fuligine aliquid humoris aquei simul ascenderet. At hoc frustum salis alcalici nigrum quidem evadere ab adhærente fuligine, siccum autem omnino manebat, nisi post spatium duarum fere horarum, quo operis pertæsus, remoto a contactu flammæ ferreo clavo libertatem flam

flammulæ reddebam ut sine impedimento arderet, tum enim cito illud sal aliquem contrahabat madorem. Sal autem longè satis a flammula remotum erat ne valde calefieri posset, ideoque vix calefiebat, quod ideo addo ne quis putet sal illud propter calorem contractum aquam non attraxisse. Potius evidenter exinde probatur *quod eadem materia quæ in aliis circumstantiis aquam largitur, hic fuliginem constituat.*

§. LXXXVII.

Est igitur ex his observatis, quæ repetitu facillima sunt, admodum evidens, quod pro parvarum circumstantiarum varietate *oleum nunc in aquam, nunc in fuliginem, i. e. in speciem terræ commutari queat*, eademque materies sit flammæ, & aquæ evaporantis & fuliginis elevatæ, licet formâ externa maxime differant.

§. LXXXVIII.

Causa talis conversionis aquæ in fuliginem sua simplicitate mirabilis est. Flamma enim sine impedimento flammans dat aquam puram; eadem autem si per quodvis corpus durum, v. g. clavum ferreum in suo motu flammante impeditur, particulæ aquæ ad tale corpus durum allidentes & a suo motu rotatorio subito cessantes fiunt fuligo.

§. LXXXIX.

Neque est necesse *ut corpus illud durum quod flammam contingere debet (§. 85.) sit frigi-*

frigidum. Nam si *ferrum* etiam *calidissimum*, quod scilicet super carbonibus ante lucidissime candefeceram, flammæ admovebam, similis, imo ut mihi videbatur, major effectus sequebatur scilicet videbatur fuligo tunc eo copiosior generari. Quare ipsum ellychnium si forte justo longius est, ad generandam ex aqua fuliginem conferre valet, ut quotidiana teconomica praxis docet, qua si candela aut lampas molestum fuliginosum fumum fundit, ellychnium per forcipes præscindere, & sic molestiam fumi tuto tollere solemus. Ellychnium enim si nimis longum est, flammam circumfusam dividit eodem modo, ac si ferrum vel aliud firmum corpus flammæ esset impositum, ideoque ex aqua flamman- te fuliginem facit. Quare etiam ad latera ellychnii semper aliquid fuliginis adhæret, quæ successive vel decidit vel forcipe separatur ut clari- or sit candela. Atque hæ fuliginosæ particulæ circa ellychnium hærentes & volitantes sunt si- ne dubitatione causa diversorum colorum quæ in flamma observantur circa ellychnium.

§. LXXXX.

Non enim in auras transit modo & eleva- tur in tali casu fuligo, sed etiam ipsi illi ferro vel duro corpori vel ellychnio quod flammam di- vidit, copiose adhæret. Imo ipsi candentissimo ferro flammæ immisso adhæret fuligo nec a tanto calore qualis in ferro candente est, volati- lis fit, potius ferrum circum circa tegit. Qua-
re

re si loco clavi ferrei fumis laminam latissimam ferream vel cupream politam, eamque sic super flammulam locas horizontaliter, ut flammula laminam contingat, tunc ad eam laminam brevi temporis spatio magna fuliginis quantitas adcrefcere solet. Nunquam tamen, etsi variis artificiis uterer ita potui rem disponere ut omnem fuliginem ex flammula natam caperem, sed magna pars instar nubium nigrarum præter laminam ferream transferebatur & in auras magna celeritate volabat. Sæpius tamen brevi temporis spatio tantum fuliginis in tali lamina collegi, ut plus quam tertiam partem olei interea consumti efficeret, ita ut quando multas eas nubes nigras quæ transibant, animo computarem, non difficulter concluderem fere tantum fuliginis ascendisse quantum olei consumtum erat. Ubi tamen notandum est quod una cum fuligine etiam particulæ oleosæ non mutatæ ascendere soleant fuliginemque pinguem reddant, quæ particulæ oleosæ posthac, ut puram fuliginem habeamus seperandæ sunt. Id quod fit si fuligo talis volatilis optimo spiritu vini madefactus in globulos parvos formatur, atque hi retortæ vitreæ immissæ magno igni exponuntur. Sic oleum expellitur, & in fundo siccissima, friabilis terreis corporibus similis, nigra tamen, fuligo pura ramanet.

§. LXXXI.

Nota res est ex MAYOVII & HALESII pulcherrimis observatis *quod a flamma*, præsertim quan-

quando fuliginem & fumum eructat, *aër sua elasticitate privetur & quasi consumatur.* Putabam igitur an forte *aër* fuliginem formaret quatenus a flamma attrahitur, ideoque non ex aqua sed ex *aëre* fuligo nasceretur. Lampadem igitur meam accensam super mensula pusilla lignea ponebam in patinam aqua plenam, deinde eam methodo *HALESIANA* tegebam satis magno cylindro vitreo inverso. Quum igitur sic *aëris* externi commercium lampadi abstulissem, illa non diutius quam per *53 minuta secunda* flammabat, eoque tempore nullum fere *aërem* consumebat; postquam vero sponte sic extincta erat fumusque aliquis niger emergere spectabatur *aër* consumi etiam incipiebat, quod ex ascensu aquæ in cylindrum sciebam. Remoto deinde omni hoc apparatu perdideram spatium jam indicato temporis, scilicet *53 min. sec.* in loco hoc clauso *1½* grana olei quæ quantitas probabiliter in vaporem aqueum erat conversa antequam fuligo se manifestaret; fuliginis autem post extinctam flammam tam parva portio erat ut mensuram non caperet; interea a tam pauca fuligine inter ascendendum *12.* pollices cubici *aëris* suo elatere privati & quasi consumti erant, ut ex simili mole aquæ in cylindrum vitreum attractæ conjiciebam. Ponderant autem duodecim pollices cubici *aëris* circiter *3.* grana, fuligo autem hic forsan post flammæ extinctionem enata valde pauca & longissime infra quantitatem unius grani est, quare a fumo *aër* elasticitate

tate privatur quidem, sed in fuliginem non abit. Nam in physicis rebus causa debet esse adæquata effectui, quapropter dicere non possum quod tria grana aëris consumti effecerint multo minorem quantiatem fuliginis. Aër igitur elasticitate privatur quidem a fuligine, sed ipsam fuliginis essentiam non constituit etiamsi ad fuliginem generandam ut conditio necessaria videatur accedere.

§. XCII.

Multo autem certius sciebam aërem in fuliginem non transmutari, quia dantur alia corpora ignita quæ aërem copiosissime destruunt atque tamen fuliginem non generant. *Carbo* v. g. *Turfi* vel *cespitis batavi* purus nec amplius fumans fuliginem non exhibet, etiamsi aëris insignem quantitatem brevi temporis spatio destruat elasticitateque privet. Nam si cespitis hujus batavi candentis atque optime exusti, ita ut ne minimum odorem amplius spiret, omnique vel minime sensibili fumo careat, frustulum parvum, v. g. scrupuli unius pondere methodo HALESIANA sub scypho vitreo inverso collocavi, hæc tam parva portio intra 20. minuta prima quibus adhuc ardebat, consumpsit ultra 24 pollices cubicos aëris, scilicet partem circiter tertiam ejus aëris in quo erat inclusa, eaque consumptâ subito desinebat ardere, postquamque non amplius ardebat, etiam aërem vorare desinebat, contra ac fit in oleis. Neque tamen fuliginem ullam hic cespitis carbo emit-

tit.

tit. Quare aër consumtus in flamma non fit fuligo, sed alia quædam materia, quam HELMONTIVS *Gas* nominavit & nondum satis est nota. Fuliginem autem non generat cespitis carbo propter aquæ defectum, quæ in hoc sicco inflammabili corpore nulla videtur esse.

§. XCIII.

Similiter aliquot parva frustula carbonis lignei fagini bene candentia, sine fumo, quorum pondus non ultra semidrachmam erat, in eodem vitro (§. 92.) inclusa, brevi tempore extincta sunt. Aërem vero consumserunt non modo quamdiu ardebant, sed etiam post extinctionem, ita ut ab iis intra 15 minuta 20 pollices cubici aëris destruerentur sine ulla fuliginis nota. Ergo ex aëre consumto non fit fuligo.

§. XCIV.

Candela autem sebacea, *ex pinguedine animalis facta*, plane ut flamma lampadis ex oleo vegetabili in eodem vitro brevi extincta aërem vix consumsit nisi post suam extinctionem. Atque tamen hæc flamma candelæ, *etiam quamdiu flamma durat* aëre habet opus libero, licet eum vix destruere vel consumere videatur, nam quum tubulum vitreum capillarem incurvum, cujus cavitatis diameter circiter $\frac{1}{40}$ pollicis erat, ita applicarem scypho vitreo, ut per eum aliquid aëris liberi in scyphum a reliquo aëre seclusum intrare posset, tamen hic tubulus flammæ extinctionem ne per momentum est

remoratus. Quumque alium tubum similiter incurvum, cujus diameter esset $1\frac{1}{2}$ linearum eodem modo applicarem, hic extinctionem flammæ retardabat ad tempus tamen non plenarie. Ex quibus singulis patet aëris liberi commercium ad flammam quidem necessarium esse, tamen fuliginem non generare.

§. XCV.

Maxime autem ex spiritus vini flamma intelligo aërem in fuliginem non abire. Spiritus enim vini accensus atque sub scypho vitreo inverso similiter ardens aërem consumit eodem modo ut candela sebacea vel lampas, atque tamen notissimum est, ex spiritu vini accenso nullam generari fuliginem.

Ex quibus argumentis (§. 91 - 95.) satis patet quod *fuligo non ex aëre nascatur, sed ex ipsa illa materia quæ paulo ante oleum erat, & quæ fere tota aquea est, & in veram aquam redit ac transmutatur quando sine impedimento flammula ardet.* Peto autem a Lectoribus veniam quod in his indicandis longior fuerim, nam hæc obiectio, an forsan corpus siccum fuliginis non ex aqua sed ex aëre & particulis atmosphæræ generetur omnino præcidenda erat, ut eo certior essem fuliginem ex ipsa ea materia oriri quæ sub aliis circumstantiis fit aqua.

§. XCVI.

Quæ autem causâ est cur spiritus vini ardens fuliginem non fundat, quum tamen species olei
&

& quidem subtilissima sit? nulla alia, quam quod propter paucitatem principii phlogistici in respectu ad aquam, flamma spiritus vini non sufficienter incalescat. Nam non valde calidam esse hanc flammam, caloremque aquæ bullientis vix superare, est notum ex vulgatis & ipsis æconomicis experiētiis. Et calor hic non sufficit ad aquam ita mutandam ut ex ea corpus fiat siccum. Id quod duplici probo phænomeno.

Primo, quia guttula spiritus vini optimi cochleari ferreo candentissimo imposita & in eo accensa aliquid carbonis aut fuliginis generat, vid. supra (§. 17. 18.) Post sæpissime enim repetita tentamina hoc mihi semper constans est visum.

Secundo, quia si aliquid additur spiritui vinoso, quod ejus calorem augere queat, ille in veram & quidem copiosam fuliginem transmutetur. Exemplum habemus in *Liquore naphthæ* FROBENIANO celeberrimo illo medicamento, quod jam olim BOYLIVS adduxit, ut mutabilitatem humorum in corpora solida demonstraret, vid. ej. chymist. scept. & multo accuratius de eodem liquore scribentem Cel. I. H. POTTYM Chemicum præstantissimum in diss. de *acido vinoso*. Nam si *olei Vitrioli*, ab aqua superflua per exhalationem exactissime spoliati, *spiritusque vini* per repetita cohobia summe rectificati, æquales portiones inter se lente commisceas, tumque vel levem admoves externum calorem qui intestinæ calidæ motionis initium faciat, hic liquor com-

positus vehementissime incalescit, primoque *spiritum naphthæ* fundit penetrantissimum, & maxime volatilem, & cujus insignis tenuitas est, nam secundum meam experientiam specifica gravitas hujus liquoris est ad specificam gravitatem spiritus vini rectificatissimi & vere alcoholizati ut 113 ad 120. Postquam hic primus & ob varias causas admirabilis spiritus evocatus est, duplex oleum se manifestat, alterum quod fundum in spiritu petit, alterum quod eidem innatat, odoremque manifestum fuliginis habet. Deinde incipit in vitro spumescere materia & bullas nigras formare ita expansas, ut nisi calorem externum subito modereris, tota massa transeat in excipulum, simulque vapor suffocans acido-sulphureus pulmones vehementer lædens copiosus erumpit. Interea autem id quod in alembico vel retorta residuum est mutatur in verum nigrum carbonem volatilem, qui si separatur ab humida parte circumfusa, & modeste siccatur, in omnibus fuligini similis est, colore, odore, inflammabilitate. Poterat videri quidem quod in hoc experimento acidi vitrolici materialis concursus fuliginem coagulando generet. At vero in omni spiritu vini jam per se aliquid acidi est, ac tamen id per se nunquam fuliginem generat vel minimam. In oleis autem quæ tota in fuliginem abire possunt acidum quidem latet, sed minime copiosum. Unde acidi solius accessio in spiritu vini fuliginem per se non facere videtur, sed tantum accidentaliter,

liter, scilicet quatenus calorem intrinsecum totius liquoris auget.

§. XCVII.

Nascitur ergo fuligo, quando aqua in calore & motu flammeo constituta subito ab hoc motu deturbatur. Nam flamma libere flammans eructat aquam, eadem a quovis impedimento suffocata ex hibet fuliginem. Unde iterum patet, quod supra (§. 65. 66. 67.) probavi, solida corpora a fluidis non differre nisi directione conatus determinata.

Aqua autem in motu flammeo constituta sine dubitatione est magis calida quam eadem ebulliens, & in hoc casu regula AMONTONIANA patitur necessariam exceptionem. Hic autem calor & motus flammeus subito suppressus format ex aqua fuliginem, ita ut aqua certo gradu calida sit flamma, & in gradu paulo minus calido fiat fuligo.

§. XCVIII.

Fuliginis tenuissimus pulvis est, ejusque particula minima ne optimis quidem microscopiis distinguitur. Unde probabile fit, minimam fuliginis particulam non majorem esse quam particulam minimam aquæ, imo forte minorem (*quia olei particule minime minores sunt quam aquæ partes minime* (73.) & *ex his tam aqua quam fuligo generatur.*) Propter nigredinem vero colligere licet quamlibet talem fuliginis particulam atomis igneis circum circa esse tetam & circumdatam.

§. XCIX.

Fuligo oleorum, per spiritum vini ab oleo adhuc adhærente depurata (90) est materia fere indestructibilis, nullo noto dividenda menstruo, nisi igne. Si autem igne incensa lente concrematur, *tantam favillæ vere terrestris copiam relinquit quantam in ea olei portione ex qua hæc fuligio orta est materialiter adfuisse nemo demonstrabit.*

§. C.

Carbonis lignei fere eadem natura est quæ fuliginis oleorum, imprimis quando lignorum flamma perpetuo suffocatur, ut quando sub terræ tumulis in usus metallariorum carbones præparantur, nam in veram flammam ob terræ molem impositam nunquam exardescunt, & propterea plus aquæ retinent quam carbones culinarii à flammante igne generati, ideoque magis duri, magis ad terream & quasi mineralem naturam accedentes, minus salini fiunt, & ideo ad magnum calorem generandum præculinaribus magis laudantur. Lignum etiam quo recentius, quo plus aquæ continet eo meliores largitur carbones. Certumque est quod pro diversa ignis administratione ex eodem vegetabili nunc plus nunc minus terræ fixæ possumus per incinerationem producere, id quod notandum est, quando quis ex cineribus ligneis vult demonstrare magnam terræ copiam in vegetabilibus inesse, quia nondum est evictum an

omnis

omnis cinerum terra jam ante incinerationem in vegetabili latuerit, potiusque credi debeat magnam ejus terræ portionem igne demum generari. Nam quis in carbone, antequam incineratur, terram ostendere potest?

HOC NEVMANNVS aliquoties notavit in suis chemicis commentariis, quod idem scilicet vegetabile ejusdem bonitatis pro diversa ejus tractatione diversam dederit terræ insolubilis copiam. Atque de carbonibus notum est, quod illi qui sub terræ tumulis præparantur suffocato igne, nihil vel valde parum salis alcalici exhibeant, quum illi carbones lignei, qui sub camino in aëre libero ex ligno inprimis viridi & recenti parentur, insignem salis alcalici vel cinerum clavellatorum largiantur copiam. Quare in tali suffocato igne id ipsum fit terra, quod in libero aëre fieret sal alcalicum. Scimus autem quod sal & terra non differant nisi ratione vicinitatis majoris cum aqua. Nam sal ex STAHLII doctrina est aqua peculiariter modificata. Ex sale autem fieri terram est evidens. Ex sale culinari generatur arena vera si phlogiston animale ei diu copulatur, quod in carnibus & piscibus in muria falsa diu detentis quilibet œconomus observat, ac etiam à physicis jam esse notatum, in *Commercio litterario Norimbergensi* legi potest. Quare hic novus est transitus aquæ in terram, dum ex aqua primum sal, ex hoc dein terra producitur.

§. CL. *De generatione solidorum*

Habemus ergo duas novas methodos quibus natura utitur ad solida corpora generanda ex aqua. Scilicet primam si aquam cum phlogisto copulat ex eo oleum formans, hoc oleum dein in corpus firmum fuliginosum mutat. Ita nasci videntur pulverulenta plantarum sulphurea feminalia & alia corpuscula; ita sulphur vivum minérale & forsân quædam metallica. Nec objicere debemus in plantis talem calorem non esse qualem in lampadis flamma, qui enim ita ratiocinaretur, ille non adverteret, naturam perfectissima sua opera in minimis, & in momento insensibili producere. Radiique solares qui per vitra convexa collecti tam stupendum calorem momento temporis inducunt, per naturam variis aliis modis ita sæpe in puncto concentrantur & coadunantur ut homini tantam vim non sit possibile imitari. Exemplum habemus in attritu corporum, ut si chalybs adfricatur lapidi, inprimis in electricitate.

Altera autem methodus est, quando natura per accessionem ignei principii ex aqua primo sal format, dein hoc lente deducit in formam terræ. Cujus naturalis conversionis ideam exhibere potest artificialis methodus conficiendi vitri. Est enim fritta ex qua fit vitrum species saponis fixissimi, constans ex terra liquide fusa, & sale alcalico, & phlogisto per ignem attracto. Hoc lixivium fixum ope flatus in bullas extensum format novam terræ, scilicet vi-
tri

tri speciem, quæ à bullis aqueis vix differt nisi minori fragilitate.

§. CII.


Eoque minus hæc incredibilia sunt quoniam in aliis corporibus similem conversionem tam frequentem habemus, chemicorumque antiquorum decantatum illud *solve & coagula* ubi vis à natura instituitur, instrumentum vero solutionis & coagulationis plerumque est *igneus motus* diverso gradu adhibitus. Nam v. g. de *plumbo* est notum, quod in calore atmosphæræ nostræ sit corpus *solidum*; quod id in igne mediocri *liquecat*; quod idem si gradus caloris paulo vehementior est, iterum in durum corpus, scilicet *calcem* plumbi, deinde *minium* & *lithargyrium* convertatur; quod idem sic solidatum minium, si gradus ignis iterum augetur nova fluxus specie in *fluidum vitrum* commutetur & sic porro, ita ut in *plumbo* cum variante calore varii dentur fluiditatis & firmitatis modi & gradus. Similiter de *mercurio* constat ex GLAUBERI & HOMBERGII observatis, inprimis autem ex diuturno labore BOERHAVII, quod ille in atmosphæræ calore semper *fluidus* sed *fixus* sit, aucto calore in *vapores* mutatus exhalet, continuato autem & intensiori calore in corpus solidum pulverulentum solo igne commutetur; quod hic pulvis si iterum ignis intenditur, pro parte iterum fluidus fiat, pro parte altera vero magis solida magisque fixa fiat, ita ut magnum ignem sustineat, atque tamen in eo

tan-

tandem ignis gradu qui in vitro plumbi fluentis est, iterum lique scat & avolet, uti ex BOERHAVII experimentis de mercurio notissimis non sine admiratione didicimus. Ex quibus & aliis exemplis concludo non improbabile esse quod & *aqua*, quæ tempore hyberno dura est *glacies*, & majori calore æstivo *lique scit*, aucto eo calore in corpus *siccum*, & forte terrestre, denovo abire queat. Unde aquæ conversio in terram videtur imprimis instrumento ignis esse tentanda.

Puto autem mihi nunc abstinendum esse, ne loco certi quod scribere cceperam, tandem in probabile incidam & incertum. Habeo quidem nonnulla quæ ad aquæ naturam explicandam possim adhuc adjicere experimenta, & ea non minus singularia quam illa quæ hætenus descripsi. Quum autem imperfecta sint, & non omnis mihi scrupulus ratione eventus perpetui exemptus, convenientius ea retineo donec fiam certior. Hæc autem pauca, benevole lector, accipe, nec temne quia circa aquam, notissimum corpus, instituta sunt. Aquæ enim tam late patens est usus non modo in viventibus, hujus orbis corporibus, siquidem sine aqua nulla est vita corporea, sed etiam in toto minerali regno, ut aqua omnino inter primaria creationis miracula sit referenda, propterque suam simplicitatem & sufficientiam nos imprimis inducat ad cognitionem & venerationem Dei,
 exoptatum eum & beatissimum omnis
 scientiæ finem.

CON.



CONSPECTVS TOTIVS OPVSCVLI.

Pars Prima.

In qua breviter recensentur dogmata præcipua veterum & recentiorum de aqua.

§. I. *Corporum simplicium phaenomena magis instruunt intellectum quam ea compositorum.*

§. II. *In cognoscenda aqua omnes scientiæ occupantur. Physicus & Chemicus pauca de aquis hætenus certo novit.*

§. III. *Quaedam phaenomena aquæ omnibus hominibus nota sunt.*

§. IV. *Aqua propter suam simplicitatem olim inter elementa relata est. Aristotelica hypothesis de elementis laudatur.*

§. V. *Transflementatio Aristotelica explicatur, & primariæ ejus corporum qualitates recentibus & hodiernis terminis exponuntur. Simul inquiritur in absolutam ignis levitatem respectu centri telluris. Indicatur necessitas hujus inquisitionis, quia si ignis absolute levis falsa est regula: Massas esse proportionales gravitati specificæ.*

§. VI. *Primariæ corporum in se conversiones sunt adhuc problema.*

§. VII. *An aqua in aërem transmutari queat, veterum recensentur experimenta.*

§. VIII.

§. VIII. *Et objectiones contra eam mutationem*
GVERICKII, BOYLII, dela HIRE.

§. IX. *Aquæ vapores elastici sunt ut aër.*

§. X. *Quum aqua ipsa minime sit elastica.*

§. XI. STAHLIUS elasticitatis aquæ inventor dici amat. *Quo sensu id verum. Cf. §. 70.*

§. XII. AMONTONI inventum de æquali semper aquæ ebullientis calore.

§. XIII. *De modo & copia exhalationum aquæ.*

§. XIV. *An aqua in terram fixam converti queat, problema est.*

Pars Secunda.

**Continet observationes de aquæ diversa
fixitate in diverso caloris gradu.**

§. XV. *Aqua in calore qui major est quam ad ebullitionem requiritur, fit fixa, & eo fixior quo major caloris gradus est, quod novis experimentis ostenditur, præsertim in calore candentis ferri.*

§. XVI. *Eadem phænomena iterum expenduntur.*

§. XVII. *Quomodo spiritus vini se habeat in calore candentis ferri.*

§. XVIII. *In tali calore aqua deponit terram fixam, & spiritus vini deponit carbonem.*

§. XIX. *Methodus nova & omnium certissima bonitatem alcoholis explorandi.*

§. XX. *Quomodo spiritus salis ammoniaci se habeat in ferri candentis calore.*

§. XXI. *Et oleum olivarum.*

§. XXII.

§. XXII. *Quod in tali calore aër ille qui in aqua est, etiam figatur pro parte.*

§. XXIII. *Nullos liquores in tali calore fixos fieri, præter aquam simplicem & aërem.*

§. XXIV. *Ostenditur aquam in tali calore non propter atmosphærae defectum, sed ex ipsa ignis actione fieri fixiorem.*

§. XXV. *Unde novum thermometrum proponitur pro maximis ignis gradibus mensurandis, qui per consueta thermometra mensurari nequeunt.*

§. XXVI. *Hujus thermometri usus per quædam exempla docetur. Aqua in calore candentis ferri est triplo fixior quam argentum vivum.*

§. XXVII. *Aqua in calore qui major est quam candentis ferri, sit iterum volatilior & summe elastica.*

§. XXVIII. *Terra in igne candens non est multum calidior quam aqua ebulliens, quare nunquam funditur. Scoria ferri similiter. Salium in igne fusorum summus calor.*

§. XXIX. *Aqua in calore candentis ferri etsi fixior sit, tamen non calidior.*

§. XXX. XXXI. *An pars aquæ per calorem candentis ferri mutetur in terram fixam.*

§. XXXII. *Fit transitus ad sequentia. An aqua in corpus firmum sit mutabilis, præter glaciei existentiam duo sunt nota primaria experimenta, alterum BOYLII, alterum HELMONTII.*

§. XXXIII. *Experimentum BOYLII confirmatur.*

§. XXXIV.

§. XXXIV. *Contra HELMONTIANVM experimentum WOODWARDI objectio indicatur.*

§. XXXV. *Et refutatur.*

Pars Tertia.

De aquæ statu solido, quando ex ea fiunt Bullæ.

§. XXXVI. *Quid sit bulla, & unde fiat.*

§. XXXVII. *De sapone & ejus differentiis.*

§. XXXVIII. *De natura & constitutione saponis nigri Batavorum quædam monentur, quippe cujus concursu maximæ & formosissimæ fiunt bullæ.*

§. XXXIX. *Quomodo bulla fiat.*

§. XL. *Quomodo phænomena bullarum optime conspici queant.*

§. XLI. *Bullarum magnitudo variat pro magnitudine guttæ ex qua inflatur.*

§. XLII. *Crassities membranæ bullarum omnium minima est $\frac{1}{15624}$ pollicis rhenani.*

§. XLIII. *Membrana bullæ est corpus solidum, quod ex variis phænomenis probatur. Quomodo fumus in bulla contineatur.*

§. XLIV. *Eadem membrana non humida sed sicca est.*

§. XLV. *Et valde elastica.*

§. XLVI. *Bulla in initio habet vim & nisum se contrahendi, quamdiu flexilis est.*

§. XLVII.

§. XLVII. *Dein fit rigida, & accipit vim & nisum explosivum, ut singulæ ejus particulæ subito & late à se invicem dispergantur.*

§. XLVIII. *Bulla eodem modo in pulverem fatiscit ut lachryma vitrea cujus cauda frangitur.*

§. XLIX. *Bulla igitur duplicem nisum habet sibi oppositum, scilicet centripetum & centrifugum.*

§. L. *Quo saturatius est lixivium saponaceum ex quo bulla formatur, eo major est vis centripeta. Quo dilutius est lixivium, eo major est vis centrifuga.*

§. LI. *Vis centripeta bullæ dependet ab oleo. Vis centrifuga ab aqua.*

§. LII. *In bullæ membrana oleum & aqua, quæ ante in lixivio magis mixta erant, manifeste separantur. Inde origo colorum.*

§. LIII. *Membrana bullæ coloratæ ex triplici lamella constat. Exterior oleosa colorata; media salina alba; intima aquosa pellucida vel nigerima est.*

§. LIV. *Extremam bullæ lamellam esse oleosam probatur ex phænomenis.*

§. LV. *Extrema hæc lamella cum interioribus non nisi laxè cohæret, & super immotis interioribus varie moveri potest. Hæc sola colores generat.*

§. LVI. *Quod clarius nudo oculo apparet, si membrana bullæ non spherica sed plana conficitur.*

§. LVII. Si *lixivium bene mistum est, id est, ut partes oleosæ ab aqueis non facile secedere queant, tunc bulla nunquam colores contrahit. Quare bulla ex saliva hominis sani nullos habet colores.*

§. LVIII. *Similiter ex urina, & aliis liquoribus bene mistis.*

§. LIX. *Quare quo frigidior atmosphæra, eo colores distincti magis adparent.*

§. LX. LXI. *Colores NEWTONIANOS non ex tota bullæ membrana, sed ex ejus lamella exteriori reflecti, ex ipsius NEWTONI calculo demonstratur.*

§. LXII. *Aqua pura omni pingui carens nullos unquam colores reflectit, quare doctrina NEWTONI de tenuium lamellarum coloribus hic limitanda est. Sed refractionis colorum varia in aquis ex colore diverso glaciei probatur.*

§. LXIII. *Asseritur veritas harum observationum.*

§. LXIV. *Aqua igitur per solum flatum in corpus firmum membranaceum mutari potest.*

§. LXV. *Vera differentia quæ inter corpora fluida & firma intercedit.*

§. LXVI. *De filo sericeo aranearum, quod in puncto temporis solidescit.*

§. LXVII. *Fluidorum & solidorum differentia porro*

porro explicatur, quod in solo conatu particularum variante fundetur.

§. LXVIII. *Causa quæ ex fluido solidum facit est motus determinatus. Hæc causa vel in fluido intrinseca, vel extra illud extrinseca est. De Plantarum generatione æquivoca sine semine.*

§. LXIX. *Aqua est fundamentum elasticitatis in bullæ membranis.*

§. LXX. *Et STAHLII assertum de aquæ elasticitate affirmatur & explicatur.*

§. LXXI. *Aërem ex aqua generari novis argumentis fit probabile.*

§. LXXII. *Ex bullæ mensura probatur unam particulam aquæ habere diametrum $\frac{1}{17577}$ pollicis rhenani. Quare in uno globulo sanguinis LEWENHOECKIANO contineri queunt prope 300. particule aqueæ.*

§. LXXIII. *Diameter particulæ minimæ oleosæ est ad diametrum globuli aquei ut 1. ad 30.*

§. LXXIV. *Quod contra objectionem defenditur.*

§. LXXV. *Oleum videtur esse aqua in suis minimis particulis fracta & contrita per opus fermentationis.*

§. LXXVI. *Quare aqua non est elementum.*

§. LXXVII. *Membrana bullæ aquea poros habet certæ ac determinatæ magnitudinis.*

§. LXXVIII. *Adhæſio guttæ ad tubulum ex quo inflatur eſt meſſura ſoliditatis in ipſa bullæ membrana.*

§. LXXIX. *Omnia animalia & omnes plantæ conſtant ex duabus machinulis ſibi vario ordine junctis, ſcilicet ex tubulo & veſicula. Et materia eorum eſt lixivium ſaponaceum. Quare HELMONTIVS, ex aqua (cui aliquid ſalis & pinguedinis accedere debet) omnes plantas creſcere, recte judicavit.*

§. LXXX. *Utilitas hujus doctrinæ in theoria phyſica & medica indicatur.*

Pars Quarta.

De converſione aquæ in fuliginem.

§. LXXXI. *Aqua candere & lucere poteſt etiamſi nondum ſit in terram converſa.*

§. LXXXII. LXXXIII. *Quædam phænomena flammulæ ex oleo indicantur.*

§. LXXXIV. *Flamma olei moderata & non turbata æquabilis, convertitur in aquam puriſſimam tota.*

§. LXXXV. *Flamma eadem turbata non in aquam ſed in fuliginem tota convertitur.*

§. LXXXVI. *Durante aſcenſu fuliginis ne veſtigium aquæ ex oleo exhalat. Quod ſingulari experimento docetur.*

§. LXXXVII.

§. LXXXVII. *Aqua & fuligo sunt eadem materia.*

§. LXXXVIII. *Et causa talis mutationis simplicitate sua mirabilis est, nempe solus attactus corporis duri.*

§. LXXXIX. *Calor aut frigus corporis hujus duri ratione fuliginis generandæ indifferens est.*

§. XC. *Fuligo ascendens corporibus duris facile adhæret, ideoque sic colligi potest.*

§. XCI. *Inquiritur an fuligo potius ex aëre, quam ex aqua generetur, & negatur ex phænomenis.*

§. XCII. *Cespes batavus candens aërem destruit, tamen fuliginem non generat.*

§. XCIII. *Carbo ligneus candens aërem destruit, nec generat fuliginem.*

§. XCIV. *Sebum candens aërem destruit, nec tamen eo tempore facit fuliginem.*

§. XCV. *Spiritus vini incensus multum consumit aërem, nec tamen unquam fuliginem largitur.*

§. XCVI. *Spiritus vini mutatur in fuliginem si major caloris gradus ei conciliatur.*

§. XCVII. *Fuligo est aqua cujus motus flammans subito supprimitur, cincta particulis igneis.*

§. XCVIII. *Fuliginis particulae minimæ non videntur esse majores quam particulae minimæ aquæ.*

§. XCIX.

§. XCIX. *Fuligo est materia communibus menstruis indissolubilis, excepto igne. Hoc tractata multam terram relinquit.*

§. C. *Carbonis lignei fere eadem natura est quæ fuliginis. Carbo non est terra.*

§. CI. *Ex aqua in terram duplex transitus est, primus quando in oleum, alter quando in sal mutatur.*

§. CII. *Ejusmodi conversiones solidorum in fluida & vice versa etiam in aliis corporibus pro diverso ignis gradu adhibito sunt familiares, ut in plumbo & mercurio.*

FINIS.

Typis JOAN. SEBAST. STRAVBE,
ACAD. TYPOGR.



Corrigenda.

- P. 2. lin. 27. *parallelovido*, lege *parallelopi-*
pedo
- p. 31. lin. 8. *aliquod* l. aliquot.
- p. 39. lin. 15. *crabronum* l. carbonum.
- p. 58. lin. 9. *fixa* l. fixam
- p. 67. lin. 14. $\frac{15}{103}$ l. $\frac{15}{108}$
- p. 69. lin. 15. *enetas* l. enatas
- p. 76. lin. 3. *intra* l. infra



17
mavis
Real p 8, 13 x 18, 1 p ~

18





